
Short Stories in Kashmiri
कॉशुर अफसानु सौबुरन

कॅह नोन, कॅह सोन
kénh nón, kénh són



म.क.रैना
M.K.Raina

Book	:	kénh nón, kénh són कॅह नोन, कॅह सोन
Language	:	Kashmiri कॉशुर
Script	:	Devanagari-Kashmiri देवनागरी-कॉशुर
Author	:	M.K.Raina म.क.रैना
Copyright	:	Author लेखक

No part of this publication may be reproduced or transmitted in any form or by any means (except for criticism or review in print or electronic media) without the explicit permission of the author.

ॐ

नमामि त्वां शारदा देवीं, महाभागीं भगवतीम्
कश्मीर पुरवासिनीं, विद्या दायिनीम्
रक्ष माम रक्ष माम् ।
नमामि त्वाम् ।

To
My Family



सूची

ग्वडु कथ
पेश लफ़्ज़
नवि ज़मानुक टुकु शुकुर
वठ
तबदीली
शँमीमु
ज़ान द्यद

गवडु कथ

... लेखक

म्याँन्य गवडुनिच अफसानु सौबुरन 'चोक मोदुर' गॅयि २००४स मंज शयाह। अथ मंज ऑस्य शे अफसानु, यिमन हुंद तोलुक पूरि पूर सानि समाजी ज़िंदुगी सुत्य ओस। यिमन सारिनुय अफसानन मंज ओस सानि तमि वख्तुचि दूहदिशि हुंजि ज़िंदुगी हुंद अक्स नोन, येलि अँस्य कॅशीरि मंज रोज़ान ऑस्य। यि छि अख हँकीकथ ज़ि १९८० दँदुलु क्यन ऑखुरी अयामन मंज कॅशीरि हुंद हालत बदलनु ब्रॉठ ऑस्य बटु मुसलमान पानुवँन्य मायि मोहबतु सान रोज़ान। यि छु पज़र ज़ि कुनि कुनि सातु पेश यिनु वॉल्य गॉर मोमूली हॉदिसु या वाकात, यथ मंज फिरकुदारानु नँहँज नँन्य ऑस नेरान, ऑस्य असि ब-हैसियति अख कोम त्रेन तु त्रुवहन मंज त्रावान तु यि सौचनस प्यठ मजबूर करान ज़ि सानि वुमरन हुंजि रोज़न जायि मंज छा सोन मुस्तकबल महफूज़ किनु न? मगर हालात ठीक सपदुवुनुय ऑस असि बेयि माजि कॅशीरि हुंज माय गनान तु बासान ज़ि युथ लोल अँस्य बटु मुसलमान पानुवँन्य बॉगरान छि, सु बनि नु बेयि कुनि जायि। १९९०न वातुनोव यिमन लोलु पयमानन ददारु तु यिमन गॅयि नु रुमुय यॉन्न कँह, दँपिव यिमन गव चूर। मगर तमि पतु ति असि पनुनि ज्यनु जायि हुंज कल तु तथ वुमरन हुंजि बरादँरी प्यठ नाज़, तिव्याज़ि असि छि अज़ ति अँदरिम्यन गोशन मंज कश्मीरियतुच वरासत टॉठ। मे छे पूर व्वमेद ज़ि अज़ नु पगाह, कॅशीरि हुंदिस मुसलमानस ति फेरि बेयि अमि वरासतुच माय तु सु गछि अकि लटि बेयि मजबूर अथ लोल बरनस। म्याँन्य अफसानु छि अँथ्य वरासँन्न सग दिवान तु लोलबरान।

'चोक मोदुर' अफसानु सौबुरनस मंज ऑस्य सॉरी अफसानु सान्यन ऑविल्यन रिशतन उजागर करान। प्लाट ऑस्य जज़बॉती। तिथ्य मसलु ऑस्य फिरनु आमृत्य यिम प्रथ अँकिस इनसानस कुनि नतु कुनि विज़ि पानस बुथि यिवान छि। म्यान्यव कँहव दोस्तव तु रँफीकव दिन्न मे अथ कथि कुन च्नेनुवँन्य ज़ि बुथि हरगाह बु बेयि कांह अफसानु सौबुरन शयाह करु, तथ मंज गछु बु कांह त्युथ अफसानु ति शॉमिल करुन यथ मंज रछु खंड असुन गिंदुन आसि। म्याँनिस यथ नँविस अफसानु सौबुरनस मंज छु 'नवि ज़मानुक टुकु शुकर' अफसानु तिहुंज यँहय खॉहिश वुछिथ शॉमिल करनु आमृत। 'टुकु शुकर' छि बिज़ॉती अख प्रॉन्य कौशर लूक कथ, यथ मंज शुकर छु स्यटाह बेकल आसान। मगर अँज्यचि कथि मंज छु शुकर अकि नवि आयि पेश आमृत करनु। व्वमेद छि ज़ि परन वाल्यन यियि यि नोव किर्दार पसंद।

'तबदीली', 'वठ' तु 'शॅमीमु' अफसानु छि अकि फिरि बेयि सानि समॉजी ज़िंदुगी सुत्य वाठ ख्यवान। यिमन मुतलिक छुनु मे येतिनस खास कँह वनुन। मगर 'वठ' अफसानस मुतलिक छुस बु अख कथ यछान त्वहि ब्रॉठु कनि थवुन्य। क्या ज़नानु छा हमेशु खराबुय आसान? क्या सान्यन असुवुन्यन गिंदुवुन्यन गरन छा हमेशु ज़नानय छलु तु फलु करान? मर्दस छु ना अथ मंज कांह तखसीर? यि छु त्युथ सवाल यथ नु सँहँल सँहँल कांह ति मर्द येछि जवाब द्युन। मगर अगर अँस्य

सनव तु पनुन्यन दिलन वारु पृष्ठव, असुवुन तु लसुवुन गरु फुटरावनस मंज छु मर्दस ति त्युतुय कोसूर यूताह ज़नानि छु। आम तोर छे कांह ति ज़नानु, खास वॅरिथ कॉशुर न्वश, मर्दु सुंद रोश वुछिथुय पनुन तर्जे अमल मुकर करान। अगर कांह ज़नानु खराब आसि, तस हॅर दिनस मंज छु मर्दु सुंद रोल ति स्यठाह कॉम करान। मगर छेकरस छु मर्द पनुन ऑब चूरि थवनु खॉतरु सोरुय कॅह ज़नानि हुंदिस मुरिस मथान। मे छि हॅकीकतस मंज वारियाह तिमु ज़नानु वुछिमन्न यिमु पॅज्य पॉठ्य दीवीयन हुंद रुफ छि, मगर क्रूठ स्वबावु वाल्यन खानुदारन ब्रॉठु कनि छे तिमु दॅबिथ रोज़ान तु ज़्यादतर मामलन मंज ऑखुरस गलथुक साथ दिनस प्यठ मजबूर सपदान। आशा जी छि यिछुय अख ज़नानु।

‘ज्ञान द्यद’ छु अख अलामॉती अफसानु तु यि छु १९९०कि माइग्रेशन पतुक्य सॉन्य हालात नवि आयि व्यछुनावान। यि अफसानु येति सोन यि पज़र नोन छु कडान जि पनुन्य तमहुनी वरासथ रॅछुरावनस मंज कोताह दॅल्यत्रोव लोग असि, तॅती छु यि अमि कथि हुंज ति च़ेनुवॅन्य दिवान जि वुनि छु वख, अॅस्य ह्यकव अथ वरासॅन्न रॉछ वॅरिथ तु ब्रॉह कुन पकुनॉविथ।

देवनागरी-कॉशिरि लिपि मंज कांह किताब शायह करुन्य छु हना गोब। न छु अथ किताबि सरकारु या कुनि अकादमी तर्फु कांह मदद मेलान, तु न छि अथ तीत्य परन वॉल्य मेलान यिम किताब मॅल्य ह्यथ अमिकिस शायह करन वॉलिस किताबि हुंदि कुमतु रॅग्य मॉली मदद वातुनावुहॅन। अवय ओस मे येमि किताबि हुंद ग्वडन्युक एडिशन इंटरनेटस प्यठ दॅस्तियाब थोवमुत, युथ ज़न यि किताबि हुंदिस सूरतस मंज शायह सपदनु ब्रॉठ ति तिथ्यन परन वाल्यन ताम वॉतिथ हॅकिहे, यिमन वुनि ति कॉशुर परनस सुत्य ख्वय छे। म्यानन वॅरीबी दोस्तन गव नु अमि सुत्य तसलाह कॅह तु तिहॅदिस इसरारस प्यठ प्यव मे येमि किताबि हुंद प्रिट एडिशन शायह करनुक ति कदम तुलुन।

बु छुस पनुनिस रुत कांछन वॉलिस रवींदर रवी जी सुंद शुक्र गुज़ार, यिमव आवुरेर आसनु बावजूद ति वख कोड तु यथ किताबि ल्यूखुख पेश लफ़्ज। बु छुस जिनाब अर्जुन देव मजबूर सॉबुन ति शुक्र गुज़ार यिमव तॅबीयत नासाज़ आसनु बावजूद ति येमि किताबि हुंद मुसवद वरकु वरकु पोर, कॅहन गल्तीयन कुन वॅरुख निशानदेही, तु आयिंदु खॉतरु दितिख मे कॅह रुत्य मशवरु ति। मजबूर सॉबस ह्यकु नु बु ज़ांह हूरिथ।



म.क.रैना

१०१-अ, पुष्प विहार, शास्त्री नगर
वसई रोड (वेस्ट), डिस्ट्रिक्ट ठाने ४०१

२०२, महाराष्ट्र, भारत

मोबाइल: ९४२२४७३४५९

ई-मेल: rainamk1@yahoo.co.in

८ मई, २००६

पेश लफ़्ज़

... रविन्दर रवी

‘कॅह नोन, कॅह सोन’ - असरी तलख हकीकचन हुंद गमाज़

मारुफ तु ममताज़ कहानीकार एम.के.रैना संज़न पांचन कहानीयन हुंज़ नॅव सौबुरन ‘कॅह नोन, कॅह सोन’ छि मे ब्रॉह कनि। असरी नब्ज़ शिनास तु हिंसास कोशुर कलमकार श्री रैना छुनु कुनि तारफुक मोहताज। बिसियार पासल तु बिसियार गो आसनु किन्य यीन्न खँदमथ तिम कॉशिरि ज़बॉन्य तु अदबुच करान छि, स्व छे गुलि मीठिच तु दादे तहसीनुच मुस्तहक। तहकीकी मज़मून ऑस्यतन, तनकीदी मवाज़नु ऑस्यतन, शार वनुन्य ऑस्यतन, या बयक वक्त त्रेन ज़बानन प्यठ फोकियत आसुन्य ऑस्यतन, तिम छि अदबी उपकस कुन बराबर वाश कडान। पांचन शार्ट स्टोरीयन (short stories) प्यठ मुश्तमिल ‘प्यंटाकार्ड’ (Pentachord) छि सानि नवजवान कॉशिरि पुयि अख तोबरुक। अंग्रीज़्यस मंज़ लेखनु आमुन्न रैना सौबुन्य यि किताब ति छि पॅज्यपॉठ्य अख मॉर्यमँज़ तु अशि दॉर हिश सौबुरन। अगरचु श्री रैना पेशु किन्य अख इंजीनियर छि, मगर युहुंद इख्तरॉयी, तखलीकी तु तहकीकी बितुर छु तिथय वॅन्य यिहँदिस अदबी मिज़ाज़स मंज़ ति दीदमान यिथु वॅन्य यिम पनुनिस इंजीनिरी पेशस मंज़ हर-फन-मौला छि। कॉशिरि ज़बॉन्य हुंद नोव सटॅडॉडाइज़्ड रस्मुलखत (standardised script) यिथु पॉठ्य यिमव पानु बेवाय पॉठ्य वरतोव तु तथ पोछर द्युतुख, सु छु कॉबिले सतॉयिश। प्रोजेक्ट ज़ान’ (Project Zaan) बारसस अँनिथ जरि यिमव कॉशिरि ज़बॉन्य हुंदिस वनि दामानस मँज़ीद चूनि।

देवनागरी लिपि मंज़ रैना सौबुन्य सौद्रवार अफसानु सौबुरन ‘कॅह नोन, कॅह सोन’ छि कॉशिरिस कहानीयन हुंदिस गँजीनस मंज़ ब्याख अख म्वलुल वस। ‘नवि ज़मानुक टुकु शुकर’, ‘वठ’, ‘तबदीली’, ‘शॅमीम’ तु ‘ज़ान द्यद’ छि पनुनि आयि पनुन्य हाल व अहवाल बयान करान। अथ सौबरनि छु यि इम्टियाज़ ति हॉसिल ज़ि अथ मंज़ छे ज़ान देदि हुंज़ स्व दासतान ति शॉमिल, य्वसु सानि पथ कालुच गमाज़ुय योत छनु, बॅल्लिक छे यि अख शहरे आशोब ति पेश करान। श्री रैनाहस छे ह्यस आगही तु अख तेज़ बसीरत। यिहुंज़ु कहानीयि छे अख समॉजी ऑनु, यथ मंज़ माशरुक कांह ति वाकाह गोट छुनु, बॅल्यकि छु वाज़ेह पॉठ्य अँछन ब्रॉह कुन यिवान।

‘नवि ज़मानुक टुकु शुकर’ कहानी छे तिमन समॉजी ना-हमवॉरियन, अदम तवोजुनस तु तलख हँकीकचन वुरुन तुलान, यिमु दूह पतु दूह संगीन नॅवियथ इख्तियार छि करान, तु छेकरस इनसानस त्युथ हरबु प्यवान पानुनावुन चाहे ‘यि बनि ति’ मगर थफ गछि व्वथुन्य। कहानी छि तन्ज़ करान ज़ि नवि एजि (age) मंज़ दॉखुल सपदनु पतु ति छुनु असि गामु शहरुक ब्यन ज़ोलमुत। वुनि ति छु सोन कलु सूदस मंज़ तु करज़स मंज़ बँडिथ, तु गॅरीबस छनु कांह शिनवॉय। जबु तु शुकर छि

अकि गॅरीब गरुक्य ज़ु बारुन्य। जब छु ख्वजस निशि कॉम करान तु शुकर छु वरफतार, हटरि हटरि फेरान। व्वन्य गव शुकर छु बाँयिस मुकाबलु स्यठाह चालाक। जबन छु आसान ख्वजस निशि कर्ज़ तुलमुत युस नखु न वसनकिस नॅतीजस मंज़ तु सूद खसनु किन्य स्यठाह बड्योमुत छु आसान। जब किथु कॅन्य वालिहे कर्ज़ नखु ? स्यठाह लाचार ओस। दर्री असना वोनुस कुंस्य बाँय, व्वलु व्वन्य करु चानि जायि बु नोकरी ख्वजस निश। अदु मतु बूज्यतव। शुकर्य कोर ख्वजस ति जि सु आव तालि किन्य लदनु। ख्वजस ओस साल द्युन, सु ति सिर्फ शहरु क्यनुय योत। मगर शुकर्य अनुनॉव्य गामुक्य सालस। गर्ज़ शुकर्य कोर ख्वजु सुंदिस प्रथ कुनि चीज़स वुल्ट। ख्वजु सुंद नेचुव ताम फाटुनोवुन क्वलि। नॅतीजु द्राव यि जि येलि ख्वजु वदनस खोत, तॅम्य वोन शुकरिस थफ तुलनु खॉतरु। ख्वजन अनुनोव जब नाद दिथ तु बोवुनस पनुन हाल। जबन दोपुस बु निमन वापस मगर कर्ज़ किथु कॅन्य वसि नखु। ख्वजन वोनस पॉसु गॅयिवु त्वही, मे तुल्यतव व्वन्य थफ। 'तालि किन्य युन', 'बुथिस रथ खसुन', 'अँदुर जॅट ह्यु अगादि गछुन', 'कलस प्यठ डून्य फुटरावुन्य', 'नलम ह्योन', 'हटरि हटरि फेरुन' बेत्रि मुहावरु छि बर महल तु कहानीयि अख जुव बख्शान।

'वठ' छि तिछ कहानी ख्वसु अँज्यक्यन मसनूयी खूनी रिशतन हुंज़न सैकि मंदोर्यन हुंज़ि पायदॉरी सरु खरु छे करान। अपुज़ हाव बाव, छोच्य वादु, नेबरिमी च़मि बास, हँदुर माय, अँदुर्य हुमजार, पनुन पनुन, पनुन्यन इज़ाह तु प्वतुल्यन पूजा, अँदुर्य छवचु कोन तु नेबुर्य नुंदु बोन हिशि कथु छे 'वठ' पॅरिथ वजूदस यिवान। अमा पोज़ तोमुलस मंज़ कनु फोल आसुन छु नागुजीर। बोय बाँयिस दुशमनाह तु बोय बाँयिस पुशि पनाहकि मिस्दाक छि रॅवी तु गाशु सख बाँय। मगर गाशु येति बाँयिस कम शॉल्य तारख छु हावान, तॅती छु सु तस पनुन असली रुफ ति हावान तु तस गरु मंज़ु कॅडिथ छुनान। आम तोर छि दुर काकनि पानु वॉन्य रतस रुकनि करान मगर येतिनथ छे गाशुन्य खानुदारेन्य आशाजी रॅवी सुंज़ि खानुदार्यनि रानी सुत्य रुत व्यवहार करान, तु स्व दिलु तसुंद रुत यछान। हेछिनाविहे मा रुनुय खानुदार्यनि, मगर खानुदारेन्य छे रुनिस हेछिनावान जि यि पज़ि नु करुन। ल्वकचारस येति बायन दून सलाह छु आसान, तॅती छु गाशु पनुनिस दिलि जिगर बाँयिस रॅवीयस वनान जि येति छु द्रोजर। येम्यक वरगु मतलब ओस रॅवीयस डुंगु बडावनु खॉतरु वनुन। 'वठ' छि अख ट्रेजेडी। स्व ट्रेजेडी ख्वसु माइग्रेशनि हुंदिस नॅतीजस मंज़ वाकाह सपुज़। रॅवी छु माइग्रेंट। सोरुय कॅह त्रॉविथ आमुत। गाशु छुनु माइग्रेंट। सु छु ग्वडय दिलि मंज़ अख वेल स्यटुलड इन्जिनीयर (well settled engineer) आसान। रॅवी छु कुत्य डेरु बदलावान। अख बोय डेरु डगु ह्यथ फेरान तु ब्याख पनुन स्वख आराम वुछान। 'यीतिस बॅडिस मकानस मंज़ ऑस ना म्यॉनिस आशू सुंदि खॉतरु जाय' - यि जज़बॉती कथ छे आशू सुंदिस मॉलिस तु माजि अँदरी चाख करान। ज़मानुचि टेछि नॅहजि सुत्य समजोतु कॅरिथ छु रॅवी सीनस पल थवान तु अकि दूह त्रेन मरलन प्यठ बनॉव्यमुतिस मकानस मंज़ सातु अचान तु खबर कुत्य कॉल्य मस नॅदरि गछान। 'ग्वतन गछुन', 'कुनि नु व्यचुन', 'नठ अचुन्य', 'दुर काकुन्यन सलाह', 'क्वकरस कुनी ज़ंग', 'नारस नरि दिनि' बेत्रि दॅप्य छि रैना सॉबनि ज़बॉन्य जिंदु जावेद बनावान।

'तबदीली' छे अकि तिथि इन्सटिट्यूशन (institution) अकास युस पनुनि इस्तेदादु तु मसबत नॅतीजव किन्य इन्सटिट्यूशनालाइज़ (institutionalise) गछान छि। मगर अथ ति छु

अकि सातु दकु दोल यिवान तु अकि तिथि मरहलु मँज्य प्यवान नेरुन येति प्रानि र्यवायचु फुटान छे तु नवि कॉयिम छे सपदान। कहानी हुंघ खॉलिक छि तबदीली हुंघ प्लाट बडु मैचुरिटी (maturity) सान गरुनस मंज कामयाब सपद्यमृत्य। महि काक याने महेश्वर नाथ छु ३७हन वॅरियन दफ्तरस पनुन खून दिवान। तँम्य छि कम दोर वुछमृत्य आसान। दफ्तरस सुत्य छु तस त्युथ लगाव आसान जि पनुनि मेजुक छ्योनमुत ब्लेजर ति छु तँम्य पनुनि गरि सुन्न पन अँनिथ ठीख आसान कोरमुत। मिस्त्तँर्य सुंजि जायि लँगिथ छु सु पनुनि नोकरी हुंघ पडाव सर करान करान ह्यड कलर्कस ताम वोतमुत आसान। तिमन हुंदि वरॉय हेकिहे नु दफ्तरुय चॅलिथ। तिमव कॉत्याह ऑस्य वुछमृत्य यिवान तु कॉत्याह वुछमृत्य गछान। हँमीद सॉब छु अफसर आसान, सालिग्राम छु चपरॉस्य आसान, खान सॉब छु तॉहसीलदार आसान, अँली मीर, रोशन लाल तु लाल सॉब हिव्य जिंदु किर्दार छि तबदीलीयि बदलाव अनान। महि काकुन दबु दबु, युस अथ दफ्तरस अँहरुनिस दँहरस खारान छु, तु यस व्वन्य पनुन शानदार करियर (career) अंद वातुनस कमय काल छु, छु अख काकुद रँटिथ वुछान। यि छु आसान अँम्यसुंजि तबदीली हुंघ आडर तु यि छुख आसान वरुमुल सूजमुत। कहानी छि पनुनिस मक्सदस वरगु पॉठ्य बावनस मंज कामयाब सपजमुत्त। वॅरीनु सान वरगु बावथ छे तबदीलीयि जोरदार कहानी बनावान।

‘शँमीमु’ छि सानि मुशतर्कु कॉशिरि कल्चर तु मिलुच्चारुच अख रोशन तु ताबनाक मिसाल। यि छे दून अलग मज्रहबन हुंघन दून गरन हुंज दासतान पेश करान तु तिथिस बहसस ज्ञायुन दिवान युस पथ वथ चलान छु आमुत तु अज ति अथ फ्युर दिनु यिवान छु। जनानु छि अँज्यकिस सॉरफियतु किस जमानस मंज ति अख disposable shaving blade, खसु शायद हर हमेशि यख्तियारु रोस रोजि। गौरी तु कॉशी नाथुन्यन छु सारु तु खँलील अहमदुन्यन सुत्य कुनुय। तिम छि अख अँक्यसुंद यिवान गछान। जमरुदुन्य कूर सनोबर, हँनीफुन्य कूर तमन्ना, शीलुन्य कूर रोजी तु रँफीकुन्य कूर मसरुदु गुल छि पानुवँन्य गिंदान द्रोकान। सारुन्य कूर शँमीमु तु गौरी हुंज कूर संतोशु छे व्वसु। बजि गँछिथ छु दनुवँन्य खांदर सपदान। तोशु छि राजु बाग सतीश इंजीनियरु सुंद गरु वातान तु शँमीमु व्यच्चार नागु किस मुशताक कॉलीन एक्सपोर्टरु सुंद गरु। शँमीमस छि कूर ज्यवान। तोशस छु लँडकु ज्यवान तु स्व छि खानुदारस सुत्य कलकत्ता वातान। मुशताकु छु शँमीमस तलाक दिवान तु शँमीमु छे व्वजारु गछान। शँमीमुनि कोरि बंटी छि नानि बुड्यबबस सुत्य सुत्य गौरी ति रछान। गौरी छि पनुनि हमसायगी मंज सारस तु शँमीमस प्यठ ति यि दँप्यजि ति जुव दिवान। क्वदरतुक करुन, शँमीमस छि सोकूलुच जिठ मास्टरबाय पनुनिस बॉयिस सुत्य नेथरु खॉतरु आमादु करान। शँमीमस छु शँरीफ सॉबस सुत्य खांदर सपदान, मगर सु छुनु बंटी रटान। शँमीमु छि हकुहस वातान। पतव लाकन छु शँरीफ सॉबस चरि बचु सुंदि मरनु एहसास गछान तु तिम छि यिकु वटु लसान बसान। कहानी छि दून गोशन ब्रॉह कुन अनान। बटु मुसलमान बकाये बाहम तु शँमीमस गुदरिथ युन। बे-ग्वनाह तु मोसूम शँमीमु छे हंगु तु मंगु हालातन हुंज शिकार बनान। जनानु नय आसिहे, शायद मा आसिहे खबर कति। अँकिस जनानि सुत्य छे ज्यादुती हर वक्तु रवा रुजमुत्त।

रैना सॉबुन्य आम फहम ज़बान छे अफसानन मंज जान पॉदु करान। मुख्तॉलिफ सिचूएशन (situations) पॉदु करनि तु तिमव मँज्य नेरुन या तिमन सुत्य deal करुन, यि सोरुय छु रैना

सॉबुन ह्वनर। गॉर ज़रूरी इबहामु तु नाम निहाद जॅदीद मिज़ाज़ुक बास दिनु वरॉय छि रैना सॉब समॉजी रॅविशु तु नफसियाथ च्नेनान तु महसूस करान। मे छु यि बासान जि येमि तलु कॅह पलु पेयि, सुय छु बेहतरीन। नतु जॅदीदियतु किस नावस प्यठ सॅकि लवर वुठुन्य तु हवहस ग्यल लायिन्य छे अख मुहमिल मश्क। रैना सॉबस छे प्लाटस प्यठ थफ। यिहुंज़न कहानीयन मंज़ छे यि गुंजॉयिश जि तिमु ह्यकन नावलन हुंद ति वरदन लॉगिथ। युहुंद सेक्यूलर secular नज़रियाह छु यिहुंदिस फनस ला महदूद बनावान। सु वख छुनु दूर येलि रैना सॉब बेहतरीन कहानी कारन हुंज़ि सबि मंज़ ग्वडन्यथ आसन।

‘ज़ान द्यद’ कथ छि अख सॅन्य कथ। अथ मंज़ छु सॉनिस तमहुनी वरासतस कुन सोन रहजान अकि नवि आयि वदि कडनु आमुत। अथ अफसानस प्यठ छु मे कॅह काल ब्रॉठ पनुन तबसरु अंग्रीज़्यस मंज़ ल्यूखमुत, युस सान्यन कॅहन रिसालन मंज़ शायह ति छु सपुदमुत। यि तबसरु छु अंग्रीज़्यस मंज़य यथ किताबि मंज़ ति दिनु आमुत।

Zaan Ded – A Critique

Post migration period saw Kashmiri literature reaching its new heights. This era created many writers of fame, whose literary creations not only proved to be contemporaneous in theme but these creations have been highly thought-provoking and up to the standard. Present genre of writers present a native, nostalgic and a real picture, that reflexes our great values and ethos. These writers have been playing a vital role in our cultural and social renaissance that marks a new beginning after ninety. We can not afford to forget the contribution of our writers to social and cultural development. A sensitive writer, with his non-partisan approach is not only an ambassador of peace and harmony, but he creates awareness among the masses. Writer like M.K.Raina sees around some corners and then reveals it in his medium. He wants to know his motherland, he wants to preserve the great culture that we had. But our ‘Vasmath’, the ‘treasure-trove’ is on the verge of losing its existence because of the onslaught of some forces. He is not at all pessimistic but a quiet optimist. An engineer by profession, Shri Raina is settled in Mumbai and has been actively involved in literary activities. He has been doing pioneering work in the field of Kashmiri literature and language. An editor of prestigious ‘Milchar’ and ‘aalav’ (KP Magazines), he is the main architect of the Project Zaan, a joint project of Kashmiri Pandits’ Association, Mumbai and Lalla Ded Educational and Welfare Trust. This Project is dedicated to preservation, propagation and dissemination of Kashmiri language, and cultural heritage of Kashmir. Besides co-authoring the ‘Basic Reader for Kashmiri Language’, Shri Raina has uncovered some valuable information about the Love Lorist and Mystic Poetess Arinimal.

Some books are also to his credit. His latest collection of short stories 'tsók módúr' too has got rave reviews, and now another much talked about Kashmiri short story 'Zaan Ded' has come to the fore. The story is dedicated to Project Zaan.

The whole story revolves around Zaan Ded, an imaginary character who holds Vasmath, which symbolises the great legacy inherited by aboriginal Kashmiris. Zaan Ded, as the name suggests itself, is a symbol of our great culture, civilization, uniqueness, justice and what not. Its symbolical expressions make it a distinct anecdote. A symmetrical short story Zaan Ded has got a big plot. Characters are lively and woven artistically. The writer has succeeded in his statement when he says, "Before starting a story, I spend a lot of time on fixing and structuring various aspects of my characters." It depicts the situation which forced the native Kashmiris to leave their homes and hearths for no fault of theirs. Its different stages describe different aspects of Kashmiri psyche. The peaceful co-existence among communities is defined with examples. For instance, "Qadir Kak could forget his meals but he would never forget *Phalahar* (fruits) for Zaan Ded Ali Mohd. would never forget to get special gifts for Zaan Ded ... etc. etc. A plain story without any kind of ambiguity, attracts reader's attention in total. However, brevity at some stages could have generated more curiosity. Chronology of events is like beads and good treatment has been meted out to characters. It does not seem that the story has been devised but it speaks itself, thus making it a worth reading short story. As regards the language, colloquial usage has made this story more interesting and catchy. Typical Kashmiri words, proverbial expressions and spontaneous flow are other highlights of the story. 'Kasheer' and 'Kashmiriyat' seem to be the favourite subjects of Raina. His short story collection 'tsók módúr', Zaan Ded and other literary works mainly focus on 'Kasheeriyat'.

Zaan Ded is a tragedy, a human tragedy, that actually portrays the hapless and wretched life of people, who are being hounded out from their own land. These hapless people going through a great trauma never show any pessimism but wait for the 'Punim' to come. 'Punim' symbolises optimism. The people who fled to Bharatpur are compelled by circumstances to give in to people, who enjoy the rule. Zaan Ded takes society with her, that is around and individual reality of the characters has been taken seriously. Narrative in Zaan Ded is a class of its own, howsoever it needs contemporary style that has come to stay now and is inevitable. Nevertheless, the narrative has shown boldness and this boldness has proved the writer's sincerity in giving vent to his feelings and emotions. The

portrayal of real-life tragedy, especially with the similes, maxims and dictums, has brought before, a live picture that still haunts us. Zaan Ded, being nostalgic, is a mix of all kinds of emotions.. It touches a hidden chord with powerful emotions. Globalisation has been the greatest enemy of our culture. It has made our societies consumerists. Culture has become only a product, which does not have any identity. If this trend continues, then the day is not far away when we shall be stripped off of this heritage and it will be difficult to percolate our great cultural legacy to our younger generations. Zaan tries her best to preserve it, come what may. Its simple diction and sensuous language make it worth reading. Shri Raina deserves commendation for his powerful insight.

- १३/४९७, लोधी कॉलोनी, नई दिल्ली ११० ००३

टेलीफोन: ०११-२४६३५१९७

20 November 2005

नवि ज़मानुक दुक़ शुकर

फुट्यमुत्यव क्वठ्यव द्राव जब ख्वजु सुंदि गरि पयठ वापस। शाम ओस सपद्योमुत मगर तसुंज मस्कू सूरथ ऑस साफ यिवान बोज़नु। जबस ओस ज़ंगव ति जवाब द्युतमुत। फीर्य फीर्य ओस तस सु हिसाब काकुद अँछन तल यिवान युस तँम्य पनुनि पानु ख्वजस ब्रोठ कनि ज़ॉलिथ छुन। जबस बास्यव पनुन पान गीरान तु थख दिनु खॉतरु ब्यूठ सु अकिस कनि पलस प्यठ। ख्वजु सॉबुन यि वनुन जि 'बु मा छुसय ज़िमवार, यि खातस लीखिथ छुय ति छुय द्युन' तु तमि पतु असन खंगालु त्रावुन ओस तस बराबर दिलस श्राक़ वालान। जब लोग पनुन वछ चेटनि तु वदनि।

अमु डारुन्य नैचिव यूसफन येलि जब अँकिस कनि पलस पयठ शॉगिथ वुछ, तँम्य दिचुस ज़ीर। जबु गव हुशार। तस ऑस वदान वदानुय नैदुर पेमुन्न। यूसफन द्युत जबुनिस ड्यकस अथु। जबस ओस क्व-वरु तफ। मसाह मसाह वातुनोव यूसफन सु गरु। जबन थोव माजि निशि सौरुय कसु चूरि मगर शुकरिस पनुन हाल बावनु खॉतरु गव बे करार। शुकर ओस वुनि ति नैचिथ फीरिथ गरु वापस यिनय।

शुकरिस प्रारान प्रारान पेयि जबस अकि लटि बेयि स्व सख्ती याद ख्वसु तँम्य ग्वरबथ आसनु किन्य ल्वकचारु प्यठ वुनिस ताम तुजमुन्न ऑस। जबस ओस मोल ल्वकचारय मूदमुत तु पानस वरॉय ऑस्य तसुंदिस गरस मंज़ बेयि ज़ु बॉन्न, बुडु मॉज तु कूस बोय, यस शुकर ओस नाव। जब ओस मोल मरनु प्यठय ख्वजस निश नोकरी करान। दपान ख्वजु ओस सख वेंमीनु, ठीख तिथय पॉठ्य, यिथु पॉठ्य प्रॉनिस शुकरु सुंद ख्वजु ओस। ज़िंदय वालिहे मोहनिविस बस्तु। सुबु प्यठु शाम ताम ओस जबस कॉम वेंर्य वेंर्य रथ वसान, मगर ख्वजस निश नु मुजरॉही केंह। ख्वजु यूत तनखाह जबस दिवान ओस, तमि सुत्य ओस बडु मुश्किली सान तसुंद गुज़ारु सपदान। जबस ऑस अख ज़िठ बेनि ति, यस खांदर वेंरिथ ओस। अँमिसुय बेनि हुंदि खांदरु खॉतरु ओस जबन ख्वजस निशि कर्ज़ तुलमुत। यि कर्ज़ ओस जबस गोमुत वारियाह काल नखु वालान, मगर कर्ज़स पयठ सूद तु सूदस प्यठ सूद खॉर्य खॉर्य ओस नु यि रकम नखय वसान। अँज्युक दूह ओस जबुनि खॉतरु स्याठाह खराब। सुबहय कामि प्यठ ख्वजि बायि हुंज़ ब्यवॉरी तु तमि पतु ख्वजु सॉबस ब्रोठ कनि यि हॉदिसु। जबस आव बेयि सु सौरुय वाकह अँछन तल

जबु येलि ख्वजु सुंदि गरि कॉम वेंरिथ वापस ह्योतुन नेरुन, ख्वजु वुछुन असवुनि बुथि। जबस गँयि ह्यमथ तु दोपुनस, 'बु हज़ वुछुहा पनुन हिसाब।' ख्वजन अनुनोव खातु तु होवनस। खातस मंज़ ओस अँकिस वर्कस प्यठ जबुन कर्ज़स प्यठ तुलमुत पाँसु तु तथ प्यठ खोरमुत सूद दर सूद लीखिथ। बेयिस अँकिस वर्कस प्यठ ओस सु रकम लीखिथ युस जबु वारु वारु वापस ओस करान, मगर यि वरुख ओस अलगय। यि ओस नु खातु मंजुक वरुख केंह। शायद ओस ख्वजन यि वरुख यि सूचिथ अलगय थोवमुत, जि 'येलि ज़रूरथ पेयि, चँटिथ छुनु त्रॉविथ।' वुनि ओस जबु हिसाब वुछानुय जि ख्वजन दोपुस जेजीर अन। जबु गव जेजीर अनुनि तु यपॉर्य गव यि काकद वरुख

हवाह सुत्य वुडिथ। जब आव जेजीर ह्यथ वापस तु लोग अथ त्योंगुल करनि। येलि नु कुनि तँरीक त्योंगुल तयार गव, जबन तुल योहय काकद वरुख, युस व्वन्य बरस निशि ओस वोतमुत तु न्यून याशाह वँरिथ ज़ॉलिथ। यीतिस कालस जबस ज्वन प्यव, तीतिस कालस ओस काकुद दँजिथ म्वकल्योमुत। यि हिसाब ओस न ख्वजन बेयि कुनि जायि लीखिथ थोवमुत तु न जबन। जबस व्वशल्यव बुथ। ख्वजस पृष्ठुन, 'व्वन्य क्या हज़ बनि?' ख्वजन ह्योतुस नलम। दोपुनस, 'बु मा छुसय ज़िमवार। पानय ज़ोलुथ पनुन काकुद। यि व्वन्य खातस लीखिथ छुय, ति छुय सोरुय द्युन। म्यॉन्य मा छे गलती? पानु कोरुथ कार, बु क्याह करय?' यि वँनिथ त्रोव ख्वजन असन खंगालु। जबन ह्योत वदुन मगर ख्वजन मोनुस नु कँह। दोपुनस, 'खातु गव खातु, अथ कुस खसि प्यठ।' जबु प्यव ज़न वँसिथ। ड्यकस दिद्युन चँड, 'व्वन्य किथु वस्यम यूत कर्ज नखु?' अमि पतु द्राव सु फुट्यमुत्यव क्वठ्यव गर कुन वापस।

शुकर आव ज़ीर्य राथ क्युत गर। यिवुनुय वँन्य जबन तस सौरुय दँलील। दपान शुकर ओस नु प्रॉनिस शुकरुन्य पॉठ्य बेकुल कँह। यि ओस चालाख तु हरफिचल। हालांकि करान क्रावान ओस नु यि ति कँह, सिर्फ ओस हटरि हटरि फेरान। बॉय सुंदि हदु खोतु ज़्यादु टाठिन्यारु किन्य ओस सु ज़्यादय पहान कलस खोतमुत, मगर तसुंदि खॉतरु ओस जुव दिनस ति तयार। जबुन बुथ वुछिथ छेन्य शुकरिस वॉलिंज। तँम्य सूंच, 'बॉयिस म्यॉनिस वोथ अज़ ताम रथ। व्वन्य पज़ि मे अँमिस मदद करुन।' दोपुनस, 'बायि, अँज्यकि प्यठ कर च़ु आराम। व्वन्य करु बु चानि बदलु ख्वजस निशि नोकरी तु बुय वालु चोन कर्ज नखु।' जबन पृष्ठुस, 'च़ु किथु पॉठ्य वालख यूत कर्ज नखु? प्यठ छुय ख्वजु सख वँमीनु तु च़े छय नु ज़ांह काँसि हुंज नोकरी वँरमुच्युय।' शुकर्य वोनुस, 'यि कुस्मतस आसि, ति सपदि। मे छुनु व्वन्य चोन तकलीफ वुछुन बरदाश गछान।' जबन वँर छवपु।

बेयि दूह गव जबु ख्वजस निश। ख्वजु संज़ि जेजीरि त्रोवुन त्योंगुल तु रूदुस फ्वखाह फ्वखाह दिवान। ख्वजन वोनुस, 'बु छुस सॉचान म्योन कर्ज कर वालख च़ु नखु?' जबन वोनुस, 'मे नु हज़ बासान ख्वजु सॉब ज़ि बु क्याह ह्यकृ यि कर्ज व्वन्य ज़ांह नखु वॉलिथ। ह्यकथ ति हज़ छम म्वकलेमुच़। अख सलाह हज़ ओसुम अगर च़ु मानख।' ख्वजन वोनुस, 'क्योहो? वनान क्याज़ि छुख नु?' जबु वोथुस, 'म्योन ल्वकुट बोय शुकर हज़ छु ब्यकार। रटहन न हज़ सुय पानस निशि। म्योन कर्ज ति वालि नखु तु पानु ति हेछि च़े निशि कँह।' ख्वजन वोनुस, 'सु क्वसा काँम करि? दपान हय तँम्य छनु ज़ांह ज़िन्य ख्वन ति तुजमुच़।' जबन वोनुस, 'हतु हज़, जेजीरि आब करनुस ति लागि ना? खाहस प्यठ बतु सारनस ति लागि ना? ज़ंगन म्वठ दिनस ति लागि ना? यि च़ु वनुहस, ति हज़ करि। तव पतु च़े ब्रॉह कनि क्या हज़ फोर्यस?'

ख्वजन सूंच, जान गव। जबस ति रूज़ नु ह्यकथ कँह। बोय छुस ल्वकुट वुनि। दाह पंदाह वँरी नेरनस मज़ु सान। 'दोपुनस, 'अदु सुय सोज़तन। सु हय गव असि पनुन गोबुर। अख्तुय च़लि मे ति पोत फिकिर। मगर अख वादु पेयी करुन।' जबन पृष्ठुस, 'सु क्या हज़?' ख्वजन वोनुस व्यस्तॉरिथ, 'वादु पेयी करुन ज़ि सु नेरि नु येति तीतिस कालस, यीतिस कालस नु चोन कर्ज सोरुय नखु वालि।' जबन वोनुस, 'मंज़ूर हज़ छुम। मगर अख कथ हज़ छय म्यॉन्य ति बोज़न्य। च़ु ति न हज़ वँड्यज्यन

नु सु तीतिस कालस नोकरी मंजु यीतिस कालस नु म्योन कर्ज नखु वसि।' दशवयव कोर यकरार। अमि पतु द्राव जबु ख्वश गॅछिथ गरु कुन वापस।

शुकुर वोट ख्वजु सुंद गरु तु लोग कामि। कुजा डालु मॉरिथ ख्योन तु कुजा अथव कॉम करुन्य। ख्वजन ति ह्योत अॅमिस ज़्यादय पहान दालु वालुन। शुकुरिस आव वारियाहि लटि जॉरिस प्यठ मगर बाँय संजु हालत वुछिथ कॅरुन छ्वप। शुकुरिस प्यव ज्वन। सूंचुन, तिछ कांह सॅबीलाह गछि बनुन्य, युथ ख्वजु साँब मे पानय नोकरी मंजु कॅडिथ छनुनस प्यठ मजबूर सपदि। शुकुर रूद रॉत्य रातस साँचान। सुबहस गाश फवलनस प्यठ ज़ोतेयि तस अॅछ। अख असन खंगालाह त्रोवुन तु द्राव कामि।

शुकुरिस गॅयि व्वन्य ज़ु रयथ ख्वजु सुंदि गरि कॉम करान। ख्वजु ओस हनाह मदु वोथमुत। तस ओस नु तरान फिकरिथी जि शुकुरिस किथु पॉट्य वालु पोस। शुकुर ओस प्रथ कांह कॉम वुलट करान, ठीख तिथय पॉट्य यिथु पॉट्य प्रोन शुकुर करान ओस। मगर अख फर्ख अॅस। प्रोन शुकुर ओस करान बेकुलॉजी सुत्य, तु नोव शुकुर ओस करान अक्लमॅदी सुत्य। वनान अॅसिस ओम दूद अन, अनान ओस ज़ामुत। वनान अॅसिस वारि आब द्युन, तु दिवान ओस गुपुनन। दपान ओसुख, 'हतु हज़, वारि मा छे त्रेश लगान। मे सूंच त्वहि गॅयि वनुनस मंजु गलती। त्रेश छि लगान गुपुनन। मे दिच्च तिमनय।'

युथुय ख्वजु साँब तु ख्वजु बाय पानुवॅन्य कॅह कथ करुहन, सु ओसुख ब्रॉटु कनि गछान लॉरिथ। अॅकिस रच्चि ओस नु ओर या योर डलान। बाँजु ज़ु ख्वसु कथ अॅमिस थी करुहन, यि ओस गामुकिस गामस यिवान बोज़ुनॉविथ। ख्वजु अगर काँसि गामुकिस खलाफ कथ करिहे, यि ओसुख तस चोर कथु रलॉविथ बोज़ुनॉविथ यिवान।

अकि दूह गॅयि ख्वजु तु ख्वजु बाय ऑठन दहन दूहन प्यठ शहर। शुकुर्य लोग यपॉर्य मकानस नखु कूल खनुन। यीतिस कालस ख्वजु वापस आव, शुकुर्य ओस थोवमुत चोर गज़ सोन कूल खॅनिथ। ब्रांदस सुत्य आसनु किन्य आसु ब्रांदचि सारेय कनि क़ुलिस मंजु पेमच्च। ब्रांद ओस नु व्वन्य कुनी। येलि ख्वजन तु ख्वजु बायि वुछ, तिमन प्यव वेह। ख्वजन दोपुस, 'पेया नबु त्रठ। यि क्योहो कोरुथ?' शुकुर्य वोनस, 'हतु हज़ मे क्याह कोर? मे कॅरुमय पनुन्य किन्य जाँनी। येलि च़ु शहर द्राख, च़े वोनुथ न हज़ ख्वजु बायि जि नार लगनु वख्तय अॅस्यजि नु कूल खनान। मे थोवमय ग्वडय कूल खॅनिथ। नारु विजि गछी आसाँनी।' ख्वजस दोद माज़। तस लोग अगुनस दूगन पाँसु सु कूल वापस बरनस।

अकि दूह आयि ख्वजु संजु बेनि ख्वजस निश। दरवाज़स प्यठुय रॅट स्व शुकुर्य तु हेतिनस अकि अकि पलव वुछिन्य जि अॅदुर्य मा छिस। तमि लॉज क़ख। ख्वजु आव दवान दवान तु पृष्ठुनस क्याह गव? बेनि वॅनिस साँरुय दॅलील। ख्वजस खोत शरारथ तु कॅरुन शुकुरिस ब्यवॉरी। शुकुर्य वोनस, 'हतु हज़, मे कथ छुख नसख करान। मे वुछमस पलव मा छिस अॅदुर्य। राथ ओसुख ना च़ु पानय वनान जि यि छि अॅदुर जॅट हिश अगादि गछान।' ख्वजस ज़न तु प्यव असमान प्यठु। बेनि ब्रॉह कनि गॅयस रुसवॉयी। मगर क्याह करिहे, नारस दियिहे नरि। शुकुर ओस फ्यार कॅरिथ गोमुत।

अकि दूह आयि ख्वजु बायि हुंजु मॉज। शामस युथुय तिम बतु खेनि बीठ्य, शुकुर्य अॅन्य डून्य तु कॅन्य, तु थॅविन ख्वजस ब्रॉह कनि। ख्वजन पृष्ठुस, 'यि क्योहो छुय?' शुकुर्य द्युतुस जवाब, 'च़ु

ओसुख नु हज वनान, यि छि कोरि कल कडान। अँमिस फुटरावु बु डून्य कलस प्यठ। मे दोप च्ने मा गछिय पतु मँशिथ, तमी थँविमय ग्वडय अँनिथ।' ख्वजु बायि खोत रथ बुथिस। स्व वँछ खानुदारस यि दँप्यजि ति मार दिनि। तसुंज माँज द्रायि बुथि बुथि दिवान वापस। गरस मंज वोथ फसाद।

ख्वजस आँस गामु वाल्यन हुंज सख नफरत। दपान ओस यिम छि सिर्फ तमि वख्तु यिवान येलि केँह हाजथ आस्यख। मतलबु वरॉय छिनु यिम मॉलिस सुत्य ति कथ करान। अदु येलि हारु आसुनख व्वजुम बकार, तमि सातु छि बलायि लगनि यिवान। अख गँयख हारु निनि, बेयि गोख त्रेशाह तमोकाह चथ नेरुन। दपान ओस, यिमन हरगाह पिलि, चादर कांगुर ताम निन।

शुकुर्य आँस यि कथ ति गामु वाल्यन ताम वातुनॉवमचु। दोपनख, 'ख्वजु छुवु लागान चूर हांछ। दपान छुवु म्यानि सारेय चादर तु कांगुरि छि गामु वाल्यव चूरि नीमचु। अखतुय ओसवु दपान जि यिम वातन नु शहरुकिस इनसानस ख्वर छलनस ति।' गामुक्यन लँज यि कथ दिलस। चोर पाँछ गामु जिठ्य येलि ख्वजस सुत्य अथ मुतलिक कथ करनि आयि, ख्वजस चायि तुर। दोपुनख, 'हा, यि हज छुवु गोब बोजान। त्वहि छुवु ना खबर बु कोताह यजथ छुस पनुनिस गामु बाँयिस करान। मे निश गव ग्वडु गामुक तु पतु शहरुक।' गामुक्य गँयि यि कथ बूजिथ मुतमयीन मगर ख्वजस आयि नु रातस नँदर। सुबहस वँथिथुय थँव्य तँम्य मार दी दी शुकुरिस डँकरु वँरिथ।

अकि दूह कोर ख्वजन शहरुक्यन बापार्यन साल। वाजुवान आव लागनु। शुकुर गव चूरि चूरि तु आव गामुक्यन ति साल वँरिथ। दोपुनख ख्वजस छु जल्दुय शहर गँछिथ ब्याख नेथुर करुन तु अँथ्य खुशी मंज छु तँम्य सॉरिसुय गामस साल कोरमुत।

शामस युथुय शहरुक्य बापॉर्य आयि, तिमन सुत्य आयि गामुक्य ति बतु खेनि। ख्वजस गव हेह। इन्तिजाम ओस वुहन हुंद तु ख्यनु वॉल्य आयि हथ। वाजुव दित्य बुथि बुथि। ख्वजन प्रुछ शुकुरिस। तँम्य वोनस, 'चु ओसुख ना हज प्रथ सातु वनान जि मे निशि गँयि ग्वडु गामुक्य तु अदु शहरुक्य। मे दोप च्ने गँयी गामुक्य मँशिथुय। तवय गोसख बु वनुनि।' ख्वजस दोद माज। दोपुनस, 'मगर च्ने वँम्य वोनस मे छु नोव खांदर करुन?' शुकुर्य वोनस, 'हतु हज, चु मा ज्ञानख ज्ञांह डबल पाँसु ति खरचावुन। अज येलि च्ने वाजुवान लोगुथ, मे सूच ती आसि।'

ख्वजु सुंद्य बाँच ज़ु आँस्य तालि किन्य आमत्य। शुकुर ओस प्रथ दूह कांह नतु कांह अतुर वँरिथ गछान। मगर तोति सूच तिमव जि कडिथ छुनुन गव नु जान। अख गछि सोन सोरुय पाँसु क्वलि, बेयि बलायि अनुस, तोति लागि वख्तु विजि दांदु बदलु अलबानि।

अकि दूह आव सँर्य पेट्य सँहलाब। ख्वजु सुंदिस बचस खोत तफ। शुकुरिस वोनस यि नितन हँकीमस निश तु सु वालिहेस तफ। शुकुर्य सूच यि क्वसु बँड कथ छि? मे छना पताह तफ किथुवँन्य छु वसान। तँम्य न्युव बच हँकीमस बदलु क्वलि प्यठ तु द्युतुनस तुरनिस पॉनिस मंज डुंग। अगर नु आँशिरिस नजर पेयिहे, बच गछिहे मँरिथ। ख्वजन युथुय यि बूज, सु गव देवान। हुय वोथ। दोपुहँस यि क्वसा त्रठ छुनिथ? जवाब द्युतुनख, 'तु मे छा हज पताह? ओतरु वोनस नु हज च्नेय जेजीरि छु तफ खोतमुत। यि अनतन क्वलि मंजु डुंग दिथ तु अथ वसिहे तफ। मे दोप यिथय वँन्य छु सारिनय तफ वसान।' ख्वजन तु ख्वजु बायि कोड पानस मस। दोपुहस, 'असि न बा छुख नु व्वन्य बकार।

असि बख्खातु।' मगर शुकर द्राव नु। दोपुनख, 'बु कोत हज़ नेरु ? तुहुंद कर्ज़ कुस हज़ वालि नखु ? मे हज़ करि बोय डँकरु।'

ख्वजन दोप यि नेरि नु यिथु पॉठ्य। जब ओनुख नाद दिथ। ख्वजन वोनुस, 'हतो यारु! ख्वदा बख्खान, च़ु ति बख्खा। पाँसु गँयी च़ेय। यि बलायि नितन गरु वापस।' जबन ऑस सॉरुय दँलील गवडय बूजमुन्न। दोपुनस, 'अद हज़, येलि च़ु वनान छुख तु निमन वापस। मगर यिनु हज़ पतु मे ज़ांह वुगरॉय करख।' ख्वजन दोपुस, 'हता सौरुय गौय च़ेय। असि तुलतु थफ।'

जबु द्राव ख्वश गँछिथ। बाँयिस वॅरुन अथस थफ तु द्युतुन गरु कुन कदम। वति पकान पृछुस शुकर्य, 'बेयि मा छुय काँसि हुंद कर्ज़ ?' जबन रोट बोय नालुमति तु वोनुनस, 'बस, व्वन्य् छुम चोन कर्ज़। सु मा वस्यम ज़ांह नखु।'



वठ

साड त्रे मरलु जायि प्यठ बनोंव्यमतिस् मकानस मंज च्वाव रवी जी सातु मुताँबिक। नव फुट खोल तु दँह फुट ज्युठ ड्राईंग रूम ओस नंगु लबु कँरिथ वुनि ति ना तैयारुय, मगर रवी जीयस ओस नु मजीद प्रारुनस वार। येमि पतु ओस नु दून र्यतन साथुय तु रानी आँस नु वांगुजवँरिस मंज बेयि अख दूह ति कडुनस तैयार। आशू ओस वुनि सतु वुहुरुय, मगर पनुनिस मकानस मंज अचुनस ओस सु ति स्यठाह बेताब। खदुवय रवी जीयन पनुन सौरुय सामानु टांगु रेडस मंज बँरिथ ओस ओनमुत, मगर पनुन किताबु बैग तु ल्वकट इलेक्ट्रॉनिक हैंड गेम, यिम जु चीज़ आँस्य आशूहन पानय तुलिमुत्य।

सुबहुचि सथ आसु बजेमच्च। गरुक सौरुय सामानु ओस वुनि ति ब्राँदस प्यठ तंदल खॉरिथ। नँविस ड्राईंग रूमस मंज येलि रवी जीयन कदम त्रोव, तस बास्यव सौरुय दुनियाह अपुज तु सिरिफ पनुन्य यि ल्वकट म्वकट जाय पँज। सीमठ फर्शस प्यठ वाहरोव रानी छँलिथ तु छोकिथ मसनंदु। अँथ्य मसनंदस प्यठ द्युत रवी जीयन नरि वाहरॉविथ डुलगॉड। बस, अमि पतु रूद नु तस ह्यसुय जि सु कति ओस तु कोत वोत। रानी हुँदि वुजनावनु सुत्य येलि तस नँदुर खुलेयि, तमि सातु आसु सुबहुचि नव बजेमच्च। रवी जीयस बास्यव जि कँशीरि नेरनु पतु आयि तस ग्वडनिचि लटि पँज्य पाँठ्य नँदुर। स्व नँदुर, येमि खॉतरु सु आँठन वँरियन तरसान रूद। तँम्य दिन्न ओरु योर नज़र। मसनंदु लूठ थोद तुलिथ कोरुन सीमठ फर्शस तिथु पाँठ्य म्युठ, ज़न तु सु पँज्य पाँठ्य तसुंद जनथ ओस। रानी आँस यीतिस कालस बेयि चोकस मंज च्चामुच्च। गुरु जी ओस पूजायि खॉतरु कहि बजि यिनु वोल तु वुनि ओस सौरुय करुनय। रानी ओस यीतिस कालस सिरिफ चोकु छोलमुत तु बानु माँजिमुत्य। अमि पतय आयि रानी हुँज बँय काकन्य किशनु तु बोय शिबन जी। रवी जीन्यव नँजदीखी आँशुनावव मंजु आँस्य तिमय यॉत्य जेमि रोज़ान। यीतिस कालस रवी जीयन नेबरिमि नलकु प्यठु बालटीनु बालटीनु पोन्थ अँनिथ स्टीलुव ड्रम बोर, तु ब्राँदु प्यठुक सामानु अंदर च्चॉनिथ ताह ब ताह लोग, तीतिस कालस कोर रानी तु किशुनन बतु स्युन तयार। शिबन जी द्राव यिवान यिवानुय बेयि बाज़र। पूजायि हुँद सौरुय सामानु जमाह करुन ओस तँस्य मटि तु अख जु चीज़ आँस्य तस वुनि रूद्यमुत्य अनुनय।

गुरुजी आव बराबर वख्तस प्यठ। तसुंद सौरुय सामानु ओस शिबन जीयन सजाँविथ थोवमुत। गुरुजीयन हेच्च पूजा करुन्य मगर रवी जीयस ओस दिलस प्यठ बोर। गाशु तु आशाजी आयि नु अथ मोकस प्यठ कँह। हालाँकि रवी जीयन तु रानी ओस दूशवुन्य बाँचन यिनु खॉतरु ज़ारु पारु कोरमुत, मगर तथ द्राव नु मतलब कांह। रानी द्युत रवी जीयस तसलाह जि सौरुय सपदि ठीख। बोय छा ज़ांह बाँयिस निशि छ्यनान। मगर रवी जीयस गव नु दिलस तसलाह। तस ओस पूरु पाँठ्य बिहिथ जि अँजिकिस दूहस प्यठ नु यिथ द्युत गाशन हॉविथ जि तस छनु बाँय सुंज ज़रुथ। रवी जीयुन मोल बाँजी साँब ओस ग्वडय गुज्योमुत तु अज़ बास्यव रवी जीयस पूरु पाँठ्य जि सु गव अज़ दोयिमि लटि माँल्य यतीम। गाशु ओस तस ज्युठ बोय तु माँलिस पतु बराबर माँल्य सुंघ पाँठ्य।

पूजा म्बकुलॉविथ लोग सारिवुय बतु ख्योन। मगर रवी जी ज़न ओस नु यथ आलुमस सुत्य। तस गव अमि कथि हुंद ति स्यठाह द्बख ज़ि गाशन द्युत नु सनीयस ति जोम यिनु, हालांकि सनीयन ओस अमि खॉतरु वदन वान लोगमुत। हँकीकत ऑस यि ज़ि सनीयस ओस रानी तु पापाहस यानी रवी जियस सुत्य सख लगाव तु रानी ति ओस सु आशू सुंदि खोतु ज़्यादु टोट।

रवी जी गव बतु थालस मंज़ अथु वालान वालानुय ग्वतन। तस ओस सु द्बह पूर पॉठ्य याद येलि गाशु इंजीनेरी पास वॉरिथ दिलि मंज़ नोकरी करनु बापथ गरि द्रायोव तु तँम्य लाजोव बाँय सुंदिस दूर गछनुस प्यठ वदन वान। सु ओस पानु तमि सातु सिरिफि दँहिमि जमॉन्न परान। यि ओस सन कुनवुह शथ तु अर्सतथ तु तमि वख्तु ऑस्य तिम वँशीरी रोज़ान। सु सीन याद करान करानुय वोत रवी जी सिरीनगर।



अज़ मोन नु रवी जीयन कुनि तँरीकु सकूल गछुन। गाशस ओस दिलि नेरुन तु रँवी जीयस ओस बाँय सुंद सख फेरान। बाँजी साँबस सुत्य सुत्य द्राव सु ति टूरिस्ट सेंटर, येति प्यठु गाशस बसि मंज़ गवडु जोम ओस गछुन। गाशस ओस पानस ति गरु निशि दूर गछनुक मलालु मगर दिलि गछनुक तु तति नोकरी करनुक चाव गव मलालस प्यठ हॉवी। नेरनु वख्तु रोट गाशन बोय नालु मति। बस हेचुन नेरुन्य तु गाशन त्रोव रवी जी यलु। अँछन मंज़ ओश ह्यथुय खोत सु दवान दवान बसि मंज़। यीतिस कालस बस अँछव निशि दूर गँयि, तीतिस कालस रूद रवी जी तथ मुदय गँडिथ वुछान तु वदान। बडु मुशिकली सान वातुनोव बाँजी साँबन सु वापस गरु।

गाशस ओस असली नाव ओमकार। तस मीज दिलि वातनु पतु अकी रेत्य नोकरी। दिलि ऑस तस मास रोज़ान तु यीतिस कालस गाशु कुनुय ज़ोन ओस, तीतिस कालस रूद सु मासि हुंदी गरि। द्वयि वुहुर्य सपुद तसुंद खांदर बडु दूम दामु सान। ज़नानि ओसुस नाव आशा जी तु स्व ति ऑस जान पँरमुन्न। खांदरु पतु ह्योत गाशन दिलि मंज़ुय अख प्रोन मकानु मँल्य। दून वँरियन पनुनि तनखाह मंज़ु जमाह कॅर्यमति पाँसु अलावु प्यव तस कँह कर्ज ति तुलुन। मगर सारिवुय खोतु बोड मदद कोरुस मॉल्य। गाशु ति द्राव नु ला खॉर कँह। मकानस मरमथ वँरिथ बनॉव्य तँम्य तथ बराबर ज़ु स्यट। अख पनुनि बापथ तु ब्याख बाँयिस बापथ। 'खबर छा, बँल्यकि पगाह सु ति दिली आव नोकरी करनि। बेयि बुजिरस मंज़ कति दिमव मॉलिस माजि खखुर! द्बशवय बाँय आसव यिकुवटु, तु मॉलिस माजि ति रोज़ि दिलस शेहजार!' आशाजी ति कोरुनस अथ कथि ताँयीद, तिक्याज़ि तस ति ऑस खबर ज़ि बाँजी साँबन छु पनुन सोरुय जमाह कोरमुत पाँसु टूंक तिमनुय हवालु कोरमुत। नतु कति ह्यकहँन तिम यिथिस द्रोजिरस मंज़ दिलि मकानु ह्यथ। मॉलिस माजि क्युत ति आव अख अलग कमरु तु पूजायि कुठ तयार करनु।

आशा जी ज़ाव सनी तु तसुंद ज़्योन द्राव गाशुनि खॉतरु स्यठाह फ्रून्न। तमी वँरियि गँयि तस प्रोमोशन। बाँजी साँब ओस यछान रवी जीयस ति इंजीनेरी करनावुन्य, मगर तस ऑस नु तथ सुत्य दिलचस्पी। सु ओस यछान टीचर बनुन। ग्रेजुवेशन वँरिथ बनेयि तस सिरीनगरसुय मंज़ नोकरी। यि

ओस सन कुनवुह शथ तु त्रेयिशीथ। अरशीथस मंज सपुद रवी जीयस खांदर। गरस मंज आयि न्वश तु गरु आव खुशियव सुत्य बरनु। बॉजी सॉब तु काकन्य जिगुर ऑस्य नु कुनि व्यचान। बॅड न्वश आशा जी ऑस खांदरु पतय दिलि द्रामुन्न, येमि किन्य तिमन दून, खास वॅरिथ काकन्य जिगरि पनुन्य अरमान दिलस मंजुय रूद्य। ल्वकुट न्वश अँनिथ द्राव तस मुस तु तस बास्यव पनुन पान पूर पॉठ्य राजु बाय। मगर क्वदरतस ओस नु तसुंद बहार ज़्यादु कालस वुछुन मंजूर। स्व सपुज रवी जीनि खांदरु पतु ऑठी रेत्य स्वर्गवास। गाशस तु आशा जी प्यव तसुंद क्रिया कर्म करनु बापथ दिलि प्यठ बेयि युन।

गाशुनि वापस नेरनु पतु गव तसुंद कमरु बिलकुल खॉली। काकन्य जिगुर येलि ज़िंदु ऑस, स्व ऑस कुनि कुनि वख्तु तथ कुठिस मंजु ब्यहान तु गाशुनिस फोटुवस तु तसुंदन चीजन मुदय गँडिथ वुछान। तमि सुत्य ओस तस बासान ज़ि नेचुव छुम पानस ब्रॉठु कनि। तसुंदि गुजरनु पतु रूद सु कमरु बंदुय। बॉजी सॉबन द्युत नु सु कमरु बेयिस काँसि ति इस्तेमाल करनुक इजाज़थ। रवी जीनिस खांदरस प्यठ ओस तथ नवि सरु रंग रोगन करनु आमुत तु दारि दरवाज़न हुंद्य पर्दु बदलावनु आमुत्य। काकन्य जिगरि हुंद क्रिया कर्म करनु पतु येलि गाशु तु आशाजी वापस दिलि द्रायि, बॉजी सॉबन करनुव तथ कमरस कुलुफ। तँम्य वोन ज़ि सु कमरु रोज़ि हमेशु खॉतरु गाशस तु आशाजी हुंदिसुय कबज़स तल। यि कथ वॅर रॅवी जीयन तु रानी स्व-दिलु मंजूर।

तमि पतु आव वॅरी कुनवुह शथ तु नमथ। कुनुनमथुक्यव ऑखुरी र्यतव प्यठ युस आतंक वॅशीरि मंजु शुरु सपुद, सु वोत नमथस मंजु अरुजस। बटन प्यव ज़न कलस प्यठ असमान वॅसिथ। काँत्याह आयि मारनु तु काँत्याह मूद्य फ़टु सुत्य। कुत्यन हुंद जादाद लूटुख तु कुत्यन हुंद ज़ोलुख, तथ रूद नु कांह शुमार। बटु लॅग्य पनुन जुव तु पनुन यज़थ बचावनु खॉतरु चलुनि। वुछान वुछान गँयि वॅशीर बटव निशि खॉली।

गाशन येलि वॅशीरि हुंदन हालातन साम हेन्न, तस आव नु ताब। तँम्य द्युत मॉलिस तु बॉयिस यकदम दिलि यिनुक ह्यदायथ। तिमन ति ओस नु तमि वरॉय कांह चारु। केंचन दहन अंदरुय वॉत्य तिम दिलि।

मकानुक अख स्यट, युस नावु किन्य रवी जीयुन ओस, ओस गाशन किरायि प्यठ द्युतुमुत। बॉजी सॉबुन कमरु तु तथ सुत्य ल्वकुट कुठ, युस बिजॉती काकन्य जिगरि हुंजि पूजायि खॉतरु ओस थवनु आमुत, ऑस्य यलय। अँथ्य मंजु त्रोव तिमव डेरु। बॉजी सॉबन रोट ल्वकुट कुठ पानस तु रॅवी जीयस द्युतुन बोड। पनुन्य पीर्यन हुंजु जाय रावनस प्यठ ओस बॉजी सॉबस स्यठाह दुख मगर यि सूंचिथ ज़ि गरिक्य सॉरी बॉन्न छि बेयि अँकिसुय जायि सँमिथ, म्यूल तस रछाह स्कून। जायि तँगी ऑस ज़रूर, मगर गाशन वोन ज़ि सु वनि जल्दुय किरायि दरस नेरनु खॉतरु।

रवी जी तु तसुंजु ज़नानु रानी ऑस्य स्यठाह दिल मलूल। अमि खॉतरु नु केंह ज़ि तिमन क्या ओस कांह तकलीफ। बॅल्यकि अमि खॉतरु ज़ि वॅशीरि हुंद हालात ठीख सपुदनस ओस बासान लगी वख। बॉजी सॉबुनि मुताँबिक ओस तिमन कम अज़ु कम शेन र्यतन दिलि मंजुय गुजारु करनु, तिक्याज़ि तमि ब्रॉठु ऑस नु हालात ठीक गछनुच कांह व्वमेद। गाशुन्य ऑस नु पताह केंह, मगर आशा जी ओस तिमन प्यठ केंछा आर ति यिवान तु केंछा ओसुस गोसु ति। आर अथ प्यठ ज़ि पनुन

गरु रोवुख। गोसु अमि बापथ जि दिलि हुंद गरु ओस ना तिमन पनुन गरु? सतु वुहुर सनी, गाशुन निकु ओस व्वलुसनस आमुत। सु ओस नु रानी निशि अँकिस रञ्जि डलान। रानी ति आँस्य तस वुछिथ ब्वक फवलान।

बाँजी साँब रूद व्वन्य पूजायि पाठस सुत्य आवुर। केँह वख गँछिथ लँज रवी जीयस पताह जि केँशीरि प्यठ बे-गरु गॉमुत्यन सरकाँरी मुलॉजिमन मेलि तामथ जेमि तु दिलि तनखाह। यि आँस ज़बरदस्त खुशी हुंज कथ। रवी जीयस ज़ोल न्यसुब गम अमि कथि सुत्य।

शे र्यथ गँयि मगर केँशीरि हुंघ हालात सपदेयि नु ठीख केँह। तिम गँयि ज़्यादय पहान बतर। यि कथ गँयि व्वन्य स्यकु जि हालात ठीख सपदुनस लागि कम अज़ कम अख वँरी।

अकनमथस मंज़ ज़ाव रानी लँडकु। नाव कोरुहँस आशू। सनी ओस ज़्यादय पहान ख्वश। तस ओस बासान जि आशू व्वथि वुन्य तु गिँदि तस सुत्य। सु ओस तस ल्वलुमतु लाय करान। सोकूलु यिथ ओस सु ग्वडु तस निश गंटस खंडस ब्यहान तु तमि पतु वर्दी बदलावान। आशाजी ति आँस गरस मंज़ ब्याख शुर वुछिथ बडु ख्वश। तस ओस रानी सुत्य ति जान सलाह। दपान आँसुस, च़ छख मे ल्वकुट बेनि।

बेयि अख वँरी गुज़र्यव। रँवी जीयस बास्यव केँशीरि वापस तरुन व्वन्य अख ज़्यूठ मसलु। सु योदुवय पनुनि तनखाह मंज़ु प्रथ र्यतु गर खर्चु खॉतरु केँह रकम गाशस दिवान ओस, मगर वख गँछिथ आँस रानी यछान अलग रनुन। स्व आँस दपान जि पनुनि हिसाबु ह्यकव अवुल सवुल ख्यथ तु केँह पाँसु बचॉविथ। असि कथ छि टँठ हावुन्य। मगर गाशन कोर नु अथ कथि तॉयीद। तँम्य दोपुनख, 'गरु छु कुनुय तु अलग दान कथ छु तपावुन? ति केँरिथ ति कति छु वुनि ब्याख किचन? सु छु किरायिदरन तल। यीतिस कालस नु तिम खॉली करन, तीतिस कालस छुन अथ मुतलिक सॉंचुनुय। कुठिस मंज़ुय हेकव नु किचन लॉगिथ।'

किरायिदर गव नु नेरुनस तैयार केँह। तँम्य दोपुख मे छि शुर्य परान तु बु ह्यकु नु तामथ जाय बदलॉविथ। गाशु ओस मजबूर। तँम्य ओस अँमिस किरायिदरस सुत्य पांचन वँरियन प्यठ एग्रीमेंट कोरमुत। ति केँरिथ ति कयॉव तँम्य तस ज़ारु पारु मगर सु गव नु नेरुनस तैयार। बाँजी साँबन दोपुनख व्वन्य कथ छु बँल्य अँमिस सुत्य मुजादलु लागुन। असि ति कृतिस कालस छु येती रोजुन। मँज़ीद शे र्यथ नु वँरी, बेयि कोताह?

आशू सुँदि ग्वडनिकि वोहुरवादि पतय आयि गाशुनिस मिज़ाज़स मंज़ स्यठाह तबदीली। सु ह्योतुन कथि कथि प्यठ वोलुन। बाँजी साँबस सुत्य तसुँदिस व्यवहारस मंज़ ति आयि स्यठाह फख़। काँसि ओस नु केँह समुज यिवान जि तस क्या सपुद। आशा जी वनिहेस केँह, तस ति ओस बुथ ख्यवान। बासान ओस जि केँशीरि हुंघ हालात खराब गछुनस प्यठ ओस सु सख वुदॉस्य, मगर यि कथ क्याजि सनेयि तस व्वन्य दिलस, यि ओस नु काँसि तरान फिकरी। वारु वारु ह्योतुन गरस मंज़ वँदरु रूग वोथुन। वख गव पकान।

अकि दूह द्राव बाँजी साँब शामस शे बजे बाँग्य न्यबर कुन चकराह करनि। आंगुनस मंज़ वोत तु किरायिदर सुँदि गरि वुछुन अख नफराह नेरान। बाँजी साँबस बास्यव जि यि नफर ज़ानन बु कति ताम। सु नफर ति ओस बाँजी साँबस कुन मुदय गँडिथ वुछान। ब्रॉठ कुन आव तु बाँजी साँबन केँर

तस वारु बुधिस नज़र मगर याद प्योस नु केंह। ऑखुरस प्यव तँस्य नफरस ज्वन तु पृष्ठनस ज़ि च़ु मा ओसुख बादाम बागु नोकरी करान। बॉजी सॉबन कोर आंकार तु अँथ्य सुत्य प्यव तस याद ज़ि यि नफर ओस बादाम बागु कैंटोनमेंटस माल सपलाई करान। दूशवयव कोर अख अँकिस सुत्य अथुवास तु द्रायि न्यबर कुन। यीतिस कालस प्यव बॉजी सॉबस पूर पॉट्य याद ज़ि अँमिस शख्सस ओस नाव नरेंदर शर्मा तु सु ओस दिलि हुंदुय रोज़न वोल। यिमन दूहन सु कैंटोनमेंटस माल ओस सपलाई करान, तिमन दूहन ओस बॉजी सॉब तति अँकिस जान ओहदस प्यठ कॉम करान तु अमि किन्य ओस तस बॉजी सॉबस निश युन गछुन।

शर्मा जीयस ऑस नेबर कनि कार। तँम्य कोर बॉजी सॉबस बडु इसरार पनुन गरु निनु खॉतरु। बॉजी सॉबन मान्योव नु मगर शर्मा जीयस निश चल्यव नु तस केंह। तँम्य दोपुस, बु त्रावथ च़ीर्य कारि मंजुय वापस। गरु वातान वातान करि तिमव दुनियिहुचि कथु तु प्रॉन्य वाकाथ कॅरिख याद। शर्मा जी ति ओस बॉजी सॉबस वुछिथ स्यठाह ख्वश। बॉजी सॉबन ओस तस बादाम बागु कैंटोनमेंटस मंज ब-हैसियति सपलायर रजिस्टर करनस मंज स्यठाह मदद कोरमुत तु यि कथ ऑस शर्मा जीयस अज़ ति याद। गरु वॉतिथुय लोग तँम्य तु तसुंदिस वनुनस प्यठ तसुंजि ज़नानि बॉजी सॉबस ख्वरन अथु। अमि पतु गव ज़्यूठ दरबार शुरु।

गाशुनिस गरस मंज युस किरायिदर रोज़ान ओस, तस ओस नाव प्रभाकर। सु ओस शर्मा जीयस ऑशुनाव। प्रभाकर ओस अँकिस बजि कम्पनी मंज नोकरी करान। तनखाह ति ओसुस जान। कम्पनी योदवय पनुन्यन मुलॉजिमन रोज़नु खॉतरु कम्पनी हुंदुय क्वार्टर दिवान ऑस, मगर प्रभाकर ओस यछान अलगुय रोज़नु। अमि खॉतरु ओस तस कम्पनी हुंदि तरफु किरायि हुंद पाँसु मेलान। यिमु सारेय कथु ननेयि बॉजी सॉबस शर्मा जियस निशि। बॉजी सॉबन वोन तस ज़ि ओमकार याने गाशु ओस यछान तिहँदि रोज़नु खॉतरु प्रभाकरस निशि जाय खॉली करनावुन्य, मगर प्रभाकर गव नु अमि खॉतरु तयार। सु छु पनुनिस पांचन वॅरियन हुंदिस एग्रीमेंटस प्यठ ब-ज़िद।

शर्मा जीयस गँयि नु पनुनिस ऑशुनावस मुतलिक यि कथ बोज़ुन्य गवारु। दोपुनस, यि छु सरासर अपुज़ तु प्रभाकरस छनु अथ मंज कांह गलती।

अमि पतु ख्वसु दॅलील शर्मा जीयन बॉजी सॉबस वॅन्य, स्व ऑस नु बोज़ुन्य लायख। बॉजी सॉबस च़ायि ज़ंगन नॅटिन्य। नरि गँयस रुज़िथ ज़न तु तिमन प्यठ शीनु मॉन्य ऑस थवनु आमुच़। अँछ लजस तालुवस कुन दरस। शर्मा जीनि ज़ीर दिनु सुत्य आव तस ह्यस। शर्मा जीयिन्य ज़नानु ऑस तस ब्रॉठु कनि चाय ह्यथ प्रारान। बॉजी सॉबस वॅछ नु चाय हँटिस, मगर यिथु तिथु च़ेयन गॅल्य ज़ु गॅल्य। चाय चथ हेच़ तँम्य नेरनुच़ सखर करुन्य। शर्मा जी ओस परेशान। सु लोग तस ज़ारु पारु करनि ज़ि ख्वसु कथ मे वॅनिमय, यिनु स्व ओमकारस या प्रभाकरस वनख। अगरचि बॉजी सॉबस ज़ंगन वुनि ति थरु थरु ऑस, तँम्य द्युत शर्मा जीयस दिलासु ज़ि सु थवि अथ कथि राज़। तमि पतु वातुनोव शर्मा जीयन सु कारि मंज वापस गरु।

बॉजी सॉबन ख्वव नु शामस बतु केंह। दोपुनख तँबीयत छुम नु ठीख। शर्मा जी सुंद गरु गछनुच़ कॅर नु तँम्य कथुय। राथक्युत खोत तस तफ। सुबहस गँयि तसुंज हालत ज़्यादय पहान खराब। ब्लड प्रेशर गव हाई। डाक्टर सॉबन कोरुनस मुलाहज़ु। दवा ल्यूखुनस। गाशस वोननु ज़ि बुजिरस

मंज कांह सदमु प्यनु सुत्य छि कुनि सातु यिछ हालत सपदान, मगर अँमिस छु आरामुक सख ज़रूरथ। डाक्टर साँब द्राव। रवी जी तु रानी आँस्य दम फुट्य। गाशन वँर ह्यमथ। दोपुनस, 'तोह्य क्याजि छिवु दिलस प्यठ ह्यवान। दपान जल्दुय गछन वँशीरि हुँद्य हालात ठीख। वारु कारु तँरिव वापस पनुन गरु।' बाँजी साँब ओस नु तस कुन वुछानुय। तस आँस नज़र रानि हुँदिस बुथिस कुन, येमिस अँछन मंज अँश कतरु ज़ोतान आँस्य।

बाँजी साँबुन्य हालत सुदरेयि नु अमि पतु कँह। सु गव वारु वारु पथुय। ब्लड प्रेशर गव कॉफी हाई। कथ वॉन्न हस्पतालस ताम, येति प्यठु सु वापस आव नु कँह। तँम्य द्युत तँती अमानथ। मगर अँछ वटनु ब्रॉठ वँन्य तँम्य रवी जीयस स्व सॉरुय दँलील खसु तस शर्मा जीयन वँनिमुन्न आँस। सुती करनोवुन सु वादु जि यि कथ गछि नु आशा जी या रानी पताह लगुन्य।

बाँजी साँबस गँयि ज़ु रयथ गुज़रेमुतिस। रवी जी ओस दम फुट्य। न ओस सु रानी ह्यकान कँह वँनिथ तु न ओस सु यि नार अँदरी ह्यकान च़ॉलिथ। रानी ओस नु समजुय यिवान जि अचानक किथु पाँठ्य आयि रवी जीनिस वरतावस मंज यीन्न फर्ख। मगर पानस आँस यि वँनिथ समजावान जि शायद गव नु तस मॉल्य सुंद मरुन बरदाश। रवी जीयुन बरताव रूद बाँयिस सुत्य ति गोबरिथुय तु आशा जी सुत्य ति। मगर अकि वाकाह सुत्य सपुद तस दूद तु पोन्थ अलग। आशा जी तु गाशस आँस कति कोर फर्ख। आशा जी आँस पँज्य पाँठ्य दीवी।

अमि दूह आँस बाँजी साँबस मासुवार। च़ीर्य आँस्य सॉरी ज़न छेनिथ पेमुत्य। कामि तलु म्वकुलिथ च़ायि शामस आशा जी सुली पहान पनुनिस कुठिस मंज आराम करनि। यनु आशू ज़ाव, तनु वोत सनीयस ज़्यादतर रानी निशी शंगान। रवी जीनिस दिलस युस गोद ओस, सु गव नु ठीख कँह। सु ओस यछान दिलि नेरुन तु जोम गँछिथ बसुन। रानी कँह वननु ब्रॉठ ओस सु यछान बाँयिस यि कथ वननुय तिव्याजि बाँजी साँबुनि मरनु पतु ओस सुय तस मॉलिस बराबर, तु तसुंदि इजाज़तु वरॉय ओस नु सु यछान किहिन्य करुन। हालांकि बाँजी साँबस निशि गाशुन्य शेछ बूज़िथ आँस्य तस बाँय सुंद्य तसलाह गॉमुत्य, मगर तोति ओस नु यछान सु मॉलिस माजि हुँद्य दित्यमुत्य संस्कार मँशरावुन्य। युथुय सु गाशुनिस कुठिस निश वोत, अँदरु आसु बडि बडि कथु गछान। यि वुछनु खॉतरु जि क्या दँलील छि, द्युत रवी जीयन बरस तल कन। आशा जी तु गाशु आँस्य पानुवँन्य सख बहस करान तु आशा जी आँस तस ज़बरदस्त पाँठ्य बुथि लँजमुन्न। कँह वख गँछिथ बास्यव रवी जीयस ज़न तु आशा जी ह्योत वदुन तु अमि पतु गँयि वारु वारु छ्वपु।

यि रवी जीयन बूज़, तमि सुत्य गव तस वारय जिगुरस वठ। आशा जी आँस गाशस वनान जि अगर रानी अलग किचन आँस करुन यछान, तु सु क्याजि छुनु तथ इजाज़थ दिवान। रवी जीयस बास्यव ग्वडु जि आशा जी छुनु त्युहुंद यिकुवट ख्योन चोन पसंद, अमी छे स्व रानी हुंद किचन अलग करनुच वकालथ करान। मगर कथ आँस नु यि। आशा जी आँस रुनिस समजावान जि 'प्रेथ ज़नानि छु पनुनि तँरीक रनुनुक प्यवनुक शोख आसान तु प्रेथ ज़नानु छि पनुनिस रुनिस तसुंदि पसंदु नापसंदु मुताँबिक ख्यावुन चावुन यछान। बनान छु जि मे थी आसि नु स्व ह्यकान पनुन्य पसंद वँनिथ या पनुनि दिलुच कथ वँरिथ। असि क्या हरजु छु अगर स्व पनुन किचन अलग करि?' गाशु ओस समुजदार। तँम्य ओस दुनियाह वुछमुत। तँम्य समजॉव पनुन्य बेकुल ज़नानु। दोपुनस, 'हना हे अक्लि कॉम।

वुन्यक्यस छि यिम परेशॉनी हुंदिस आलुमस मंज। न छख बिहिन्य किन्न जाय बराबर तु न छुख ख्यन चन पनुनि मरज़ी हुंद। कुतिस कालस करन यि मुसीबथ बरदाश? येलि तंग यिन, पानय चलन वापस। अगर व्वन्य यिमन सोरुय केंह पनुनि मनु मुतॉबिक मेलि, यिम कति नेरन?’ आशा जी ज़न तु च्रॅज खवरव तलु म्यॅन्न नीरिथ। तमि दोपुनस, ‘मगर यि छुवु ना त्वहि ल्वकुट बोय? बॉयिस तु बॅयकाकनि मुतलिक छा कांह यिथु पॉठ्य सॉचान? तोह्य ति ह्य ऑसिवु यिमन सुत्य कॉफी माय मोहबत वरतावान। व्वन्य क्याह सपुद?’ गाशन वोनुस व्यस्तॉरिथ, ‘बु ओसुस सॉचान जि ज़ु चोर र्यथ छु यि मसलु, पतु गछन यिम वारु कारु वापस। मे मा ऑस पताह जि यि मसलु गछि नु हलुय तु यिम रोज़न येती मूल दिथ। मे ति ह्य बुधि ज़ंदुगी छि तु पनुन बचु छु। तस क्युत छा मे व्वन्य यि ब्याख व्वंदु मज़हरु थवुन?’ आशा जी गव यि वनुन स्यठाह नागवार। तमि दोपुस, ‘मगर हेरिम स्यट ओसवु ना त्वहि यिहुंदिय खॉतरु थोवमुत, तथ क्याह गव?’ ‘तथ छु वुनि किरायिदर रोज़ान। सु मा ह्यकन बु कॅडिथ? तमि पतु यिमु छि वनुनचि कथु आसान। पतु छा आसान पटस प्यठ लीखिथ द्युन। हिसाब ओस ग्वडय सपुदमुत, कॅशीरि हुंद यिमन तु येत्युक असि। यिमन प्यव तति नेरुन, तथ मा छुस बु जिमुवार। वारु कारु गछन अज़ नु पगाह वापस। पतु क्याह, अँस्य ह्यमोखा तमि मंजु पनुन हिसु?’ गाशुन्यव कथव सुत्य गव आशा जी हेह। दोपुनस, ‘मगर यिम गछन कोत वुन्यक्यस? बूज्यजि कॅशीरि हुंद्य हालात कर गछन ठीख। बॉजी सॉबस निश ति यि कॅछा दाश नदाश ओस, ति कोरुनवु त्वही हवालु। यिम क्याह करन?’ मगर गाशस प्यव नु अम्युक कांह असर। तस ऑस क्वकरस कुनी ज़ंग। दोपुनस, ‘यि ख्वश कर्यख, ति करन। मे छा व्वन्य दुनियिहच चेट्च?’ अमि पतु ह्योत शायद आशा जी वदुन।

रवी जी वोत कमि कशालु पनुनिस कुठिस मंज वापस। रानी ऑस सनीयस तु आशूहस नैदुर पॉविथ पानु ति शॉजिमन्न। रवी जीयन त्रोव बिस्तरस प्यठ डाफ। तस आव ओश। सूचुन, ‘बोय हेक्या बॉयिस सुत्य पॅज्य पॉठ्य युथ सलूक कॅरिथ?’ सुती पेयि तस मॉल्य सुंजु तिमु कथु याद, यिमु तस शर्मा जीयन वनिमचु आसु।

दर असुल ओस प्रभाकर ग्वडुन्यथ गाशुनि कम्पनी मंजुय कॉम करान तु अमि किन्य ज़ानिहे सु तस वारियाह कालुक। येलि प्रभाकरन कॅशीरि हुंद्यन हालातन हुंज दॅलील बूज, तस गव सख अफसूस। तस लॅज यि कथ ति दिलस जि पनुन मकानु ऑसिथ ति छु बॉजी सॉब तु तसुंद अय्याल अँकिसुय कुठिस मंज गुज़ारु करान। तँम्य ओस बॉजी सॉबुनि तोर यिनु पतु अकी रेत्य पनुनि कपॅनी मंजु क्वार्टरु खॉतरु दरखास त्रोवमुत। तँमिस ऑस कॅशीरि हुंद्यन हालातन हुंज पूर ज़ान तु बॉजी सॉबुनि अय्यालुक तकलीफ तुलुन ओस नु तस बरदाश गछान। सु ओस पजि मनु यछान जाय खॉली कॅरिथ तिमन वापस करुन्य। कम्पॅनी कोर तस क्वार्टर ति अलाट, मगर प्रभाकर ह्योक नु गाशुन्य जाय त्रॉविथ। वजह ओस यि जि गाशन द्युत नु तस नेरुनय। दोपुनस, अगर च़ु नेरख, यिम करुनम अथ जायि कब्जु तु पतु नेरुनय नु ज़ांह। प्रभाकरस पेयि यारु सुंज कथ मानुन्य। येलि ति गाशु मॉलिस या बॉयिस थी तस जाय खॉली करनु खॉतरु वनान ओस, सु ओसुस कोरु जवाब करान। गरा ओसुस अख हीथ ह्यवान तु गरा ब्याख हीथ। यि सोरुय ओस तस गाशन हेछिनॉविथ थोवमुत। अमि सुत्य

ओस गाशु मॉलिस तु बाँयिस दिवान हॉविथ जि 'वुछिव, मे काँचाह परेशॉनी छि तुहुंज। मगर क्याह करु ? मजबूर छुस। पांचन वॅरियन प्यठ छुम ना अँमिस सुत्त्य एग्रीमेंट कोरमुत ! नारस दिमा नरि ?'

यी सॉचान सॉचान पेयि रवी जीयस नैदर। सुबहस वोथुय नु सु चेर ताम। रानी हुँदि ज़ीर दिनु सुत्त्य गव सु हुशार मगर अँदुर्य ओस तस च़स गोमुत। बाँय सुंज कथ कस वनिहे ?

रानी येलि किचनस मंज काँम करनि चायि, आशा जी ऑस चाय तैयार वॅरिथ थँवमुच। दूहय ऑस आशा जी सुबहस सुबहस गाशस तु रवी जीयस पानय चाय दिवान, मगर अज ऑस तस अथन थरु थरु। तमि हेच नु रानी सुत्त्य ति अँछ रलॉविथ। तस ओस रवी जी तु रानी हुँदि तकलीफु खॉतरु पनुन पान ति जिमवार बासान। पजि मनु कूशिश करनु बावजूद ह्योक नु तमि पनुन रुन समजॉविथ। तँम्य दोपुनस अथ मामुलस मंज छुनु दखुल दिनुक ज़रूरथ। रानी तुल्य चायस ज़ु कप तु द्रायि न्यबर। आशा जी त्रोव ज़्यूठ व्वश।

दोयिमि दूह मोकु यिथुय वोन रवी जीयन बाँयिस, 'दपान हसॉ वॅशीरि हुँद्य हालात छिनु जल्दुय सुदरन वॉल्य। बु ओसुस सॉचान, बु गछु जोम रोज़नु खॉतरु। तँती करु वारु वारु कुनि जायि कमरु ज़ु कमरु बनावनुक इन्तिज़ाम। दपान सारिवुय बटव छु ह्योतुमुत ती करुन।' गाशु गव यि बूजिथ ख्वश। दोपुनस, 'अदु नाकारु क्याह गव। स्व गँयि पनुन्य बेहबूदी छांडुन्य। बु वनुहय येति दिलि मंजुय रोज़, मगर येति छुय सख द्रोज़र। येति व्यापक नु कुनुय। बेयि सरकार्य नोकरी हेन छय, बँल्लिक तँती एडजस्टमेंट करुनय। म्यानि कुनि मदतुक आसी ज़रूरथ, परवाय छुनु कँह।' रवी जी ओस ग्वडय यि सोरुय बोज़नु खॉतरु तैयार। कँह दूह गँछिथुय ह्यँच तँम्य जोम नेरनुच सखर करुन्य।

जोम नेरनु वख्तु, येलि तिमव बसि मंज सामानु ह्योत बरुन, सनीयन लोग वदुन। सु ओस नु आशुहस ख्वनि मंजु त्रावनु खॉतरु तैयारुय। रवी जीयस प्यव बेयि सु वख याद येलि गाशस सिरीनगरु प्यठ नोकरी खॉतरु दिलि ओस नेरुन, तु तँम्य ति लाजोव पानु वदन वान। मगर तमि सातु ओस तस बाँजी साँब दिलासु दिनस। अज कुस छु ?

सनी रुद वदानुय तु बस द्रायि। आशा जी ऑस न यथ आलुमस सुत्त्य तु न तथ आलुमस सुत्त्य। टाटा करनु खॉतरु ति ह्योक नु तमि पनुन अथु थोद तुलिथ। तस ऑस सारिवुय खोतु ज़्यादु आशु सुंदिस दूर गछुनस प्यठ वॉलिंज छ्यनान।

शिबन जी ओस रानी हुँद बोय। सु ओस जेमी रोज़ान। रवी जी तु रानी वॉत्य तसुंदुय गरु। शिबन जीयन ओस यिहँदि खॉतरु पानस नज़दीखुय अख कमरु तु किचन किरायि प्यठ छाँडिथ थोवमुत, मगर सु ओस यछान जि रानी दियि तथ ग्वडु नज़र। कमरु ओस ठीख मगर फर्शस ओस नु सीमठ वॅरिथ कँह। किचन ओस नु दर अस्ल किचन, बँल्लिक ऑस यि ल्वकुट कूठर, यथ दारि बदलु अख ल्वकुट रोशनदान ओस। मगर रानी तु रवी जीयस आव यि पसंद। येमि हिसाबु जेमिस मंजु मकानु किराय रॉयिज ऑस, तमि हिसाबु ओस यि सस्तु। पानि रँग्य तु बिजली रँग्य ओस हना तकलीफुय, मगर दूशवय बाँच ऑस्य यि तकलीफ तुलनस तैयार। यि वुछिथ जि शिबन जी तु तसंजु ज़नानु किशनु ति ऑस्य तकरीबन यिथिसुय किरायि मकानस मंजु रोज़ान, गँयि तिमन ह्यमथ। यि ऑस बदलु कथ जि शिबन जीयन ओस वारु वारु पनुन पाँसु लॉगिथ फर्शस सीमठ करनोवमुत तु दारि दरवाज़ु ठीख करनॉव्यमत्य।

रवी जी रूद अथ मकानस मंज़ लगबग अँकिस वॅरियस, मगर व्वन्य ओस सु यछान अति नेरुन। वख गॅछिथ बासेयि तस यि जाय ल्वकुट। बेयि ओस अति बाथ रूमुक तकलीफ, तिक्याज़ि दून गरन ओस कुनुय बाथरूम। ब्याख गरु ति ओस बटु गरय तु तिमन ऑस्य गॉमुत्य अति ज़ु वॅरी रोज़ान। तिमन बिचार्यन ति ओस मुसीबथुय।

पांचन वॅरियन मंज़ बदलॉव्य रवी जीयन शे मकान। अँकिस जायि अख तकलीफ तु बेयिस जायि ब्याख। अँकिस जायि किराय स्यटाह तु बेयिस जायि पछ्यन यिनस ठाक। अँकिस जायि मॉलिक कथि कथि प्यठ बुथ त्रकरावान तु बेयिस जायि अगनस दूगन एडवान्स मंगान।

अँथ्य मॅसीबतस दोरान हेत्य रवी जीयन बन तालाबु साड त्रे मरलु ज़ॅमीन मॅल्य तु बनोवुन तथ प्यठ मकान। अख ड्राईंग रूम, अख ब्यड रूम, अख किचन तु अख बाथ रूम। बॉय कोरुनस ज़ॅमीन ह्यनु वख्तु मदद। ज़ु सास सूज्यनस। दोपुनस अमि ज़्यादु छुम नु वुन्यक्यस गुज़ारु। मकानु बनावुनस क्युत द्युतुनस नु कॅह। अमि विज़ि खेयि तॅम्य कथुय। आ, आशा जी सूज़िनस चूरि चूरि दॅह सास तु पांछ हथ। पांछ हथ ऑस्य सनीयन पनुनि बुगनि मंज़ु वॅगडिथ दित्यमुत्य। सनी ओस व्वन्य बॅह्यमि जमॉन्न परान तु तस ओस सोरुय यिवान समुज। अदु, तॅम्य ज़न ओस नु आशू पांचव वॅरियव प्यठ वुछमुतुय, मगर तस ओस वुनि ति सु अँछन तल। रवी जीयुन, यस सु पापु ओस वनान, मोसूम तु टोट बुथ तु रानी हुंद लाड प्यार ति ओस तस वुन्युक ताम याद। बस, दिलस ओसुस अरमान, अकि लटि जोम गॅछिथ तिमन नालु मति रटुनस। मगर मॉल्य द्युत नु अथ इजाज़थ। दोपुनस, 'तोर गछनुच छनु कांह मजबूरी। वुन्यक्यस छुय च़े नोज़ुक वख। बुथि छुय इम्तिहान। वुन्यक्यस गव सिर्फ परुनस कुन करुन।' सनीयन ह्योत अँदरी।

व्वन्य रूद्य मसाह दॅह दूह, येलि रवी जीन्यन नॅविस मकानस मंज़ अच्युन ओस। रवी जीयन येलि बॉयिस तु बॅयकाकनि बेयि अकि लटि फोन वॅगरिथ मकानस अच्यनुच कथ वॅन्य, तमि वख्तु ओस सनी ति मॉलिस माजि ब्रॉठकनि। गाशन वोन बॉयिस जि सोन युन छु यथ मोकस प्यठ मुशिकलुय। ब्रॉहकुन वुछव। आशा जी ऑस बे करार। स्व ऑस यछान वुडिथ वातुन जोम। मगर रुन्य संज़ि मरज़ी खलाफ ऑस नु यछान कदम तुलुन। तस ओस अँदर्य किन्य ति रुन्य सुंद सख कीनु। किरायिदरु संज़ि ज़नानि निश ऑस तमि हाल हालुय स्व सॉरुय दॅलील बूजमुन्न, य्वसु शर्मा जीयन बॉजी सॉबस वॅनिमुन्न ऑस।

सनीयन येलि माजि निशि रवी जी तु रानी हुंदि दिलि प्यठु वापस नेरनुक वजह बूज़, तसुंदिस नोज़ुक दिलस लॅज च़ॅड। आशा जी ति ऑस नु यछान तस यि सोरुय वनुन, मगर स्व ऑस अँदरी फॅटमुन्न। सनीयस बोज़ुनॉविथ फॉफ़लोव तमि पनुन बोस। सनी ओस ल्वकुट मगर बुर्दबॉरी ऑसुस पूर पापस तु बॉजी सॉबस हिश। यूत यूत रानी हुंदि मकानस अच्यनुक वख नॅज़दीख ह्योतुन वातुन, त्यूत त्यूत सन्यव तस यि दोद। सु प्यव वुछान वुछान ब्यमार।

च्वन दूहन हुंदिस ब्यमार नेचिविस ब्रॉठ कनि बिहिथ गव गाशस ज़रु ज़रु। सनीयस ओस नु तफ वसानुय तु सु ओस ज़न हॅरिथ प्योमुत। मॉलिस सुत्य ओस नु सु कथुय करान। मॉल्य दोपुनस, 'करख ना मे सुत्य कथ? मे द्युतुमय नु जोम गछनु, अमी छुखु मे नाराज़?' सनीयन बूज़, मगर जवाब द्युतुनस नु कॅह। कलु प्युरुन होर कुन। मॉलिस छेन्य वॉलिंज। नेचिव्य सुंदिस मोसूम बुथिस

प्यठ अथु थँविथ वोननस, 'चु मा मारख मे यिथय पॉठ्य ? कथ क्याज़ि छुहँम नु करान ?' अडु ख्वखरि ज़बॉन्य वोनस सनीयन, 'डैडी ! म्यानि अँकिस कथि दीवु जवाब ?' 'क्याज़ि नु ? वन क्या छुय वनुन।' पृछुस डैडियन। बुथिस कुन वुछनु वरॉय वोनस सनीयन, 'यीतिस बँडिस मकानस मंज़ ऑस ना म्यॉनिस आशू सुंदि खॉतर जाय ?' डैडी गव दम फुट्य।



शामुचि ऑठ आसु बजेमचु। रानी हुंद बोय शिबन जी तु तसुंज़ ज़नानु किशनु ऑस्य वापस पनुन गरु द्रामुत्य। आशू ओस इलेक्ट्रानिक हैड गेमि सुत्य आवुर। रँवी जी ओस डी डी न्यूज़ बोज़नस सुत्य मशगूल तु रानी ऑस पगाह सुबहुकि खॉतर सब्जी च़ारान। अचानक गव नेबुर्य सनी सुंद आलव। रानी गँयि हुकु थोद वँथिथ तु मुच़रोवुन दरवाज़। गाशु, आशा जी तु सनी ऑस्य ब्रांदस प्यठ। 'लगुया बलायि, म्यानि पुत्रा!' रानी च़ँज क्रख नीरिथ तु रोदुन सनी नालुमति। यीतिस कालस द्राव रवी जी ति न्यबर। बोय तु बँयकाकन्य वुछिथ कोरुन तिमन नालुमोत। तमि पतु रोदुन सनी ख्वनि मंज़। आशा जी च़ायि अंदर तु रोदुन आशू नालुमति। सुबु प्यठु ख्वसु गमुच छाय गरस मंज़ नज़ान ऑस, स्व गँयि खत्म। माहोल गव यकदम बदलिथ। च़ववापॉर्य फ्यूर प्रागाश।

श्रान वँरिथ तु सफरुच थकावट म्वकुलॉविथ बीठ्य सॉरी चाय चेनि। गाशु ओस दफतरु दँहन दूहन छुटी थँविथ आमुत। सनी ओस आशूहस सुत्य गिंदुनस लोगमुत। आशा जी वँड बैगु मंज़ु नँव दूत्य तु मिठायि डबु तु दितिन रानी अथि। दोपुनस यि छुय मकानस अच़नस। दूनुवय आसु सख ख्वश मगर गाशु ओस नु बॉयिस सुत्य नज़रुय ह्यकान रलॉविथ। आशा जी वोननस, 'त्रॉविव व्वन्य पँतिम कथ। ऑखुर छुवु त्वहि रवी जी नेचिविस बराबर।' गाशन वोनस, 'व्वन्य छुसा बु ति वनुनस लायक किनु न, ति छम नु पताह। मगर आशू छुम ज़रूर सनीयस बराबर।' तमि पतु कोड गाशन चंदु मंज़ु अख काकुद तु द्युतुन रवी जीयस अथि। रँवी जीयन दिच़ काकुदस वारु पॉठ्य नज़र। काकुद रूद तस अथस मंज़ुय तु अँछव वोथुस ओश। आशा जी थोवुनस कलस प्यठ अथु।

यि काकुद ओस अदालतुक तँहरीरनामु। गाशन ओस दिलि हुंद पनुन मकानु कोनूनी तोर न्यसुब सनी तु न्यसुब आशू सुंदि नाव वँरिथ थोवमुत।



तबदीली

महि काकस वोत बराबर ओड गंट अथ काकुदस वुछान। बुथिच रोनक ऑसुस खत्म गॉमुन्न तु अथन ओसुस नु ह्यसुय। अमि काकुदुक अख अख लफुज पोर तॅम्य कम अज कम पांयि लटि, मगर बासान ओस जि पॅर्य पॅर्य ति ओसुस नु कॅह समुज यिवान। तस बास्यव कलु नन्नान। काकुद प्योस अथु मंजु पथर तु अॅछन गोस वुछान वुछान अनि गोट। अॅली मीरन थॅव चायि ट्रे पथर तु लोग महि काकस जिलदु पटि सुत्य हवा करनि। मगर महि काक ओस नु योरुकिस आलुमस सुत्य कॅह। ऑनकु मॅज्य ति ओस तसुंजन अॅछन हुंद ओश साफ यिवान लबनु।

काकुद क्याह ओस ? यि ओस चीफ सॉबुनि दफतरु प्यठु आमुत तबदीली हुंद आर्डर। आर्डरस मंज ओस शुराहन नफरन हुंद नाव, यिम अकि जायि प्यठु बेयिस जायि तबदील ऑस्य करनु आमत्य। महि काकन योदवय पनुनि जिंदुगी मंज यिथ्य यिथ्य हतु बॅद्य आर्डर ऑस्य वुछिमुत्य, मगर अॅज्युक आर्डर ओस बिलकुल ब्योन। अॅज्युकिस आडरस मंज ओस तसुंद पनुन नाव ति शॉमिल तु सु ओसुख वरमुल तबदील कोरमुत। आर्डरु मुतांबिक ओस तस सारिवुय ब्रॉठ रिलीव गछुन, अमि किन्य ओस साहबन तस पनुन चार्ज सीनियर कुलॅक रोशन लालस दिनु खॉतरु ल्युखुमुत। महि काकस ऑस्य अथ दफतरस मंज वारु कारु व्वन्य सतुत्रुह वॅरी गॉमुत्य नोकरी करान मगर मजाल ओसा जि कांह करिहे तस तबदीली करनुच ह्यमथ। यि त्रठ पेयि अज ग्वडुनिचि लटि।

महि काकन द्युत कलस अथु। दफतरुक्य बाकुय मुलॉजिम ति ऑस्य हयबुंग। काँसि ओस नु कॅह समुज यिवान जि यि कुसु हय सपुद्यव तु किथुवॅन्य ? रोशन लालन येलि साहबस सुत्य अथ मुतलिक कथ वॅर, तॅम्य कोरनस कोरु जवाब। साहब ओस पानु ति अथ कथि प्यठु स्यठाह दिल मोलूल। मगर क्याह करिहे ? नारस दियिहे नरि ? तॅम्य वोन रोशन लालस व्यसतॉरिथ जि यि फॉसलु छु हेरी सपद्योमुत। चीफ सॉबन ओस वाजेह होकुम द्युतमुत जि प्रथ कांह सु मुलॉजिम गछि तबदील करनु युन, येमिस नु पॅतिम्यन दॅहन वॅरियन तबदीली ऑस गॉमुन्न। तु महि काकन ऑस नु पूर जिंदुगी ज़ांह तबदीली वुछिमुच्चय। मगर तोति ओस तस पूर बिहिथ जि साहबन वॅर नु तसुंज तबदीली रुकावनस मंज कांह कूशिश।

बराबर सतुत्रुह वॅरी ब्रॉठ ओस महि काक अॅथ्य दफतरस मंज मिस्तॅर्य सुंजि जायि लोगमुत। अफसरन सुत्य थोव तॅम्य ग्वडु प्यठय रॅछरिथ तु काँसि हुंदिस होकुमस द्युतुन नु फेश। काँत्याह अफसर आयि तु काँत्याह गॅयि, मगर महि काक रूद अॅथ्य दफतरस मंज डॅटिथ। अथ मामुलस मंज कोर तस प्रथ काँसि अफसरन मदद, तिक्याजि प्रथ अॅकिस ऑस यि कथ पूर पाँठ्य बिहिथ जि महि काकस वरॉय हेकि नु सु दफतर चॅलिथुय। वातान वातान वोत महि काक ह्यड कुलॅक सुंदिस ओहदस प्यठ ति, मगर जायि फ्युर सपुद नु तस ज़ांह। व्वन्य रूदिस रिटायर गछनस मसाह त्रे वॅरी, जि यि हॉदिस सपुद।

अज सपुज नु दफतरस मंज कांह कॉम। सपदिहे ति किथु पॉठ्य ? साँरी ऑस्य परेशान। महि काक ओस सारिनय मॉलिस बराबर तु मॉल्य सुंद दूर गछुन कुस अखाह करिहे बरदाश ? महि काकून्य हालत वुछिथ वोत सारिनय हुंदिस दिलस ददार। आरु मंडुल वॅरिथ बीठ्य तिम साँरी तस अँद्य अँद्य। अँड्य कुरसियन प्यठ तु अँड्य मेज़न प्यठ। यस नु किहिन्य अथि लोग, सु रूद व्वदन्य। साँरी ऑस्य दम फुट्य। काँसी ओस नु कैह फोरान। महि काक ओस मुदय गँडिथ पनुनि मेज़ुक सु कून वुछान यथ ब्लेज़र छ्योनमुत ओस, तु यथ तँम्य पनुनि गरि सुन्न पन अँनिथ त्रोप ओस द्युतुमुत।

नोकरी लगनु प्यठ वुनिस तामुच अख अख कथ पेयि महि काकस याद। सु ओस मसाह पंदाह वुहुर येलि सु पनुन्य मॉल्य अथस थफ वॅरिथ खान साँबुन गरु ओस न्युमुत। महि काकन, यस असली नाव महेश्वर नाथ ओस, ओस एंटरन्स पास कोरुमुत, तु यि कथ ऑस तस नोकरी लागुनावनु खॉतरु कॉफी। तस आव सु सोरुय सीन अँछन तल, ज़न तु कालुक बतु।



पंदाह वुहुर्य महेश्वरन येलि ताज़ कुंद्य वॅरिथ कोठ पतलून लोग, सु गव पूर महाराज़ हू। यि कोठ पतलून ओस दर अस्ल तसुंद्य मॉल्य लालु साँबन पनुन प्रोन कोठ पतलून अँदरिम न्यबर वॅरिथ रमज़ानु सुन्नस अथि नवि सरु सुवनोवमुत। मगर महेश्वरुनि खॉतरु ओस यि कोरु नोव, तु सु ओस नु कुनि व्यन्नान। सुबहुचि ऑठ आसु बजेमच्च। लालु साँबुन आलव बूज़िथुय लॉज महेश्वरन नँव गांधी टूप्य कलस तु वोत आंगुनस मंज। मॉल्य वॅर नेचिविस अथस थफ तु ह्योतुख खान साँबुन गरु कुन कदम द्युन।

खान साँब ओस रानी मंदरु रोज़ान। महेश्वर गव ग्वतन ज़ि मुसलमान ऑसिथ किथु पॉठ्य छु खान साँब मंदरस मंज रोज़ान, मगर मॉलिस पृछनुक जुरथ सपदुस नु। अख मँज़िलाह वॅरिथ वॉत्य तिम तकरीबन नवि बजि खान साँबुन गरु। गरु ओस मँहलु खानु मगर मंदर ओस नु कुनी। महेश्वरन ज़ोन नु वुनि ति मॉलिस सवाल करुन मुनॉसिब। ठसु दरवाज़स नेबरु कनि द्युत लालु साँबन थख। अंदर अन्ननु ब्रॉठ हेछिनोव तँम्य महेश्वर वारु पॉठ्य ज़ि बूठ कत्यथ छु कडुन तु ब्युहुन किथु पॉठ्य छु।

अंदर अँच्चिथुय बेहनोव लालु साँबन नेचुव देवान खानस मंज तु पानु ज़ाव हामामु कुठिस मंज खान साँबस सलाम करनि। खान साँब ओस तँहसीलदार तु लालु साँब ओस तसुंज़ि नॉयिबी प्यठय तस सुत्य। नोकरी हुंदिस सिलसिलस मंज योत योत खान साँब गव, तोत तोत न्यून लालु साँब ति सुत्य। लालु साँबन ओस पनुनि मेहनतु सुत्य तसुंद दिल ज़्यूनमुत। पज़र ओस यि ज़ि खान साँब ति ओस लालु साँबस स्यटाह यज़थ करान तु खास पनुन बोय हू ज़ानान।

लालु साँबन वॅर खान साँबस तु बेगम साँबि सलाम। खान साँबस ओस अँकिस अथस मंज चायि प्यालु तु बेयि अथु ओस सु कालुकिस अंग्रीज़्य अखबारस वरक फिरान। लालु साँबस वुछिथुय कोर तँम्य तस पथर बेहनुक इशारु। बेगम साँब ऑस चायि समावार ह्यथ अँकिथ कुन बिहिथ तु अख

मोहन्युव ओस च्वचि वर्यन थॅन्य लॉगिथ प्लेटस मंज सजॉविथ थवान। अज ओस आथवार तु दफतरस ओस छुटी। लालु सॉब ब्यूठ पथर। योदवय तॅम्य खान सॉबस सुत्पु ग्वडय ओस कथ वॅरिथ थॅवमुन्न, तोति ओस तस वुन्यक्यस दिलस दुबुरारय। खान सॉब रूद चाय च्यवान। लालु सॉबस प्रुछ नु काँसि चायि तिक्याज़ि तिमन ओस पताह ज़ि सु छुनु मुसलमान गरि ख्यवान चवान। अथ कथि प्यठ ओस नु खान सॉब तस नाराज़ कॅह। तसुंद वनुन ओस ज़ि सु नफर गव पॅज्य पाँठ्य थोद युस पनुनिस दीनस प्यठ पकि।

महेश्वर येलि दॅह्यमि जमॉन्न खोत, तमी वख्तु ओस खान सॉबन लालु सॉबस वोनमुत ज़ि दॅहिम जमात पास वॅरिथुय लागि सु तस नोकरी। अज ओस नु खान सॉबस पनुनिस दफतरस मंज कांह जाय खॉली। मगर लालु सॉबस दिन्नमुन्न ज़बान वॅर तॅम्य बराबर। तॅम्य ओस लालु सॉबुनि यिनु ब्रॉतुय पनुनिस दोस्तस हॅमीद सॉबस सुत्पु कथ वॅरमुन्न तु महेश्वरुनि खॉतरु नोकरी हुंद इन्तिज़ाम कोरमुत। हॅमीद सॉब ओस आबपाँशी महकमुक अख बोड अफसर।

खान सॉबन म्वकुलॉव चाय चथ तु द्राव देवान खानस मंज। महेश्वरन वॅर तस थोद वॅथिथ सलाम। खान सॉब ब्यूठ तख्तु पोशस प्यठ तु लालु सॉबन पिलुनोवुस नेचिव्य सुंद दरखास। खान सॉबन ल्यूख तथ प्यठ क्याहतान्य तु थोवुन चंदस मंज। लालु सॉबस दोपुन दोयिमि द्वह हॅमीद सॉबुन दफतर वातुन। हॅमीद सॉब ज़ानिहे लालु सॉबस ठीक पाँठ्य।

गरु कुन वापस यिवान ओस लालु सॉब बडु ख्वश, मगर महेश्वरस ओस ज़बरदस्त कीनु। तॅम्य ओस्य अँकिस बेयिस पृच्छिथ तिमन सारिनुय सवालन हुंद्य जवाब अंग्रीज़्यस मंज याद वॅरिमुत्प, यिम सवाल यिमन मोकन प्यठ पृच्छनु ओस्य यिवान। महेश्वरस ओस्य सॉरी जवाब फर फर करान याद। मगर खान सॉबन प्रुछ नु तस अख सवाल ति। युतुय योत नु कॅह। खान सॉबन न वुछ तसुंज गांधी टूप्य तु न तसुंद नोव कोठ पतलून वारु पाँठ्य। अगर वुछमुत आसिहेन, सु पृच्छिहे ना लालु सॉबस यि कोठ पतलोन कुतिस गव तैयार ? महेश्वर रूद गरु वातुनस ताम दिल मोलूल।

बेयि द्वह वोत लालु सॉब हॅमीद सॉबुन दफतर तु कोरुन महेश्वर तस हवाल। हॅमीद सॉबन बुलोव पनुन ह्यड कुल्लेक तु महेश्वरस कुन हॉविथ वोनुनस, 'यि गव लालु चंदुन लॅडकु महेश्वर नाथ। यि छु खान सॉबन सूज़ुमुत। यीतिस कालस कुल्लेक सुंज कांह जाय नेरि, तीतिस कालस लॉग्यतोन मिस्तॅर्य पोस्टस प्यठ।' यि वॅनिथ पिलुनोव हॅमीद सॉबन सु दरखास ह्यड कुल्लेकस कुन, युस लालु सॉबन खान सॉबस द्युतुमुत ओस। ह्यड कुल्लेकन हिलोव कलु तु द्राव वापस। हॅमीद सॉबन द्युत लालु सॉबस दिलसु ज़ि महेश्वर छु तस पनुनिस बचस बराबर, अमि किन्य छनु तस फिकिर करनुच कांह ज़रूरत। लालु सॉबस ब्यूठ दिल डंजि तु हॅमीद सॉबस शुक्रिया वॅरिथ द्राव तसुंदि कमरु मंजु न्यबर। महेश्वर ति द्राव तस पतु पतु। लालु सॉबन कोर नेचुव ह्यड कुल्लेकस हवाल तु द्राव गरु कुन वापस।

महेश्वरस तोर दफतरस मंज ब्यहान ब्यहानुय फिकिरि ज़ि अत्युक माहोल ओस गोब। त्रे चोर कुल्लेक ओस्य डीफुर वॅरिथ क्याहताम कनुफुस करान। महेश्वरस वुच्छिथुय वॅर तिमव छ्वपु तु बीठ्य पनुनि पनुनि जायि प्यठ। ह्यड कुल्लेक ति ओस यि सोरुय वुछान मगर तॅम्य दिन्न नु अथ कांह अहमियथ।

ह्याड कुल्लेकस ओस नाव बॅशीर सॉब। तॅम्य तॉर्य महेश्वरस दफतरुक्य तोर तॅरीकु फिकिरि। अकि अकि न्यून सारिनुय टेबलन प्यठ तु करुनॉवनस सारिनुय मुलॉजिमन सुत्य ज्ञान। अमि पतु आव महेश्वरुनि बेहन जायि हुंद इन्तिजाम करनु। अँकिस कूनस मंज ओस अख प्रोन फुटमुत मेज़। सु आव दरवाज़स निशि लागनु। कुरसी ऑस नु कांह। चपरॉस्य ओन अख स्टूल तु थोवुन सु मेज़स पतु कनि। अमि पतु बेहनोवुख महेश्वर अथ स्टूलस प्यठ तु कोरहॅस सारिवुय मुबारक। मगर मुबारक करन वाल्यन मंज ओस नु मंजूर अहमद टाइपिस्ट शॉमिल कैह। रञ्जि खँड्य बनोव बॅशीर सॉबन आर्डर तु त्रोवुन साहबस दसखतु बापत। यीतिस कालस आयि महेश्वरुनिस खातस चाय तु पेस्ट्री अनुनावुनु, य्वसु मंजूर अहमदस वरॉय सारिवुय चैयि। गुलु मीरुनि ज़ोर करनु बावजूद ति मोन नु मंजूर अहमदन चाय चैन्य। सु बास्यव कथ ताम प्यठ महेश्वरुनि दज्ञान। मगर अथ मामलस प्यठ वॅर नु काँसि कांह कथ।

साहबु सुंद दसखत कोरमुत आर्डर तु चायि हुंज बिल आयि यिकुवटु महेश्वरस दिनु। महेश्वरन वॅर आर्डर परनु ब्रॉठ बिली नज़र। रकम ओस जान। महेश्वरस ओस चंदु खॉली मगर गुलु मीरन द्युतुस दिलासु। दोपुनस चायि वॉलिस छि आसान र्यतु पतु पाँसु दिन्य। तीतिस कालस आसी त्रे वारु कारु तनखाह ति तोरमुत। महेश्वरस खँच वॉलिंज बोठ तु ह्योतुन आर्डर परनु।

आर्डर ओस छोट तु साफ। महेश्वरुनि अक्लि ऑस नु अथ मंज कुनि कुसमुच वॅरमी। अँज्यकि दूह प्यठय ओस महेश्वर नाथ कौल अथ दफतरस मंज बहैसियति मिस्तॅर्य नोकरी आमुत लागनु। योदवय मिस्तॅर्य नाव महेश्वरस पसंद ओस नु, मगर साहबन ऑस ग्वडय यि कथ साफ वॅरमुच ज़ि युथुय कुल्लेक सुंज कांह जाय नेरि, तमी वख्तु यी स्व जाय तस दिनु। हरगाह साहबन अथ मंज कैह वख्त लगनुच कथ ति ऑस वॅनिमुच, मगर महेश्वरस ओस साहबु सुंजि कथि प्यठ पूर बॅरुसु। वैसे ति ऑस तस शुरू प्यठय कुल्लेक सुंजुय कॉम करुन्य। व्वन्य गव यि ऑस अलग कथ ज़ि दफतॅरी ज़बॉन्य मंज ओस 'कैह' लफुज ति बडु ज्यूठ माने थवान।

आर्डर परनु पतु दिच महेश्वर नाथन ओरु योर नज़र। सॉरी ऑस्य पनुनिस पनुनिस कारस सुत्य आवुर्य। अँथ्य असना हस मंज कोर बॅशीर सॉबन तस आलव। महेश्वर गव तस निशि तु तॅम्य दिचुस अख फाइल परनु खॉतरु। महेश्वर नाथ रूद बोवलु ह्यु तस वुछान। तस आव नु कैह समुज ज़ि फाइल पॅरिथ क्याह छु करुन। बॅशीर सॉबन समजोव वारु पाँठ्य 'कांह केस समजुनु खॉतरु छि तमि केसुच फाइल आसान ज़रूरी परुन्य। तमि पतु छि आसान तमिक्य खास खास पोंडंट नोट करुन्य। तु अगर अथ केसस मुतलिक कांह चिठ्य आसि आमुच, तथ जवाब दिनु खॉतरु छु यिमय पोंडंट वुछिथ आसान जवाबुक ड्राफ्ट लेखुन महेश्वर नाथ ओस सोरुय बोज्ञान मगर पलि ओसुस नु प्यवान कैह। सु रूद अमि दूह अन्यूर ह्यु सारिनुय वुछान।

दोयिमि दूहय तोर महेश्वर नाथस फिकिरि ज़ि मंजूर अहमद कथ प्यठ ओस दज्ञान। तॅम्य ऑस दर अस्ल अथ जायि प्यठ पनुन बोय लागनुच व्वमेद थॅवमुच, मगर तसुंदि कांह कदम तुलनु ब्रॉटुय प्यव महेश्वर नाथ वॉतिथ। मंजूर अहमदुनि व्वमेज गॅयि छलु तु फलु।

मंजूर अहमदन्य यि कथ ननेयि महेश्वर नाथस गुलु मीरस निशि। गुलु मीर ओस अमि दफतरुक चपरॉस्य तु सु ओस प्रथ काँसि हुंजि कथि हुंद राजदार। पज़र ओस यि जि सु ओस दफतरुचव कथव अलावु ति वारियाहस वॉकुफ। साहबु संजि ल्वकचि साँज कति कोरुख खांदर तु बँशीर साँबस क्या क्या वोत नेचिव्य संजि निशानि प्यठ, सलाम पीर क्याजि कोर मॉल्य जादादु निशि बे दख्ल तु हीरु बान कथ प्यठ द्राव गरि ब्योन, अमि सारिची खबर ऑस गुलु मीरस पूरि पूर। दफतरुक बोड अफसर ऑस्यतन या ल्वकुट मुलॉजिम, गुलु मीर ओस कुनि नतु कुनि बडि द्रहु कि हीतु प्रथ काँसि हुंद गरु वातान तु पनुन पान त्युहुंद टोट बनावान। अमि किन्य ओस तस प्रथ गरुक सोन व्वगुन ति पय लगान। मगर गुलु मीरस ओस अख वस्फ ति। सु ओस प्रथ अँक्य सुंदिस दौदिस दगि मंज शँरीक सपदान तु हाजतु वख्तु प्रथ अँकिस अकार बकार यिवान।

महेश्वर नाथस प्यव नु ज़्यादु कालस प्रारुन केंह। द्वयी वुहुर्य बन्यव सु जूनियर कुल्लेक। प्रॉन्य जाय बदलेयि। नवि जायि आव नोव मेज़ तु नँव कुरसी लागनु। महेश्वर नाथस बड्यव वतबु, हालांकि अमि विजि प्यव तस साहबस सान दफतरुक्यन सारिनय मुलॉजिमन हुंदि खॉतरु बतु डंगुक इन्तिज़ाम ति करुन। अमि पतु रूद नु कांह शुमारुय जि तँम्य वँच मेज़ तु वँच कुरसीयि बदलावि।

ऑखुरस वोत वारु कारु सु वख येलि महेश्वर नाथ पानु ह्यड कलर्कु संजि कुरसी प्यठ ब्यूठ। अमि द्रह ओस नु महेश्वर नाथुय योत ख्वश केंह, बँल्यकि ओस दफतरुक दफतरु ख्वश। प्रोन ह्यड कुल्लेक जिंदु लाल ओस रिटायर गोमुत तु तसंजि जायि युस नोव नफर यिनु वोल ओस, तँम्य ऑस पनुन्य तबदीली कैन्सल करनॉवमुच। दपान महेश्वर नाथुन्य पॉठ्य ओस नु तस ति पनुन अफसर त्रावनु खॉतरु तैयार। व्वन र्यतन जाय खॉली रोज़नु पतु आव महेश्वर नाथ, युस कलर्कन मंज सारिवुय खोतु सीनियर ओस, आरज़ी तोर अथ जायि लागनु। अकी वुहुर्य गव सु अँथ्य जायि कनपँर्म। अमि पतु बड्यव महेश्वर नाथस वारय यज़थ तु व्वन्य बन्यव सु महेश्वर नाथुनि बदलु महि काक।

मुलॉजिमन येलि येलि तबदीली ऑस गछान, आर्डर ओस तिमन महि काकुनि अथय मेलान। प्रथ वँरिथि ऑस्य केंह प्रॉन्य नेरान तु नँव्य यिवान। मगर महि काकस ओस अज़ ति सु द्रह वारु पॉठ्य याद येलि सालिग्रामस तबदीली गँयि। अथ कुसस गँयि व्वन्य ऑठ वँरी मगर तमि वख्तुक सीन ओस अज़ ति महि काकस बराबर अँछन तल।

सालिग्राम ओस चपरॉस्य तु सु ओस मटनुक रोज़न वोल। खास पोरमुत न आसनु किन्य ओस नु तस अंगन ऑशनावन मंज ज़्यादु यज़थ। सालिग्रामस ओस नु बोयाह बेन्याह कांह तु मोल ओसुस ल्वकुचारय गुज़र्योमुत। तसंद्य केंह ऑशनाव ऑस्य पाँसु रँग्य जान, मगर सालिग्रामस मदद करुनस मंज ह्योत सारिवुय लोब। तसंज मॉज काकन्य जिगुर रूज बिचॉर लूकन हुंद्य पलव दलव सुविथ गुज़ारु करान। नतीजु द्राव जि सालिग्राम रूद मिडल फेलुय। नोकरी लँगिथुय करुनॉव तँम्य अँकिस बेयिस ज़ारु पारु वँरिथ सिरीनगर तबदीली, तिव्याजि सु ओस नु यछान पनुनिस अलाकस मंज रोज़नु। महि काकुनिस दफतरस मंज वॉतिथ म्यूल तस स्यठाह पानुन्यार। रोज़नु खॉतरु ऑसुस सरकार्य जाय। अखतुय करुनोवुस अतिव्य अँक्य मुलॉजिमन पनुनिसुय गामस मंज अँकिस कोरि सुत्यू नेथुर ति। सालिग्राम ओस बडु ख्वश। मॉज ति ऑसुस ख्वश तु ज़नानु ति। सालिग्रामस येलि

निकु ज़ाव, पूर दफतर वोत तस मुबारकस। महि काक ओस ब्रॉठ ब्रॉठ। यनु सु ह्यड कुल्लेक बन्यव, तनु ऑस्य तस सॉरी मुलॉज़िम पनुन्य संतान हिवी बासान।

वख्तु तु सातु मुतॉबिक ऑस्य सालिग्रामनिस निकस थँद्य ग्रहुद्य। गुरु जियन वोन ज्यनु वख्तु वुछिथुय सालिग्रामस जि तसुंद्य दूह छि जलदुय फेरन वॉल्य। सालिग्राम तु तसुंद्य गरिक्य ऑस्य नु व्यन्नान कुनि। मगर यि खुशी रुज़ नु ज्यादु कालस कँह। सालिग्रामस वँरुख वापस मटन तबदीली। यि कथ बूजिथुय जरद्यव तस बुथ। तस ओस नु पानस वापस गछनस मंज़ त्यूत ओज़ुर कँह, यूत काकन्य जिगरि ओस। स्व ऑस नु कुनि सूरतस मंज़ वापस गछनस तैयार। तस ओस सु वख फीर्य फीर्य प्यवान याद येलि तसुंद्य पनुन्य अंग ऑशुनाव ति सालिग्रामस निचि नज़रि वुछान ऑस्य।

सालिग्रामस तु तसुंद्यन गरिक्यन य्वसु खुशी निकु ज्यथ सपुज़, स्व म्वकुलेयि। हद ओस यि जि तसुंद तबदीली हुंद आर्डर ति ओस बडि दफतरु तमी दूह द्रामुत, येमि दूह निकु ज़ामुत ओस। सालिग्रामस आसु वदन बाकु यिवान। तस गव पूर यकीन जि निकु आसिहे मूलि प्यठ ज़ामुत, मगर गुरु जीयन वोन तस ज़ॉनिथ मॉनिथ अपुज़। काकन्य जिगुर ऑस दबु लॉर हिश पेमुन्न। महि काकुनि कूशिश करनु बावजूद ति ह्योक नु सालिग्रामुन आर्डर कैन्सल गँछिथ। ऑखुर प्यव तस अख र्यथ गँछिथुय मटन नेरुन। मगर नेरनु वख्तु ऑस नु तस काकन्य जिगुर सुत्य कँह। तमि बिचारि वचि नेरनु ब्रॉठुय अँछ। दपान तस गव हेह। महि काकस ओस पूर पॉठ्य याद जि नेरान नेरान येलि तँम्य सालिग्रामस नालुमोत कोर, तँम्य ह्योत टुंगि वदुन। कँछा प्रॉन्य जाय त्रावनु किन्य तु कँछा मॉज मरनु किन्य। महि काकस ति आव पानस ओश।



महि काकन येलि नु वारियाहस कालस कलय थोद तुल, यूसुफ सॉबन दिच तस ज़ीर। महि काकस ओस नु वुनि ति ह्यस बराबर। मुलॉज़िमव द्युतुहँस दिलासु, ठीक तिथय पॉठ्य, यिथु पॉठ्य सु तबदीली गछन वाल्यन दिवान ओस। महि काकन त्रोव ज्यूठ व्वश। ऑनख कोरुन दजि सुत्य साफ। पनुनिस पानस छुनु ल्वन्नर द्युन, यि सूचिथ थोव तँम्य तबदीली हुंद आर्डर कोठुकिस् अँदुरिमिस चंदस तु ह्यँन्न अख फाइल परुन्य। मगर मन ओसुस नु योरुकिस् आलुमस सुत्य कँह। बाक्य मुलॉज़िम गँयि वापस पनुनि पनुनि जायि प्यठ।

अँकिसुय दूहस मंज़ लँज महि काकन्यन अंगन ऑशुनावन पताह जि तस छि तबदीली गॉमुन्न। मगर आर्डर वुछनु वरॉय आव नु तिमन ति यकीन। आथवारि दँय दूहस रुद तसुंदिस गरस मंज़ कॉफी आव गव। ज़ीर्य शामस आव महि काकुन बोड हँहँर गूकल नाथ। तसुंदि यिनु सुत्य बडेयि महि काकस ह्यमथ। तिक्याज़ि गूकल नाथस ओस अख पानस ति कॉफी रँसूख, तु बैयि ओस सु पानु नोकरी हुंदिस सिलसिलस मंज़ वारियाहस कालस वरुमुलि रुदमुत।

महि काकुन नेचुव शिबन जी तु न्वश आशा जी ऑस्य यि आर्डर वुछिथ कँछा ख्वश तु कँछा व्वदॉस्य। ख्वश अमि किन्य जि पनुनि व्यस्तारु मुतॉबिक करुहँन व्वन्य पनुन गरुबार, तिक्याज़ि आशा

जी ऑस नु हशि हुंज व्वथु चँड तु बेहु चँड पसंद। व्वदॉस्य अमि किन्थ जि गरुच आमदँनी गछिहे स्यठाह कम, तिक्याजि वरमुल वँसिथ ओस नु ज़रूरी जि महि काक दिथिहे गर खरुचस क्युत कांह पाँसु। शिबन जीयस ओस पनुन न्यसुब तनखाह पनुनिस इनशोरन्सस तु शुर्यन हुंजि पडायि प्यठुय खर्च गछान।

गूकल नाथुन रसूख चल्यव नु कैह। ऑखुरस गँयि यि कथ स्यकु जि महि काकस पेयि वरमुल गछुनुय। गूकल नाथुनिस वनुनस प्यठ थोव महि काकन पांचन दहन दफतरु वँखसथ। गूकल नाथन सूंच पनुनि जायि जि महि काक पेयि अमि फ्रटु मंजु कडुन तु अमि खॉतरु छु ज़रूरी सु अकि लटि वरमुल चकर करनावुन। चँद्रवारि दह न्युव तँम्य सु पानस सुत्य पनुन गरु, युथ ग्वडु जायि बदली सुत्य तस कैह स्कून मेलि। अमि पतु रूद गूकल नाथ वारियाहस कालस तस तबदीलियन मुतलिक दरस दिवान तु पनुन तजरुबु वनान। महि काकस हेचुन वारु वारु दग कम गछुन्य। अमि पतु द्युत गूकल नाथन तस सलाह जि साम ह्यनु खॉतरु यिमव वरमुल चकराह वँरिथ। महि काक गव ग्वबिरु सानुय तयार।

बोमवारि दह वँथ्य तिम दशुवय वरमुल तु गँयि गूकल नाथुनिस अँकिस यारु सुंद गरु। अँमिस ओस नाव काँशी नाथ। काँशी नाथ ओस तँथ्य दफतरस मंजु नोकरी करान योत महि काक सूजुमुत ओसुख। शामस बाँग्य द्रायि साँरी बाज़रस चकराह करनि। गूकल नाथ ओस कुनि तँरीकु यछान महि काककुनि दिलु मंजु सु वसवास कडुन, युस इनसानस कुनि नवि जायि गछनु ब्रॉठ आसान छु। योदवय महि काकस कुनि सुत्य ति ओस नु दिल लगान, मगर तँम्य वँरु नु कुनि कथि मज़ाहमथ।

बेयि दह न्युव काँशी नाथन महि काक पनुन दफतर। अति ऑस सारिनुय मुलॉजिमन तसंजि तबदीली हुंज ग्वडय खबर, तिक्याजि आर्डर ओस ओत ति वोतमुत। महि काकस करुनोवुख सारिनुय सुत्य तारुफ। मुलॉजिमन मंजु ऑस्य जु नफर तिम ति, यिम महि काकस ग्वडय ज़ानान ऑस्य। तिमव ऑस ब्रॉठ तस सुत्य कॉम वँरुमुच। महि काकस वुछिथ गँयि तिम स्यठाह ख्वश। महि काकस ति गँयि तिमन वुछिथ खुशी, मगर तीच नु कैह यीच तस साहब वुछिथ गँयि। साहबस ओस नाव जलाल साँब तु तँम्य ऑस पनुन्य नोकरी महि काककुनि दफतरु प्यठय शुरु वँरुमुच। जलाल साँब वोथ महि काकस वुछिथुय पनुनि कुरसी प्यठ थोद तु कँरुन तस सुत्य दँस्य पूस्य। महि काकस आयि नु पछ जि जलाल साँबस छुस बु वुनि ति पूर पाँठ्य याद।

यथ दफतरस मंजु ऑस अख नँव कथ ति। अतिकिस ह्यड कलर्कस ओस साहबस सुती अख अलग कैबिन येति जान पँर्नीचरस अलावु टेलीफोन ति ओस। युथ कुसु ओस नु महि काकन बेयि कुनि जायि वुछमुत। व्वन्य ह्योतुन पँज्य पाँठ्य तस ओर यिनु खॉतरु दिल ब्रमुन।

शामस लोग काँशी नाथुनि गरि दरबाराह। दफतरुक्य कैह बेयि मुलॉजिम ति आयि। महि काकस सुत्य लोग तिमव सारिवुय दोस्तानु। तस बास्यव व्वन्य जि नँव जाय छनु नाकारु कैह बँल्यकि छि प्राणि जायि खोतु हथ दर्जु बेहतर। अँक्य कुलर्कन कोर तस तु गूकल नाथस पनुनि गरि साल ति।

काँशी नाथन द्युत नु बूसवारि दह ति महि काकस तु गूकल नाथस वापस गछनु। जलाल साँबन युथुय बूज जि महि काक छुनु वुनि गरु गोमुत, तँम्य बुलोव सु पनुनिस दफतरस मंजु। प्रोन ह्यड

कुल्लेक ओस यछान जल्द अज जल्द नेरुन। अमि किन्य कॅर जलाल सॉबन महि काकस गुजॉरिश जि सु गोछ जल्दुय ड्यूटी प्यठ हॉजिर सपदुन। जलाल सॉबन बुलॉव अखतुय अख मीटिंग ति, यथ मंज कॅहन ज़रूरी केसन आयि साम ह्यनु, तु महि काकुन मशवरु आव हॉसिल करनु। महि काकस बास्यव अमि पतु सु पूर पॉठ्य पनुनुय दफतर। नेरान नेरान द्युत जलाल सॉबन तस पनुन नोव पारकर कलम, युस तसुंदि मुताबिक स्यठाह फ्रूच ओस, तु येमि सुत्य महि काक ओत वॉतिथ कॉम करिहे। महि काकस आव दफतरस सुत्य सुत्य पारकर कलम ति बडु पसंद।

यस ह्यड कुल्लेक सुंजि जायि महि काकस युन ओस, तस ओस नाव गाशु लाल। तस ऑसुख अनंतनाग तबदीली कॅरमुच। तस ओस शेयि वुहुर्य पनुनिस अलाकस वापस गछुन मगर तोति ओस तस अमि दफतरुक फेरान। तॅम्य हॉव महि काकस पनुन्य रोजनुच सरकॉर्य जाय। अॅथ्य जायि ओस महि काकस ओत यिथ रोजुन। जाय ऑस जान बॅड तु साफ सुथरु। खास कॅरिथ ओस नलकु चोकस मंजुय, तु यि कथ आयि महि काकस बडु पसंद। तसुंजि ज़नानि ओस वंदु रॉचन मंज नेबरिमि नलकु प्यठु पोन्थ अनुन सख कूठ गछान। गाशु लालन ऑस्य पनुन्य शुर्य बॉच तु लगबग पनुन सोरुय ज़रूरी सामानु गवडय गरु सूजमुत। मसलु ओस व्वन्य सिरिफ तमि डून्य लॅकरि हुंदि फॅरनीचरुक, युस तॅम्य यिमन ऑठन वॅरियन अति बनोवुमुत ओस। तख्त पोशु अलावु ऑस्य ज़ु डबुल ब्यड तु अख बॅड अलमार्य। यि सामानु थवनस ऑस नु गाशु लालस गरि जायी। मगर महि काकुनि ओत यिनु सुत्य गव तसुंद मसलु हल। महि काकस आव फॅरनीचर बडु पसंद। अमी वख्तु सपुद सोदा तु यिम पाँसु महि काकस परु पेयि, तिम दित्य बासकर नाथन व्वजुम। अख्तुय आव यि फॅरनीचर महि काकुनि मनशा मुताबिक नवि आयि लागनु।

गरु वापस यिनु ब्रॉठ करुनोव गूकल नाथन तु शाम लालन महि काक दीवीबल ति चकराह। महि काकस आव अति मनस बडु स्कून। पनुनिस पानस सुत्य कोरुन असुनाह। सूंचुन, वुछ कथ रुचि जायि तु कुमन रुत्यन इनसानन ओसुस बु दकु दिवान।

येलि महि काक वापस गरु खोत, तस ओस मन शांत। ज़नानि ति वॅनिन सॉरुय दॅलील। स्व गॅयि यि बूजिथ स्यठाह ख्वश जि महि काक ओस व्वन्य वरमुल गछनस पूर पॉठ्य तैयार। मगर अमि अलावु ऑस्य तसुंदिस ख्वश गछनस बेयि ज़ु वजह। अख यि जि महि काकुनिस आमादु गछनस मंज ओस तसुंदिस बॉय सुंद स्यठाह अथु, येमि किन्य महि काकुन्यन नज़रन मंज बासकर नाथुन र्वतबु कॉफी बड्यव। बेयि यि जि शिबन जीयस तु आशा जी तरिहे फिकिरि, कॉसि जिठ्य सुंदि सुत्य कॉचाह शूब छि गरस आसान। तस ऑस नु कथि कथि प्यठ आशाजी हुंज नस तालि प्यठ खारुन्य व्वन्य पसंद।

बटुवारि दूह सुबहस गव वारु कारु महि काक पनुन दफतर। रिलीव गछनु खॉतरु ओस अमि दूह बाह बजे तामुय साथ। दफतर नेरनु ब्रॉठ कॅर्य महि काकन पनुन्य ज़नानु, बासकर नाथ, नेचुव तु न्वश कॅह ज़रूरी सामानु ह्यथ, यथ मंज मसनंदु, स्टोव, ख्यनु चनुक्य ज़रूरी बानु बेत्रि शॉमिल ऑस्य, वरमुल रवानु। अज ओस नॅविस गरस अचुनस तु नोव चूलु ज़ालुनस ति बाह बजे तामुय साथ। फॉसलु सपुद जि महि काक वाति रिलीव गछनु पतु स्योदुय वरमुल।

दफतर वॉतिथुय बुलोव महि काकन रोशन लाल तु पृछुनस साहबस मुतलिक। तँम्य वोनस जि साहब छु च्रीरी यिनु वोल, तिक्याजि सु छु मीटिंगि मंज गोमुत। महि काक गव यि बूजिथ परेशान। खबर साहब वात्या बाह बजे तान्य वापस? तोति ज़ोन नु महि काकन वख ज़ायि करुन मुनॉसिब। तँम्य ह्योत पनुन 'हैंडिंग ओवर नोट' बनावुन। अज़ ओस नु तस अथ दफतरस मंज बिलकुलुय दिल लगान। बाक्यन मुलॉजिमन वँन्य नु तँम्य पनुन्य वरमुल गछनुच शोछ कैह। बाह बजे तामुय जान साथ आसनुच कथ वँन्य तँम्य ल्वति पॉठ्य रोशन लालस, मगर सु क्याह करिहे? साहबु सुंदि यिनु वरॉय मा हेकिहे किहीन्य सपदिथ? तोति थोव तँम्य तीतिस कालस महि काकुन रिलीविंग आर्डर बनॉविथ।

साहब आव बराबर दूनि बहि। महि काक ओस 'रिलीव' गछनु खॉतरु बेताब। बाक्य सॉरी मुलॉजिम ऑस्य दिल मोलूल। तिम ऑस्य नु तस ब्रॉठ कुन बँहरानुय यिनस। तिहँदि मुतॉबिक ओस महि काक बुथ त्रकुर वँरिथ नेरनुच जलदी हावान, मगर च़कि आसिहे सु अँदुर्य अँदुर्य चँदुरगोम वोतुमुत।

महि काक च़ाव नु पानु साहबस निशि कैह। तस ओस व्वन्य साहबु सुंद बुथ वुछुन ति खरान। महि काकुनि मुतॉबिक अगर साहबन योछमुत आसिहे, तसंज तबदीली रुकावुन्य ओस नु कैह मुशिकल। मगर यि ऑस प्रॉन्य कथ। महि काक ओस नु व्वन्य अथ दफतरस मंज मँज़ीद अख दूह ति यछान रोजुन। सु ओस अमि दफतरु मंजु जल्द खोतु जल्द नेरनस तु वरमुल गछनुच बेताब। तस ओस नु यि दफतर व्वन्य नवि दफतरुक पहा ति बासान।

महि काकन कोर रोशन लालस आलव तु कोरुनस पनुन हैंडिंग ओवर नोट हवालु। अथ नोटस ओस तँम्य जलाल सॉबुनि फ्रीचि पारकर कलमु सुत्य दसखत कोरमुत। रोशन लालन ति कोर अथ पनुन दसखत तु च़ाव साहबस निशि। महि काकुन रिलीविंग आर्डर ति न्यून सुत्य। अँदुर गँयि क्याहताम कथकथ। शायद ओस रोशन लाल साहबस बाह बजनु ब्रॉटुय रिलीविंग आर्डरस दसखत करनु खॉतरु इसरार करान। अमि पतु बूज महि काकन वारु, साहब तु रोशन लाल ऑस्य अख अँकिस वछि वालिंजि मुबारक करान। महि काकस आव पूर पॉठ्य समुज जि साहब तु रोशन लाल ऑस्य दूशवय तसुंदिस नेरनस ख्वश। मगर महि काकस ति ऑस नु कम खुशी कैह, तिक्याजि तसुंदि अंदाज़ु मुतॉबिक सपुद अँदुर बाह बजे ब्रॉटुय काकुदस दसखत।

कैह कालु पतु द्राव रोशन लाल साहबु सुंदि कमरु मंजु न्यबर। महि काकुन हैंडिंग ओवर नोट ओसुस खोवरिस अथस मंज। दँछिनि अथु कोड तँम्य चंदु मंजु ब्याख काकुद तु त्रोवुन महि काकस ब्रॉठ कनि। महि काकस फ्वलेयि ब्वकु। बाह बजनुस ऑस्य वुनि ति ज़ु मिनट बाक्य। रोशन लालन रोट माहि काकुन अथु ज़ोरु तु कोरुनस मुबारक। तस वुछिथ आयि बाक्य मुलॉजिम ति ब्रॉठ कुन तु कोरुहँस मुबारक, तिक्याजि बाह बजे ब्रॉटुय रिलीव गछनुच कथ ऑस नु तिमन निश ति च़ूरि कैह रुज़मुच। महि काक ओस नु काँसी हुंद कैह बोज़ान। सु ओस न्यसुब वरमुल वोतुमुत।

महि काकन लोग ऑनख। ख्वश गँछिथ मुच़रोव तँम्य रोशन लालुन काकुद तु ह्योतुन परुन। काकुद पँरिथुय गव तस हेरिम शाह ह्योर तु बँनिम शाह व्वन। दम फुट्य गँछिथ रुद सु गरा अथ काकुदस वुछान तु गरा जलाल सॉबुनिस फ्रीचिस पारकर कलमस।

साहबन ओस ज़बरदस्त रसूख लडॉविथ महि काकुन तबदीली हुंद आर्डर कैन्सल करुनोवमुत।



शमीम

चोक दारि प्यठ बिहिथ गौरी आँस मुदय गँडिथ बंटी कुन वुछान। बंटी आँस त्रु वॅरिश कूर, स्यटाह ख्वश यिवन्य तु तेज़। गोल छिटि फ्राक लॉगिथ येलि स्व आंगुनस मंज़ गिंदनि आँस वसान, गौरी आँस कॉम कार त्रॉविथ तँस्य कुन लगान। पनुनि खोतु वॉसि मंज़ बजन कोर्यन सुत्य आँस बंटी तिथु पाँठ्य गिंदनस मंज़ मस्त, ज़न तु तिम सारेय तस वुमरन हुंज़ु व्यसु आसु। ज़मरुदुन्य कूर सनोबर - शु वॅरिश, हँनीफुन्य कूर तमन्ना - चु वॅरिश, शीलुन्य कूर रोज़ी - पांचु वॅरिश, तु रँफीकुन्य कूर मसरूर गुल लग बग साडु पांचु वॅरिश। गिंदनस मंज़ ति ओस साफ बासान ज़न तु सारिनय स्वय मँनीटर आँस। प्रथ दूह ओस गिंदन बाज़ तसुंदी प्यठु शुरू सपदान। पनुनि ल्वकटि अथु मंज़ु पाँछ टींकु फॅल्य पथर त्रॉविथ येलि स्व 'ऐलासन वॅडिये वॅडिये' वनान आँस, गौरी हुंदिस दिलस आसु श्राकु वसान। बंटी हुंदिस बुथिस मंज़ ओस तस पूर पूर शमीमुन बुथ यिवान बोज़नु। शमीम आँस बंटी हुंज़ मॉज मगर स्व आँस नु तस सुत्य रोज़ान। बंटी आँस रोज़ान नानि तु बुड्य बबस सुत्य, यिमन स्व अमी तु अबु वनान आँस।

बंटी आँस पनुनि नानि हुंद तु पनुनिस बुड्य बबु सुंद कुल जहान, तु अँमिस आँस्य नु तिम बाँचु ज़ु अँकिस रञ्जि ति दिवान अँछव निशि दूर गछनु। तसुंदान ल्वकुट्यन ल्वकुट्यन अथन तु ख्वरन आँस्य तिम हति हति लटि बलायि तु रतुछेपि लगान। दूहस आँसिस कम अज़ कम त्रेयि लटि वुशानि पानि सुत्य श्रान करान तु पलव बदलावान, मगर प्रथ लटि आँस स्व छिफ दिथ आंगुनस मंज़ वातान तु टींकु फॅल्य सॉबुरॉविथ व्यसन प्रारान। यीतिस कालस तस लछि सुत्य पलवन ल्युथ गछिहे, तीतिस कालस आँसिस अमी तु अबु दारि प्यठु नज़र थवान। ठाख आँसिस नु करान केंह, तिक्याज़ि बंटी ओस बडि वनुन सख दिलस लगान तु स्व आँस सोरुय अँती त्रॉविथ कुनि कूनस मंज़ कलु ब्वन कुन थँविथ ब्यहान। यि ओस नु अमी तु अबस बरदाश गछान तु तस केंह वनुन बदलु आँस्य तिम पानसुय मलामथ करान।

गौरी ति आँस बंटी स्यटाह टॉठ। बंटी हुंद बुड्य बब खलील अहमद तु नान्य सारु आँस्य यिहुंदिस मकानस पँत्य किन्य रोज़ान मगर गौरी हुंदि चोक दारि प्यठु आँस यिहुंदिस गरस तु आंगुनस प्यठ पूर नज़र। गौरी ओस अथ गरस सुत्य व्वन्य बराबर त्रुहन वॅरियन हुंद वास्तु। योदुवय अथ मँहलस मंज़ बसन वॉल्य सॉरी लूख जान आँस्य, मगर खँलील अहमद तु सारु आँस्य ज़्यादय पहान ख्वदा सॉबस खोचान। यिमन दून हू नेक ओस नु बेयि कांह। सारस ति आँस गौरी सुत्य सख बराबँदी। आसिहेस ति क्याज़ि नु? वॉर्युव यिथ युस पानुन्यार तस गौरी होव, सु ओस नु मँशरावुन लायख। खँलील अहमद ओस गौरी खास पनुन्य बेनि समजान, तु तमि किन्य ओस तस अथ गरस मंज़ सख यज़थ। खँलील अहमदस आँस नु पनुन्य बेनि कांह।

गौरी हुंदिस रुनिस ओस नाव काँशी नाथ। सु तु खँलील अहमद आँस्य सरकाँर्य मुलाँजिम तु दूनवुन्य ओस पानुवँन्य सख दोस्तानु। मँहलस मंज़ ति ओस दूशवुन्य जान यज़थ तु साँरी आँस्य काँशी नाथस बोबूजी तु खँलील अहमदस खँलील साँब वनान।

बंटी आँस व्यसन सुत्य टीकन गिंदान। गौरी पेयि नज़र। सारु आँस पनुनि दारि प्यठ बिहिथ शुर्यन हुंद तमाशु वुछान। गौरी कोर तस आलव। सारन तुल कलु थोद तु गौरी कुन वुछिथ हेचुन पनुनिस बुथिस रछाह शाँद्य अनुनुच कूशिश करुन्य, मगर अथ मंज़ गँयि नु स्व कामयाब केँह। सारस आँस बुथिस दुह्य छ्यतय तु गौरी निश रूद नु तसुंद अँदरिम दोद चूरि केँह। तस पेयि स्व सारु याद खसु नँवुय नँवुय आँस महारेन्य बँनिथ खँलील साँबुन गरु आमन्न, तु खसु ग्वडु ग्वडु अँथ्य दारि प्यठ बिहिथ गौरी वुछिथय दार बंद करान आँस।



काँशी नाथुनि खांदरु पतु सपुद खँलील अहमदुन खांदर अकि वुहुर्य। सारा जी येलि न्वश बँनिथ आयि, पूर बेग खांदानस गँयि खुशी। मकानस आव हेरि ब्वन बिजली ज़ूल करनु। खँलील अहमदुन मोल रँहीम साँब ओस तमि सातु ज़िंदय। तस आँस नु पछ यिवान। तसुंद बोड नेचुव जलालदीन, युस खँलील अहमदस पांछ वँरी बोड ओस, ओस स्यठाह काल ब्रोंठ दुबई गोमुत तु तँत्य बस्योमुत। तसुंद खांदर ति सपद्यव तँत्य। रहीम साँबस ताम रूद नु किहिन्य। रँहीम साँबस ओस गरस मंज़ न्वश अनुनुक सख शोख तु यि शोख गव तस खँलील अहमदुनिस खांदरस प्यठ पूर। रँहीम साँबन कोर खांदरस प्यठ दिल खूलिथ खर्चु। मँहलु न्यबर ति आव वारियाहन लुकन साल करनु। बटन हुंदि खॉतरु ओस अलग इन्तिज़ाम, तु यि इन्तिज़ाम ओस रँहीम साँबुनिस वनुनस प्यठ पानु काँशी नाथन कोरमुत। सारा जी आँस व्वन्य पूर मँहलुच न्वश, ठीख तिथय पाँठ्य यिथु पाँठ्य अख वँरी ब्रोंठ गौरी जी आँस। वख गुज़रिथ बनेयि सारा जी सिर्फ सारु तु गौरी जी सिर्फ गौरी।

गौरी आँस पूर पाँठ्य स्व विज़ याद येलि खांदरु पतय तसुंद तारुफ सारा जी सुत्य यि वँनिथ करनु आव ज़ि यि गँयि खँलील साँबुन्य बेनि। सारा जी हुंदि खॉतरु आँस यि बिलकुक नँव कथ। स्व आँस हॉरान ज़ि हरगाह खँलील साँबस पनुन्य कांह बेनि आँस नु, तँम्य क्याज़ि बनाव नु मँहलुच कांह मुसलमान कूर बेनि? मुसलमान बोय तु बटु बेनि! यि कति चलि? खँलील साँबुन केँचन ज़रूरी कथन मंज़ गौरी सुत्य मशवरु करुन ति ओस तस गलथ बासान। साँचान आँस, 'बटस क्याह पताह मुसलमान रस्मु रेवाजन हुंज़?' स्व रूज़ ज़्यादु तर गौरी निशि लोब हेनुच कूशिश करान। मगर केँह वख गँछिथुय बदलोव अँक्य वाकुहन तसुंद यि साँचुन पूर पाँठ्य।

सारा जी आँस बाँय सुंज़ि निशानि प्यठ माल्युन गँछिथ वापस आमन्न। गौरी येलि तसुंदि यिनुच पताह लँज, स्व गँयि तस मुबारकस। आँलु नाबद लिफाफु तु मिठायि डबु सारा जी हुंदिस हलमस मंज़ त्रॉविथ कोर गौरी तस मुबारख। गोबरिथुय 'सलामथ' वँनिथ वँछ सारा जी थोद तु चायि किचुनस मंज़, यि वँनिथ ज़ि मे छु अँदरु बतु लाँगिथ। खलील साँबन ओस नोवुय नोवुय गैस दान औनुमुत, तु सारा जी ओस वुनि ति तथ पयठ रनुन प्यवुन कूठ बासान। गौरी गव सारा जी हुंद

दँल्यत्रॉव्य वरताव वुछिथ स्यटाह दिल खराब। तमि हेच वापस नेरनुच सखर करुन्य जि अचानक गँयि अँदरु किचनु प्यठु सारा जी हुंज क्रख। गौरी छुन्य अंदर व्वठ तु अति वुछुन नारु जमु जमु। गैस दानु मंजु ओस गैस नीरिथ चोलमुत तु सारा जी हुंदिस फ्यरनस ह्यथ ऑस सॉरिसुय रेह। गौरी हेच द्यमागस कॉम तु नारु तु दुहि मँज्य गँछिथ कोरुन ग्वडु गैस बंद। अमि पतु कोडुन सारा जी फ्यरन नालु तु द्युतुन साँदरि मंजु बँरिथ। यीतिस कालस सारा जी ह्यस आव, तीतिस कालस ओस गौरी हचिवि अलमारि तु अथु तुचन पोन्थ त्रॉविथ नारु छेवरोवमुत। यि करान करान लोग गौरी पानु ति अथन, बुथिस तु मस्तस छ्वख, मगर पनुन परवाय नु वँरिथ वँर तमि सारा जी अथस थफ तु वँडुन किचनु मंजु न्यबर। तस ऑस वुनि ति थरु थरु। गौरी बेहनाँव स्व पलंगस प्यठ तु श्रानु कुठि मंजु ओनुन छाँडिथ टुथ पेस्टुक ट्यूब। येत्यथ येत्यथ सारा जी पान ओस दोदमुत, तत्यथ तत्यथ लोगुनस ट्यूब मंजु वँडिथ पेस्ट। अमि सुत्य पेयि सारा जी शेहलथ, पानस ति तु दिलस ति। गौरी हुंद दोदमुत मस तु अथु वुछिथ आयि सारा जी अँश बुकु तु तमि मँज तस मॉफी। ज़ीर्य ओन खँलील सॉबन डाक्टर गरु, येम्य तस क्युत दवाह तु मँहलाम ल्यूख। अमि दूह रुज गौरी रातस तँस्य निश, तस दवाह ख्यावान तु दँद्यमुतिस मँहलाम लागान। अमि वाकाह पतु वँर नु सारा जी गौरी ज़ांह व्वपर नज़र, बँल्यकि बासेयि तस व्वन्य स्व खास रेदुच बेनि।

गौरी तु सारस ओस मिज़ाज़ ति रलान तु तकदीर ति। गौरी ज़ायि कूर तु तस पतय ज़ायि सारस ति कूर। सारुनि कोरि थोवुख नाव शँमीमु तु गौरी हुंजि कोरि संतोशु। दूशवय कोरि बडेयि अँक्यसुय माहोलस मंजु। अख अँक्यसुंद गरु रूद तिमन सख युन गछुन तु अख अँकिस सुत्य रोज़ु तिमु नॉली नाल, बिलकुल तिथय पॉठ्य यिथु पॉठ्य तिहँजु माजि आसु। क्वदरतन ति वँर यिमन दून गरन कुनी नज़र। अकि कोरि पतु न ज़ाव गौरी कांह बचु तु न सारस।

शँमीमस ऑस्य लोलु सान शमु वनान तु संतोशस तोशु। मिज़ाज़स मंजु फख्र ऑसिथ ति ओस यिमन दून पानुवँन्य त्युथ सलाह जि सोरुय मँहलु ओस वुठ च़ापान। कॉशी नाथस प्यव पनुनिस मकानस पँत्यमि तरफु दरवाज़ु च़टुन, युथ ज़न शुर्यन यिनस गछुनस आसॉनी गछि। अख अँकिसुंदिस गरस मंजु ख्यनस चनस ति ओस नु शुर्यन ठाख कँह। यस येति ख्वश करिहे, स्व तति खेयिहे। दूनवय कोरि गँयि अँकिसुय सकूलस तु तमि पतु अँकिसुय कालिजस।

संतोशस ओस छोप स्वबाव। स्व ऑस नु ज़्यादु कथु करान मगर दिलु ऑस नर्म। कॉसि हुंद तकलीफ वुछुन ओस नु तस बरदाश गछान। बकार ऑस प्रथ कॉसि यिवान मगर ज़्यादु अँज्य मँज्य ऑस नु सपदान कँह। अथ बर-खलाफ ऑस शँमीमु तेज़ तरार। प्रथ कॉसि सुत्य योरय ज़ान करान तु शेछ खबर पृछान। पानु असुनस तु दोयिम्यन असुनावुनस मंजु ऑस स्व ताक। मज़ाँकी यिछ जि तसंजु कथु बूजिथ ऑस हमसायि ज़नानन तु कोर्यन हल्यन दग करान। मँहलु वॉल्य ऑस्य ग्वतन गछान जि येलि स्व खांदर वँरिथ पनुन वॉर्युव गछि, तिम किथु पॉठ्य रोज़न तस वरॉय ज़िंदु।

यीतिस कालस शमीमन तु संतोशन बी.ए. कोर, तीतिस कालस गँयि मँहलस छलु तु फलु। कँह मुसलमान गरु गँयि बछु पूर तु दरगाह बसनि, तु कँह बटु गरु खँत्य बरज़ुल तु छानु पूर। तिहँजि जायि आयि नँव्य लूख बसनि। प्रान्यव गरव मंजु रूद्य अथ मँहलस मंजु व्वन्य वँच्र ताम गरय। सारुन्य तु गौरी हुंद्य ति द्रायि नु कँह। त्युहुंद वनुन ओस जि 'नवि जायि हय गछव तु क्याह करनि? असि कम

नेचिव्य छि जि तिमन कित्य थवव बुंगलु बनॉविथ।' बेयि ओस तिमन बासान जि अमि मँहलुक ह्यु माय मोहबत मेलि नु बेयि कुनि जायि। शँमीमु तु संतोशु ति ऑस्य नु यछान कुनि सूरतस मंज पनुन्य जाय त्रावुन्य तु अलग गछुन।

मगर वख छुनु काँसि प्रारान। ऑखुर वॉन्न स्व विज येलि कोर्यन यि मँहलु त्राँविथ गछुनुच वॉर्य वॉन्न। मॉल्य माजि ह्योत दूनवुन्य खांदर छांडुन। खांदरकिस मामलस मंज ऑस दूनवँन्य गरन हुंज राय अलग। गौरी तु बोबूजी ऑस्य संतोशुनि खॉतर नोकरी पेशु लँडकु छांडान तु सारस तु खँलील साँबस ओस शँमीमुनि खॉतर तिजारथ पेशु लँडकु पसंद। खँलील साँबस ऑस नु नोकरी करन वॉलिस लँडकस सुत्य बराबँदी। दपान ओस 'नोकरी गँयि चाकरी। प्रथ अफसरु संज खँदमथ ति करुन्य तु तिहँज बेजती ति हेन्य। पनुन्य कॉम गँयि पनुनी कॉम। नफा हरगाह चोर आनु कम ति आसि, मगर पनुन पान छु पादशाह। शंगुन खार तु व्वथुन डवड खार।' बोबूजीयस ओस नु खँलील साँबुनि अथ कथि सुत्य यितिफाक। सु ओस वनान जि 'सरकार्य नोकरी गँयि सरकार्य नोकरियी। रथ गँछिथ पनुन्य तनखाह हँन गरु अनुन्य। न तनखाह कम गछुनुच परेशॉनी तु न नोकरी मंजु वँडिथ छुननुक गम। बापार छु पँज्य पॉठ्य दँरियाव मगर अथ छु गरा युप तु गरा ख्वशकी। सरकार्य नोकरी गँयि पां ज्वयि हेन, हमेशि पकवुन्य।' मगर खँलील साँबुनि खॉतर ओस यि ज्यूठ फलसफु। सु ओस नु अथ फलसफस सनुन यछान। तस ओस बासान कारुबारुय ठीख। तस ओस यूत बोड गँछिथ ति पनुनिस मॉल्य सुंद कीनु जि तँम्य द्युत नु तस कारुबार करनु।

संतोशुनि खॉतर आयि शुपयनुकिस अँकिस लडकु संज टेकिन्य। लँडकु ओस ओसूद हाल तु नोकरी ति ऑसुस जान, मगर गौरी आयि नु बराबँदी। तस ओस शुपयन स्यठाह दूर बासान तु यूत दूर ऑस नु स्व कूर दिनस तयार। यिथय पॉठ्य आसु शँमीमस ति खानुयारु अँकिस जायि कथु यिवान। लडकु ओस जान पोरमुत तु अँमीर गरुक मगर वॉसि ओस शँमीमस सथ वँरी ज्युठ। अति आयि नु खँलील साँबस बराबँदी। दोपुन, ज़ चोर वँरी वॉसि फखँ आसुन्य गव ठीक, मगर सथ वँरी गव ज़्याद।

ऑखुरस वोत सु वख येलि दूनवुन्य गरन पनुनि पनुनि पसंदुक्य लडकु मील्य। खांदर सपुद। संतोशु वॉन्न राजु बाग तु शँमीमु व्यन्नार नाग। संतोशुन महाराजु सतीश कुमार ओस इंजीनियर तु शँमीमुन महाराजु मुशताक अहमद ओस कॉलीनु एक्सपोर्टर। दूनवय गरु ऑस्य ख्वश।

बोबूजीनि रिटायर गछुनु ब्रॉटुय तु खांदर पतु डवडि वुहुर्य ज़ाव संतोशस लँडकु। हालांकि संतोशुनि हशि निश ओस कूर गोबुर आसुन कुनी कथाह, मगर पनुनिस गरस मंज नेचुव ज्यथ हेच नु तमि पनुन्य खुशी चूरि थँविथ। स्व ऑस संतोशस हति हति लटि बलायि लगान। बोबूजी तु गौरी ति ऑस्य स्यठाह ख्वश।

संतोशुनिस नेचिविस थोवुख नाव राजु। येलि ति संतोशु माल्युन यियिहे, राजूहस ऑस पनुनि माजी हवालु करान। खँलील साँब तु सारु ति ऑस्य राजूहस वुछिथ शाद सपदान तु क्वदरतस मंगान जि शँमीमु ति गँछ वँल्य वँल्य मॉज बनुन्य।

वख गव पकान। राजु ओस मातामालु रोजुनस मंज ख्वश। तस ऑस अतिक्थन मँहलु शुर्यन सुत्य सख बराबँदी। नानि तु बुड्य बबस सुत्य रोजुन तु तिमन सुत्य गिंदुन ति ओस तस ख्वश

करान। ज़ु चोर दूह मालिनि बिहिथ येलि संतोशु वापस वॉर्युव नेरिहे, राजू ओस वदन वान लागान। सु ओस नु मानानुय तति नेरुन। मगर क्वदरतस ओस नु शायद तसुंद मातामालु ज़्यादु रोज़ुन पसंद। सतीश जीयस बनेयि कलकताहु जान नोकरी। तँम्य हेच़ नेरनुच सखर करुन्य। तसुंदिस मॉलिस माजि ओस नु तसुंद दूर गछुन जान लगान, मगर सतीश जीयस ऑस नु कॅशीरि हुंज़ि नोकरी सुत्य बराबंदी। मॉलिस माजि हुंज़ि नीम मर्ज़ी सुत्य द्राव सु ग्वडु पानु तु कॅह कालु पतय नियन संतोशु तु राजू। बोबूजीयस तु गौरी लॅज यि कथ तेलि पताह येलि सतीश जी तकरीबन नेरुनस तैयार ओस। सतीश जीयन ऑस नु तीतिस कालस ज़नानि सुत्य ति अथ मुतलिक दिल खूलिथ कथ वॅरमुच़। संतोशस ओस कनन गोमुत, मगर यूत जलुद सपदि यि सोरुय, अमिच रुज़ नु तस खबर। तस ति ओस मॉलिस माजि निशि दूर गछुनस प्यठ जिगर छयनान। स्व ऑस सौंचान 'मे वरॉय कुस छु तिमन? क्वदरथ रॅछिन, अगर ह्योर ब्वन कॅह गछि तु कुस पृछयख?' मगर तस ताम ओस नु किहिन्य। रुनिस मा त्राविहे ?

कोरि ज़ामतुरि सुंदि न्यबर नेरनु सुत्य सपुद बोबीजीयस स्यठाह दूख। गौरी गव हेरिम शाह ह्योर तु बॅनिम शाह ब्वन। तिमन दून बॉच़न ऑस व्वमेद ज़ि खांदरु पतु लागि ज़ामतुरुय तिमन नेचुव तु सु आसि ज़नानु ह्यथ बडि दूह ल्वकटि दूह त्युहुंद गरु यिवान येमि सुत्य त्युहुंद ऑखुरी वख खुशी सान गुज़रि। गौरी दिचॉयि नु शुपयन अमि किन्य कूर ज़ि शुपयन ओस स्यठाह दूर। चूकि तस ओस नु बेयि कांह औलाद, तमि किन्य ति ऑस स्व यछान कोरि हुंद नॅज़दीखुय रोज़ुन, युथ ज़न वख़्तु विज़ि अख अँकिस बकार यिहँन। व्वन्य गव सॉरिसुय अलदु बदल। क्वदरतुक्यन रंगन प्यठ आव गौरी कॅछा असुन तु कॅछा वदुन। मगर तोति वॅर तमि कोरि ज़ामतुरिस ऑही। क्वदरतस मॉगुन, येति रोज़न, ख्वश रुज़िन।

गौरी हुंद्य बॉच़ ज़ु गॅयि व्वन्य पूर पॉठ्य कुनी ज़ॅन्य। कोरि ज़ामतुरि सुंदि खोतु ओस तिमन राजू सुंद फेरान। तसुंद अडु कजि ज़बॉन्य मंज़ कथ करुन्य याद वॅरिथ ओस गौरी हुंदिस दिलस तीलु तँल्युन लगान। आ, अख सथ ऑसुख। शॅमीमु येलि माल्युन यियिहे, तिमन ति ऑस नज़र दिवान तु कामि ज़ु वॅरिथ नेरान। गौरी तु बोबूजीयस ऑस ग्वडु प्यठय तस सुत्य सख लय, मगर संतोशुनि न्यबर गछुनु प्यठु गॅयि स्व तिमन ज़्यादय पहान टॉठ। कॅह वख गॅछिथुय ज़ायि तस कूर। बराबर गुडिया हिश। गौरी येलि तस मुबारख करनि गॅयी, तस बास्यव ज़ि शॅमीमु ऑस नु ख्वश कॅह। यि ओस नु पताह लगान ज़ि स्व ऑसा कूर ज़्यनस बेज़ार किनु बेयि कांह दोद ओस तस अँदरी ख्यवान, मगर शॅमीमन वॅर नु अथ मुतलिक कांह कथ। वारियाह कालु प्यठु वोत खॅलील सॉबस तु सारस ति पनुनि कोरि मंज़ क्याहताम दुल मुल ह्यू बासान। प्यठु ओस नु मुशताक सॉब ति तिथु पॉठ्य होवुर यिवान कॅह। मगर शॅमीमु ऑस वनान ज़ि सु छु कारुबारस सुत्य सख आवुर, नतु छु सोरुय ठीख।

गौरी हुंद्यन दून बॉच़न युथ तकलीफ तकदीरन कुनुय औलाद दूर वॅरिथ द्युत, सारुन्य ज़ु बॉच़ ति रूद्य नु अमि निशि मुछि। मगर त्युहुंद तकलीफ आव बदल बुथ लॉगिथ। दॅलील ऑस यि ज़ि शमीमस तु मुशताक सॉबस ओस नु खांदरु पतु ज़्यादु कालस सलाह रूदमुत। यीतिस कालस मुशताक सॉबुन मोल ज़िंदु ओस, तीतिस कालस रुज़ यि कथ अँदर्य अँदरी, मगर तसुंदि गुज़रनु पतु लॅज अथ हॅर। मुशताकन्य मॉज ऑस यछान तस पनुनि बेनि हुंज़ि कोरि मयमूनस सुत्य खांदर

करुन, मगर मुशताकुन मोल कॉसिम सॉब ओस नु अथ रिशतस तयार। मोन जि मयमूनन मोल ओस जान रईस, मगर कॉसिम सॉबस ओस नु यि रिशतु पसंद। तस ओस पूर बिहिथ जि ख्वसु कूर कॉफी दाज दहेज ह्यथ यिवान छे, स्व छे वॉरिविस मंज प्यठोवुली करान। तमि वरॉय ति ऑस नु कॉसिम सॉबस मयमूननिस गरस सुत्य बराबंदी। तसुंदिस खयालस मंज ऑस्य तिम सॉरी नॅजली।

मुशताकस ओस माजि सुत्य जान मगर मॉल्य सुंद दिल ति ओस नु सु फुटरावुन यछान। मॉलिस ब्रॉह कनि मजबूर सपदिथ ओस तॅम्य शॅमीमस सुत्य खांदर करनस आंकार ज़रूर कोरमुत, मगर दिल ओस तस हमेशु मयमूननिस गरस तु तसुंदिस दौलतस मंज। मयमून ऑस मॉलिस माजि तु त्रेन प्यत्रन मंज कुनी कूर। खांदर पतु कमय कॉल्य योदवय मुशताक सॉबस तु शॅमीमस पानुवॅन्य दूर्यर ओसुन ह्योतमुत लगुन, मगर कॉसिम सॉबस निश ऑस यि कथ चूरि आमुन्न थवनु। शमीम ऑस कॉसिम सॉबस सख खॅदमथ करान। कॉसिम सॉबस ओस नु सेहत ठीख तु स्व ऑस नु तस अथ हालतस मंज कुनि कुस्मुक दुख वातुनावुन यछान। सॉचान ऑस, बचु ज्यथ सपदि पानय सोरुय ठीख। मुशताक सॉबस ओस खोफ जि अगर तसुंदिस मॉलिस कुनि कथि हुंद पताह लागि, सु मा थवि ब्रॉतुय ओड जादाद शॅमीमनि नावु वॅरिथ। कॉसिम साबुनि गुजरनु पतु गव मुशताक सॉबुन तु तसुंजि माजि हुंद सोरुय खोफ खत्म। व्वन्य हेच तिमव ननि वानु न्वश सतावन्य।

वारु वारु ह्योतुन शॅमीमस गरस मंज वॅदरु रूग वोथुन। यीतिस कालस पिल्योस, तीतिस कालस थॅवुन यि कथ मॉलिस माजि निशि चूरि। येलि सॅर्य पेट्य सॅहलाब गोस, तस प्यव तिमन सोरुय वनुन। सारस कलेयि यि बूजिथ ज्यव। 'कस मोसूम कोरि क्याह गोम?' खॅलील सॉब गव रोटु। समुज आस नु किहिन्य। कोरि सुत्य वॅरुन कथ मगर तस ओस अँदरी वठ गोमुत। दोपुनख कथ छि व्वन्य हदु न्यबर द्रामुन्न, मगर हरगाह तोह्य तोति मुशताक सॉबस सुत्य यछान छिवु कथ करुन्य, मे छुनु कांह हरजु। सारु पेयि पथर। तस फीर वॉलिंज दुबु। येलि यि कथ गौरी तु कॉशी नाथन बूज, तिमन गव हेह। तिमन ओस ब्रॉतुय संतोशुन दूर गछुन कूठ प्योमुत, व्वन्य पेयख यि ब्याख त्रठ।

खॅलील सॉब तु बोबूजी गॅयि शॅमीमनि हशि सुत्य कथ करनि। मुशताक सॉब ति ओस तॅत्य। कथ सुदरेयि नु कॅह। तिमव वोन साफ लफ़्जन मंज जि तलाक वरॉय छुनु बेयि कांह फॉसलु तिमन मंजूर। शॅमीम ऑस अकि कोरि हुंज मॉज ति मगर अमि कथि हुंद ओस नु तिमन कांह परवाय। तिम ऑस्य सिर्फ फॉसलु यछान, अदु यि तिमन हुन पेयि, ति दिन। खॅलील सॉब तु कॉशी नाथ आयि फुटमुत्यव क्वठ्यव वापस।

शॅमीमुन हाल बूजिथुय आयि संतोशु कलकत्ता प्यठु। तसुंज हालथ ऑस दूरि बिहिथ ज्य़ादय खराब गॉमुन्न। तमि वॅर बडु कूशिश मुशताक सॉबस समजावनुच मगर नॅतीजु द्राव नु कॅह। मुशताक सॉबस ऑस क्वकरस कुनी जंग। तसुंद वर्ताव वुछिथ वोत संतोशस ति दुख। तमि ह्योक नु शॅमीमस दिलासु दिनु वरॉय बेयि किहिन्य वॅरिथ।

अमि पतु गॅयि तलाक खॉतरु मॅज़ीद कारवॉयी। दुशवय फिरीक बीठ्य तु आव फॉसलु करनु। सु फॉसलु, येमि किन्य शॅमीमुन्य जिंदगी व्वजारु गॅयि। तसुंद दुनियाह गव वुछान वुछान खत्म। शॅमीम ऑस नु कूर त्रावनस तैयार मगर अथ मंज आयि नु मुशताक सॉबुनि तर्फु कांह रुकावठ। सु ओस नु

पानु ति यछान कोरि पानस निश थवुन। महरुक्य पंदाह सास तु कोरि हुंदि रछनु खॉतरु यकमुशत रकम द्युत मुशताक सॉबन असान असान। तु अँथ्य सुत्य वोट शँमीमस सुत्य तसुंद रिशतु अंद।

शँमीमु पेयि वँसिथ। मुशताक सॉबस सुत्य खांदरु पतय ऑस तस अँकिस जान दफतरस मंज नोकरी मेलान, मगर मुशताक सॉबन दिच नु तस नोकरी करनु। दोपुनस सॉनिस गरस मंज छनु काँसि ज़नानि नोकरी वँरमुच। शँमीमन सूंच, अज़ हरगाह तस स्व नोकरी आसिहे, स्व हेकिहे पनुन तु पनुनि कोरि हुंद पान पानय पॉलिथ। अम्युक मतलब ओस नु यि ज़ि खँलील सॉबस क्या ग्वबिहे पनुन्य कूर। मगर तोति गछिहे तस कम ज़्याद अथु रोट।

दँहन पंदुहन दूहन रूद सारुनिस गरस तु गौरी हुंदिस गरस मंज दुह्य छयवय। तमि पतु कँर शँमीमन पानय ह्यमथ तु द्युतुन मॉलिस माजि दिलासु। दोपुनख, 'तोह्य मु सूंचिव बु छस कूर। तोह्य सूंचतव बु छस त्वहि नेचुव। म्योन फर्ज छुना त्वहि खँदमथ करुन्य।' मॉल्य माजि कोर तसुंजि कथि तॉयीद मगर अँदुर्य ओसुख जिगर छयनान। वख्तस सुत्य सुत्य हेचुन तिमन रछाह दग कम गछुन्य तु वारु वारु सम्बोल शँमीमन बेयि तिथय पॉठ्य गरु यिथु पॉठ्य स्व खांदरु ब्रॉठ सम्बालान ऑस।

वथ वलज वँरिथ कोर बोबूजीयन तु खँलील सॉबन अँकिस स्कूलस मंज शँमीमुनि नोकरी हुंद इन्तिज़ाम। खँलील सॉबस ओस नु शँमीमुनि नोकरी हुंद पाँसु बकार, तिक्याज़ि वुनि ओस सु पानु नोकरी करान। मगर तँम्य सूंच ज़ि स्कूलस मंज रोज़ि शँमीमु शुर्यन सुत्य आवरु तु तस मशि वारु वारु पनुन दोद। हालांकि ति सपुद नु पूर पॉठ्य कँह मगर तोति आयि तमि सुत्य शँमीमुनि वथु बेठि मंज काँफी फर्ख। बंटी ऑस स्व ग्वडु ग्वडु पानस सुत्य स्कूल निवान तु कँह काल गँछिथ थँवुन स्व गरी। सारु तु खँलील सॉब ऑस्य तसुंद पूर खयाल थवान। हरगाह अथ मंज कँह परुगी रोज़िहे, स्व ऑस गौरी पूर करान।

शँमीमुनिस स्कूलस मंज य्वसु ह्यड मास्टर बाय ऑस, तस ओस नाव खालिदा जी। स्व ऑस शँमीमस प्यठ सख मेहरबान। शँमीमुन दूख बूजिथ ओस तस ज़रु ज़रु गछानुय, मगर तमि वरॉय ति ओस तस शँमीमस अंदर क्याहताम बासान। खालिदा जी क्याज़ि ऑस तस सुत्य यूत पानुन्यार वरतावान, ति ओस नु वारु शँमीमस ति तरान फिकिरि। मगर अकि दूह गव यि राज़ नोन। खालिदा जी वोन नु पानु कँह, मगर बेयिस अँकिस मास्टर बायि निशि लोग शँमीमस पताह ज़ि खालिदा जी छु अख बोड बोय यस नाव ओस शरीफ सॉब। शँरीफ सॉबस ऑस ज़नानु ज़ु वँरी ब्रॉठ त्रु वुहुर लँडकु पथ कुन त्रॉविथ गुजरेमुच। शँरीफ सॉबन ओस नु यि ज़ॉनिथ नोव खांदर करनुच कूशिश वँरमुच ज़ि खबर नँव ज़नानु लाग्या तसुंदिस बचस मॉज? गरस मंज ऑस्य दायि मोहनिय, अमि किन्य ऑस नु बचु सुंज परवँरिश मुश्किल। मगर खालिदा जी ओस नु बाँय सुंद कुनुय ज़ोन रोज़ुन बरदाश गछान। ऑखुरस गव शँरीफ सॉब अथ कथि प्यठ आमादु ज़ि हरगाह कांह जान लँडकी मेलि, सु छु खांदरु खॉतरु तयार।

खालिदा जी येलि शमीमुन्य दास्तान बूज, तमि सूंच ज़ि शँरीफ सॉब तु शँमीमु हेकि जान जूर्य बँनिथ। खालिदा जी वँन्य बाँयिस यि कथ तु अकि दूह आव सु हिंजॉर्य पॉठ्य तसुंद स्कूल येति तँम्य दूरी शँमीमु वुछ। शँमीमुन रोय वुछिथुय आयि तस स्व पसंद। खालिदा जी ओस यकीन ज़ि शँमीमु ति गछि अथ रिशतस तैयार तिक्याज़ि मोल मॉज ति कुतिस कालस पोशनस? तस ति गछि ज़िंदुगी

गुज़ारनु खॉतरु कांह सॉथी आसुन, तु बेयि तसुंदिस बचस ति छु मॉल्य सुंद ज़रूरथ। मगर तमि वॅर नु ननि वानु शॅमीमस सुत्य अथ मुतलिक कांह कथ। स्व ऑस कुनि मोजून वख्तस प्रारान।

अँकिस मास्टर बायि हुंदिस खांदरस प्यठ येलि स्कूलुक्य सॉरी मुलॉजिम सालस गॅयि, खालिदा जी तुज तति शॅमीमस सुत्य खांदरुच कथ। मगर शॅमीमन कोर साफ इनकार। स्व ऑस नु कुनि सूरतस मंज़ ब्याख खांदर करुनस तैयार। सारी खोतु ज़्यादु ऑस तस कोरि हुंज़ फिकिर। खालिदा जी वॅर तसुंज़ मुश्किल यि वॅनिथ हल ज़ि शॅरीफ सॉब छु बंटी ति पानस सुत्य रटुनस तैयार। ति वॅरिथ ति ओस नु शॅमीमस ब्याख खांदर करुनस दिल गवॉही दिवान। खालिदा जी चॅट अतिनस यि कथ मगर दिलु मंज़ु वॅडुन नु कॅह। स्व आयि बेयि दूह शॅमीमुन गरु तसुंदिस मॉलिस माजि सुत्य कथ करनि।

खॅलील सॉब गव खालिदा जी हुंज़ कथ बूज़िथ ख्वश, मगर तस ऑस पताह ज़ि शॅमीमु आंकार करनावुन्य छु बोनि मुहुल तारुनस बराबर। सारु ति ऑस ख्वश ज़ि कांह गरु छु शॅमीमुनि खॉतरु ओरय ज़ारु पारु करान। मगर कॅछा आस क्वदरतुकिस करनस प्यठ असुन। शॅरीफ सॉब ओस शॅमीमस काह वॅरी बोड। सारस प्यव सु वख याद येलि खानयारु प्यठु शॅमीमुनि खॉतरु अख रिशु आयोव तु खॅलील सॉबन कर्योव तथ यि वॅनिथ इनकार ज़ि लॅडकु छु शमीमुनि खोतु सथ वॅरी बोड। खॅलील सॉबन तु सारन द्युत खालिदा जी दिलासु ज़ि तिम करन यि रिशु अंद वातुनावुनस मंज़ पूर कूशिश।

सारन वॅन्य शॅरीफ सॉबुन्य तु खालिदा जी हुंज़ सॉरुय दॅलील गौरी। शॅमीमस सुत्य खांदरुच कथ तुलनु खॉतरु ति वोन तमि तॅस्य। गौरी गॅयि ख्वश। तस आयि नु पछ ज़ि शॅमीमस सपदि बेयि खांदर तु स्व बसावि पनुन अलग गरु। सारु ऑस पानु अथ रिशुतस प्यठ मुतमयीन, मगर शॅरीफ सॉबुन काह वॅरी शॅमीमस बोड आसुन ओस तस कुनि कुनि तछुन तुलान। अथ प्यठ वोन गौरी सारस, 'हरगाह शॅमीमस बराबॅदी यियि, यि छे नु तिछ बॅड कथ कॅह। यि गॅयि सॉरुय पनुन्य कर्म लीखा। अथ कुस खसि प्यठ।' गौरी हुंज़ि अथ कथि सुत्य ओस नु सारस यितिफाक। दोपुनस, 'कर्म लीखा वर्म लीखा नु कॅह। दफ यि गव पनुन पनुन तालेह।' गौरी समजॉव। दोपुनस, 'कर्म लीखा वनतस या तालेह, कथ छि कुनी।' मगर सारु ऑस नु यि मानुनस तयार। तसुंद वनुन ओस ज़ि मुसलमानस छु ऑखुर तालेह पनुन। कर्म लीखा छे आसान बटस।

गौरी हुंदिस समजावुनस प्यठ गॅयि यिथु तिथु शॅमीमु नॅविस रिशुतस तयार। शॅरीफ सॉबस आयि यि कथ ग्वडय साफ पॉठ्य वनुनु ज़ि बंटी रोज़ि माजि सुती। शॅरीफ सॉबन ति वॅर सारिनुय ब्रॉठु कनि यि कथ मंज़ूर। कॅह वख गॅछिथ सपद्यव शॅमीमस तु शॅरीफ सॉबस पानुवॅन्य खांदर। खांदर आव बिलकुल सादु पॉठ्य करनु। शॅरीफ सॉबुन्य रिशुतदार ति ऑस्य अथ खांदरस ख्वश। खालिदा जी ऑस नु व्यचन कुनि। तस ओस बासान ज़ि बॉय सुंदि खॉतरु कोर तमि बेनि हुंद फर्ज़ रुत्य पॉठ्य अदा। तस ऑस यि कथ ति पूर पॉठ्य दिलस बिहिथ ज़ि शॅरीफ सॉबस बनिहे नु कुनि शॅमीमस हिश ज़नानु। यि ओस ख्वदा तालाहस रुत करुन ज़ि शॅमीमु आयि तसुंदिस स्कूलस मंज़ नोकरी करनि तु यि कथ वॅछ। स्व ऑस ख्वदा सॉबस पतु सारा जी तु गौरी जी हुंद ति शुक्र गुज़ार, यिमव यि कथ अँज़रॉव।

दपान दकु लदस छु दकु पतय। खांदरु पतु केह वख गॅछिथुय येलि शॅमीमन बंटी पानस निशि अनुनुच कथ तुज, शॅरीफ साँबन द्युत हना दोल। शॅमीमस आव नु केह समुज जि शॅरीफ साँब क्याजि छुनु अथ कथि मंज कांह दिलचस्पी हावान। मगर पजर ओस स्यठाह क्रूठ। आँशुनावव मंजु ओस कॅम्य ताम शॅरीफ साँबस कनन कोरमुत जि हरगाह बंटी तसुंद गरु आयि, शॅमीमुनिस दिलस मंज गछि तसुंदिस लॅडकु सुंदि खाँतरु माय कम। स्व लगे ज्यादतर पनुनि कोरि सुती तु सजादस पृछि नु केह। येमि लोलु तु मायि सान शॅमीमु सजादस रछान आँस, सु वुछिथ ओस शॅरीफ साँबस बासान जि शॅमीमस सुत्य खाँदर कॅरिथ कॅर नु तॅम्य कांह गलती। मगर शकन कॅरनस कोहन पौठ्य दिलस मंज जाय। सु ओस नु यछान जि सजादुनि खाँतरु गछि शॅमीमुन यि पानुन्यार कम गछुन। पनुनिस पानस कूत समजौविथ ति ह्योक नु तॅम्य बंटी हुंदिस मामलस मंज कांह फौसलु कॅरिथ। कथ रुज अलूंद। शॅमीमुनि खाँतरु ति ओस नु अथ मामलस मंज जबरदॅस्ती करनुक कांह सवालुय, तिक्याजि यीतिस कालस नु शॅरीफ साँब बंटी हुंद गरु अनुन पजि दिलु मंजूर करिहे, तीतिस कालस ओस सोरुय गलथ।

द्वह द्वह गॅछिथ लॅज सारिनुय पताह जि शॅरीफ साँब छुनु बंटी पानस सुत्य रटुनस तैयार। खॅलील साँबस तु सारस लॅज यि कथ बूजिथ बेयि दिलस थफ। खालिदा जी ति आँस परेशान तिक्याजि यि खाँदर करुनावनस मंज आँस स्व सारिवुय खोतु ज्यादु जिमुवार। तमि कॅर बोय समजावनुच स्यठाह कूशिश, मगर शॅरीफ साँबस ओस नु केह यिवान समुज। अँकिस बेयिस निशि यिथिनुय हालातन मंज सपदेमुत्य कुसु बूजिथ गव तस ज्यादय खोफ। तसुंद शख बन्यव वारु वारु यकीन तु हालात गॅयि शॅमीमुनि खाँतरु बेयि अकि लटि खराब। तस रुज बंटी हुंज दग ललवुन्य।

शॅरीफ साबस ओस कारुबार तयस प्यठ। खसुन्य आँसुस गौड्य। मगर तॅम्य कॅर नु शॅमीमस नोकरी करुनस कांह पाबँदी। सु ओस दिलु किन्य जान मगर बंटी हुंदिस मामलस मंज ह्योक नु तॅम्य पनुन पान समजौविथ। शॅमीमु आँस मंजु मंजु स्कूलु नीरिथ माल्युन गछान तु बंटी बुथ वुछिथ यिवान। अमि सुत्य आँस तस वॉलिंजि रछ खंड शेहलथ प्यवान मगर अँदरिम नोसूर रुद तस बडान। वारु वारु ह्योतुन तस अम्युक असर सेहतस प्यठ प्योन।

बॅड ईद आँस यिनु वाजेन्य। शॅमीमु आँस स्कूल द्रामुच। शॅरीफ साँबन ओस तस सुली वापस यिनु खाँतरु तौकीद कोरमुत युथ ज़न तिम बाज़र गॅछिथ पलव दलव हेकन अँनिथ। शॅमीमु आँस यछान बाज़र गछुनु वख्तु बंटी ति सुत्य तुलुन्य युथ ज़न तस कित्य ति केह पलव अनिहे, मगर शॅरीफ साँबन मोन नु ति। दोपुनस येमि द्वह माल्युन गछख, तमी द्वह गॅयि स्व कॉम करुन्य। शॅमीमन चोप नार अँदरी तु द्रायि दिल मलूल गॅछिथ। शरीफ साँब रुद अमि द्वह गरी। ब्रांदस प्यठ लॉज मोहनिय कुरसी तु अँनिन शॅरीफ साँबस किच चाय। शॅरीफ साँबन लॉज चाय चैन्य। ब्रांदस प्यठ कनि आँस डब। डबि हुंदिस तालवस मंज ओस चर्यव ओल बनोवमुत। अचानक गव अँकिस चरि हुंद शोर। स्व आँस आँलिस मंज बिहिथ क्रक नाद करान तु पखु हिलावान। शॅरीफ साँबस गव यि शोर स्यठाह नागवार। सु वोथ थोद तु ह्यँचुन आँलिस नजर दिन्य मगर अति आस नु केह बोज़नु। तस वुछिथुय द्रायि चॅर आलि मंजु न्यबर तु बीठ दारि प्यठ। तसुंद शोर करुन रुद जौरी। शॅरीफ साँबन बुलोव पनुन मोहन्युव। मोहनिय ह्यचोव आँलिस मंज अथु त्रॉविथ वुछुन जि ओल आव पथर लायिनु।

ऑलिस मंज़ ओस अख चरि बच, युस मूदमुत ओस। मोहनियु युथुय सु चरि बच नेबर दॉरिथ दिनु खॉतरु तुलुन ह्योत, चरि लोग ज़बरदस क्रकृ नाद। शॅरीफ सॉबन होव मोहनियु इशारु तु सु द्राव। शॅरीफ सॉबन त्रॉव चाय अँती। तस आसु अँछ चरि कुनुय दरस लॅगिथ। शॅरीफ सॉबुन परवाय करनु वरॉय आयि चॅर बचस निश तु हेचन तस दिगु दिनि। तसुंद शोर ओस जॉरी। शायद ऑस स्व वुनि ति बच सुंदिस जिंदु गछुनस प्रारान। शॅरीफ सॉब रूद वारियाहस कालस यि तमाशु वुछान। तमि पतु द्युत तॅम्य ड्यकस अथु।

दुपहरस येलि शॅमीमु स्कूलु प्यठु वापस गरु आयि, बंटी ऑस ब्रांदस प्यठ बिहिथ सजादस सुत्यु गिंदान। शॅमीमस युथुय दूरी बंटी प्यठ नज़र पेयि, तस आव नु येकीनुय जि यि आसि पज़र। कुनी दोर त्रॉविथ आयि स्व ब्रॉठ कुन तु रॅटन बंटी नालुमति। तमि पतु हॉरान गॅछिथ त्रॉव तमि अंदर कुन नज़र। शॅरीफ सॉब ओस तख्त पोशस प्यठ बिहिथ तॅस्य कुन मुदय गॅडिथ वुछान, ठीख तिथय पॉठ्य, यिथु पॉठ्य तॅम्य सुबुहस चरि कुन वुछमुत ओस। शमीमस आव नु कॅह समुज जि यि किथु पॉठ्य सपद्यव। शॅरीफ सॉबन कोरुनस आलव तु बेहनोंवन पानस निशि। शॅमीमु ऑस वुनि ति कटु चेश्मव तस कुन वुछान। शॅरीफ सॉबन वोनुनस, 'अँज्यकि प्यठु छि यिम दूशवय मोसूम असि पनुन्य बचु। यीत्याह टॉठ्य चॉन्य तिथी म्यॉन्य।' शॅमीमन वुछ, शॅरीफ सॉब ओस पनुन ओश चूरि थवनुच कूशिश करान। तमि सूंच जि अँज्यकि दूह कोताह ऑसुस बु यछान बंटी ति निमुहँन बु पानस सुत्यु बाज़र। तस आव पनुनि जिंदुगी मंज़ ग्वडुनिचि लटि कांह इनसान पनुनिस दिलस यूत नज़दीख बोज़नु। अज़ तोर तस फिकिरि जि बॉचन दून वाँस रॅल्यतन या मतु रॅल्यतन, दिल गछि रलुन। तु अज़ ओस तिमन दून बॉचन पँज्यपॉठ्य दिल रल्योमुत।

दपान शॅमीमस तु शॅरीफ सॉबस रूद अमि पतु हमेशु खॉतरु दिल रॅलिथ, पानुवॅन्य ति तु शुर्यन सुत्यु ति।



ज्ञान द्यद

चववापॉर्य ओस शिन्याह। लरि आसु पथर पेमच्च। कुल्य कॅट्य ऑस्य मूल ह्यथ न्यबर द्रामत्य। इनसानु रुपस मंज ओस नु कुनि कांह नज़रि गछान। कॅह ऑस्य सॉलाबस सुती यिरु गॉमत्य तु कॅह ऑस्य जाय त्रॉविथ जुव बचावान चॅल्यमत्य। असमानस प्यठ ओस वुनि ति कृहुन ओबुर मगर रूद ओस व्वन्य दर्योमुत। कुनि कुनि ऑस्य हून्य तु जानावार नज़रि गछान यिम वॉरान जाथस मंज ख्यन छंडनि ऑस्य कति ताम प्यठ आमत्य।

ज्ञान देदि दिच्च अँछन मूरन। सॉरिसुय व्यथुबल कस्बस मंज ऑस्य जुय तॉमीर सॅही सलामथ रूद्यमत्य। अख ओस दूरि दॅरियावु बॅठिस प्यठ सासु बोद वॅरी प्रोन बगवान शंकरु सुंद मंदर युस सॅहलाबु किन्य व्वन्य न्यसुब खोतु ज़्यादु पॉनिस मंज ओस। ब्याख तॉमीर ओस ज्ञान देदि हुंज पॅहॅर, यथ छेय तु बुर्जु वॅसिथ ओस प्योमुत मगर क्रंज ओसुस मूजूद। ज्ञान देदि हुंज यि पॅहॅर ऑस वुडुर प्यठ कनि, येमि किन्य अथ सॅहलाबुक असर ओस नु वोतमुत। बाकय ओस सॉरिसुय मॅलियामेठ सपद्योमुत।

ज्ञान द्यद ऑस डबि डालानस प्यठ बिहिथ यि नज़ारु वुछान। रयतु बद्यन सख्त रूद प्यनु किन्य ओस नु तसुंजि पॅहरि हुंद कांह ति तान सॅही रूदमुत। पश ओस न ओर तु न योर। दारि दरवाज़न यिम वगुव्य फर्द त्रॉविथ ऑस्य, तिम ऑस्य रूदु तु वावु सूत्य वुडिथ गॉमत्य। कुठिस मंज ऑस तसुंज वसमथ वुनि ति डाय सेर हाँकल वॅरिथ साँगूपांग। डबि हुंदि फर्शुक्य लॅकरि तख्तु ऑस्य कॅह दूदुर अँचिथ पथर पेमत्य तु कॅह जायि तलु नीरिथ आमत्य। मगर कूनु मंजुक डून्य हचि हुंद तख्तु युस काँशी नाथन गुलु छानु सुंदि मदतु सूत्य स्यठाह मेहनथ वॅरिथ नोवुय ओस लोगमुत, ओस सॅही सलामथ। ज्ञान द्यद ऑस अँथ्य तख्तस प्यठ बिहिथ दूरि शिव लिंगुक सु हिंसु वुछान युस पानि न्यबर ओस तु यथ प्यठ कनि वुनि ति सर्तलि हुंज गागर अवेज्ञान ऑस।

ज्ञान देदि दिच्च वसमॅच्च कुन नज़र। यि वसमथ ऑस तमि ज़्यनु पानु प्यठय रँछिथ थॅवमुच्च। वुनिस ताम ऑस्य काँत्याह युप्य तु बुनिल्य आमत्य मगर ज्ञान देदि हुंजि अथ वसमॅच्च ओस नु अलगुज़ार गोमुत। अथ वसमॅच्च अंदर क्याह क्याह ओस, ति ओस नु ज्ञान देदि वरॉय कांसि पताह। मगर यि कथ ऑस टाकारु ज़ि येलि ति काँसि शख्सन प्रानि ज़मानुच कांह कथ ज्ञाननु खॉतरु ज्ञान देदि सवाल कोर, तमि तुल वसमॅच्च ठानु थोद तु अथु त्रॉविथ कोडुन सवालुक जवाब। दपान ज्ञान देदि हुंजि अथ वसमॅच्च अंदर ओस प्रथ कुनि सवालुक जवाब मूजूद। 'हबु खोतून किथु पॉठ्य आयि यूसुफ शाह चकस बागुन्य', 'अवंतीवर्मन राजन किथु पॉठ्य बचॉव वॅशीर युपि निशि', 'काँशिर ज़बान किथु पॉठ्य गॅयि रॉयिज', 'पँडित सोमदेवन कर लीछ कथा सरित सागर', 'लल देदि हुंद्य वाख तु शेख नूर दीन वली सुंद्य श्रुख कोताह सोन माने ऑस्य थवान', 'क्षेमेंदरनि तखलीक करिमच्चु बेश कुमथ किताबु राजावली तु नृपावली कोत गॅयि', या 'बाबा ऋशी तु दस्तगीर सॉबस क्याज़ि ऑस्य बटु मुसलमान अकी अनुमानु मानान', ति ओस सोरुय ज्ञान देदि हुंजि वसमॅच्च मंज मूजूद।

कांह कथ हरगाह त्रे वॅरी प्रॉन्य ऑस या त्रे सास वॅरी प्रॉन्य, ज्ञान देदि हुंदि अकि इशारु सुत्य ऑस वसमथ तम्युक जवाब दिवान। अमि किन्य ऑस तस यि पनुनि जुव खोतु ज़्यादु टॉठ तु स्व ऑस नु ज़ांह अथ पानस निशि दूर करान।

ज्ञान द्यद वॅरु वॅरिश ऑस, ति ऑस नु काँसि खबर। कांह ओस तसुंज वाँस जु हथ वॅरी गँजरावान तु कांह सास वॅरी। व्यथुबलुक ज़्युठ रॅहीम जू ओस वनान जि तसुंदि शुर्य पानु प्यठय छि तॅम्य ज्ञान द्यद अमी आयि वुछमुन्न। अथ कथि ऑस ही द्यद, य्वसु पानु हतु पेठ्य ऑस, तौयीद करान।

ज्ञान देदि ऑस स्यठाह ज़ीठ वाँस। दपान तमि ऑस पथ कालि शारदा मातायि हुंज बडु व्पासना कॅरमुन्न। अमि सुत्य प्रसन्न गॅछिथ गॅयि तस शारदा माता साक्षात अष्टभुजा दुर्गा रूपस मंज प्रकट तु वॅरनस अख वरदान दिनुच पेशकश। ज्ञान देदि मोंग अमर गछनुक वरदान, तिव्याजि तस ओस यकीन जि लूकन पेयि हमेशु तसुंज ज़रूरथ। माता दुर्गायि वोननस, 'यथ दुनियाहस मंज हेकि नु कांह अमर सपदिथ। युस ज़ाव, तस छु मरुन। अमि किन्य पेयी च्चे ति पनुनि मरनुक कांह नतु कांह वख्त मुकर्र करुन।' ज्ञान देदि सूंच स्यठाह, तु वोननस, 'तैलि गछि म्योन अंत तमि सातु सपदुन येलि मे यकीन गछि जि लूकन रुज नु म्यॉन्य ज़रूरथ।' दुर्गा मातायि कोर 'तथास्तु'।

शुर्यन ओस ज्ञान देदि सुत्य बडु लगाव तिव्याजि स्व ऑस तिमन राजन तु राजु क्वमारन हुंजु कथु बोजुनावान। यिमु कथु आसु सारेय तसुंजि वसमँन्न मंज मूजूद।

ज्ञान द्यद ऑस नु कुनी जॅन्य। तसुंद वनुन ओस जि व्यथुबलुक्य सॉरिय लूख छि तसुंदिवुय औलादव मंजु। ति ओस पज़र ति। स्व ऑस सारिन्य पनुन ज्ञानान तु तमी हिसाबु तिमन प्यठ हक जतावान। लूख ति ऑसिस द्यद ज़ॉनिथ खँदमथ करान तु अकार बकार यिवान। लूकन हुंदि व्यवहारु सुत्य ऑस स्व ख्वश।

मगर हालात बदलेयि यकदम। अमि कुस्मुक सँहलाब ओस नु ब्रॉट ज़ांह आमुत। वुछान वुछान लॅज असमानस दार तु सोरुय व्यथुबल गव पॉनिस तल। यिमन कुसमथ ओस, तिमव कॅर ह्यमथ तु पनुन पान बचॉविथ चॅल्य। यिमन नु क्वदरतुक बचाव ओस, तिम म्वकलेयि शुर्य बाँच ह्यथ। मकानु पेयि वॅसिथ तु कुत्य लूख गॅयि तिमन अंदरुय रुजिथ मारु। ज्ञान द्यद रुज वुछान। असमानु आसु त्रट वसान। वुजमलव वोल सॉरिसुय अलाकस नाल। कांह रुद नु काँसि मदद करुन लायख। येमिस योर कुन वथ आयि, सु तोर कुन च़ोल। काँत्याह रुद तु काँत्याह मूद्य, तथ रुद नु कांह शुमार। ज्ञान देदि लोग पनुन्य किन्य क्रक नाद, मगर त्रट बुजनिनस मंज ओस नु कांह काँसि हुंद बोजान। पोन्य ति ओस वारु वारु ह्योर ह्योर खसान तु व्वन्य गछिहे कुनि ति सातु ज्ञान देदि हुंज पॅहॅर यिरु तु तॅथ्य सुत्य तसुंज वसमथ ति। युस जिंदु बचव, सु च़ोल जुव बचावनु खॉतरु म्वछि ज़ु वॅटिथ। वुछान वुछान गव पूर कस्बु खॉली। ज्ञान द्यद पेयि अँत्य।

कॅह दूह गॅछिथुय गव रुद बंद तु नब गव साफ। वारु कारु ह्योतुन व्वन्य ताफ ति करुन मगर व्यथुबल ओस व्वजारु। न ओस कुनि ज़न तु न ज़ाँपुट। दॅरियावस गव पोन्य कम तु मंदर द्राव नोन। मगर पूजा करन वोल ओस नु कांह। ज्ञान देदि बास्वय शिव लिंग ति ज़न दयान। योदवय मंदर दूर

ओस, मगर ज्ञान देदि आँस नज़र बराबर। दूर्युक तु नैज़दीखुक ओस तस पूरि पूर तु साफ यिवान बोज़नु।

अज़ गव बराबर अख र्यथ अथ कुसस। व्यथुबलुक कांह नफर आव नु ज्ञान देदि नज़र दिनि। तस रोव करार। फीर्य फीर्य आँस स्व लूकन मुतलिक सौंचान तु तिहुंज़ अख अख कथ याद करान। तसुंदि मुताँबिक आँस प्रॉनिस ज़मानस तु अँज़िकिस ज़मानस ज़मीन असमान फर्क। तेलि ओस आसान माय मोहबत। लूख आँस्य अख अँकिस प्यठ जुव दिवान। सु पानुन्यार रूद नु व्वन्य कँह। अँज्युक इनसान ओस ख्वद गर्ज़ तु दँल्यत्रोव। ज्ञान देदि आसु प्रानि ज़मानुचि तु नवि ज़मानुचि कथ पूरि पूर याद, ज़न तु कालुक बतु।



किशु काक ओस दँरियावु अपारि रोज़ान। सु ओस दूहय संगर फवलनु ब्रोंतुय नैदरि व्वथान तु दँरियावस प्यठ वातान। श्रान द्यान वँरिथ ओस सु ख्वर ननुवोरुय दँरियावस तरान तु शंकरस पोन्थ बावान। रूदु त्रटु आँस्यतन या शीनु थोस्य, किशु काकस ओस नु मंदर युन मँशिथ गछान। ओत वॉतिथ ओस सु ग्वडु दिवुर्य कन्न्यन हुंज़ु हेरु छलान। तमि पतु ओस सु शिव लिंगस गोड दिवान तु गागुर बरान। पूजा करनस ति ओस नु तस कम वख लगान कँह। येलि सु पूजा वँरिथ मंदरु मंज़ु नेरान ओस, तमि वख्तु ओस सिरिँ आसान वारियाह ह्योर वोतमुत।

काँदिर काक ओस वाँसि मंज़ किशु काकनि खोतु बोड। सु ओस यपारि यारबलु रोज़ान। यारबलु बँठिस पॉतरि कन्न्यन प्यठ न्यमाज़ पँरिथुय ओस सु ज्ञान देदि निश वातान तु तस सु फलहार दिवान युस सु गरि प्यठु तसुंदी खॉतरु अनान ओस। दपान काँदिर काकस ओस पानस बतु ख्योन मँशिथ गछान मगर ज्ञान देदि हुंद फलहार ओसुस नु मँशिथ गछान।

काँशी नाथ ओस वाँसि जान तु ज्ञान देदि सुत्य ओसुस सख लगाव। तसुंद वनुन ओस ज़ि ज्ञान द्यदुय छे लूकन हुंज़ु पहचान। येमि दूह लूख तस मँशरावन, तमी दूह म्वकलि तिहुंज़ पहचान ति। अथ कथि आँस्य साँरी बुज़र्ग ताँयीद करान, कँह मनु तु कँह ज़बाँनी।

अमु साँबुन नेचुव अँली मुहम्मद ओस शहरस मंज़ नोकरी करान। रेत्य दूयि रेत्य येलि सु गरु ओस यिवान, अँकिस टेलस मंज़ ओस सु आँशुनावन तु हमसायन हुंदि खॉतरु कँह नतु कँह अनान। ज्ञान देदि क्युत मोहरु लाठ, दंदु खिलालु, लिवरि तु नँव कंगन्य अनुन्य ओस नु तस ज़ांह मँशिथ गछान।

व्यथुबलस मंज़ येलि कांह स्वर्गवास गछिहे, मीलु वादन ताम आँस्य लूख तथ दूहस फाकु दिवान। क्रिया कर्मस मंज़ ति आँस्य साँरी शॉमिल सपदान। दँहन दूहन ओस नु मरन वॉल्य सुंदि गरि दान दज़ान तु सोरुय ख्यन च्यन ओस हमसायि गरव प्यठु वातान।

सारिनुय आँस ज्ञान देदि हुंज़ु फिकिर। कस्बुक प्रथ कांह नफर ओस तस गाहे बेगाहे शेछ खबर पृछनि यिवान। साँरिसुय कस्बस आँस तसुंज़ आँही सुत्य।

मगर यिमु आसु प्रानि कथु। अज़ ओस ज़मानु बदल्योमुत। अँज्युक इनसान ओस त्यूत आवुर ज़ि बेयिस खबर ह्यनु खॉतरु ओस नु तस वख्तुय। युतुय योत नु कँह। यूत यूत लूकन हुंद लसुन बसुन तयस प्यठ वोत, त्यूत त्यूत चाव तिमन दिलस मंज़ ख्वचर। अँकिस आव नु बेयि सुंद ख्वश तु अख अँक्यसुंद अज़रवुन गव प्रथ काँसि प्यठ हॉवी। मोह तु माय म्वकल्यव। तमि बदलु ज़ायि अदावथ तु बद खॉही। मगर ज़ान देदि सुत्य रूद सारिनुय व्यवहार ठीख।

ज़ान देदि पेयि सोंचान सोंचान नेंदुर। नेंदरि मंज़ ति थोव तमि पनुन अथु वसमँन्न हुंज़ि हाँकलि प्यठ। अँथ्य आसना हस मंज़ वुछ तमि सोपुन



अयोध्या ऑस शोलु मारान। राज़ु दशरथुनिस मँहलुखानस ओस ज़ूल वँरिथ। लूख ऑस्य नँव्य पोशाक लॉगिथ राज़ु दशरथ तु राजकुमार राम चँद्रु संजु जय जय कार करान। अज़ ओस राम जीयस अयोध्यायि हुंद राज़ु बनुन। अयोध्या वॉसी ऑस्य स्यठाह ख्वश। मँहलु खानस ब्रोंटु कनि ओस लूकु समंदराह तथ श्वब वख्तस प्रारान येलि राम जी राज गँदी प्यठ बिहि। ज़ान देदि वुछ, यिमन लूकन मंज़ ऑस स्व पानु ति अँकिस ल्वकचि कोरि हुंदिस रुपस मंज़। कोरि ओस नाव बेला।

बेला ऑस स्यठाह दूरि प्यठु राम जी सुंद दर्शुन करनि आमन्न। लूकन सुत्य सुत्य ऑस स्व ति राम जीनिस राज गँदी प्यठ बेहनस प्रारान। मगर विदाताहन ओस बदल क्याहताम सूचमुत। बेलायि हुंद अरमान सपुद नु पूर। अँदरु राज़ु मँहलस मंज़ सपुद अख बोड बारु अनर्थ। रानी कैकई लोग न्याय। राज़ु दशरथस पेयि तसुंघ जु वर पूर करुन्य। अख ओस राम चँद्रुनि बदलु भरत जीयस राज गँदी प्यठ ब्युहुन, तु बेयि राम चँद्रुस च्वदाहन वँरियन प्यठ वनवास गछुन।

येलि यि शेछ मँहलु खानु न्यबर वॉन्न, पूर अयोध्यायि मंज़ सपुद मातम। लूख गँयि वँल्य तु जँर्य। राज़ु दशरथस ओस गॉयलु गोमुत। राम जी, सीता जी तु लँक्षमन जी द्रायि ऑखुर सँन्यॉस्य पलव लॉगिथ बनवास। लूख लारेयि तिमन पतु। तिम ऑस्य नु राम जीयस वरॉय अयोध्यायि मंज़ रोज़ुन यछान।

तमसा नेंदी प्यठ वॉतिथ लोग राम जीयन राथ गुज़ारनु खॉतरु डेरु। लूख ऑस्य नु वापस गछुनस तयार। तिम ऑस्य यछान बनवासस दोरान राम जीयस सुती रोज़ुन। राम जीयस ओस नु त्युहुंद तकलीफ बरदाशत गछान। राथ क्युत, युथुय लूकन नेंदुर पेयि, राम जी द्राव तिमन चूरि चूरि सीता जी तु लक्षमन जी ह्यथ सुमंत्रस सुत्य रथस मंज़।

लूकन येलि सुबहस नेंदुर खुलेयि, राम जी ओस द्रामुत। बुथि कोत ओस गछुन, ति ऑस नु तिमन पताह। मोयूस गँछिथ फीर्य तिम वापस। मगर बेला फीर नु कँह। स्व द्रायि ब्रोंटु कुन राम जीयस छांडनि।

स्यठाह मँज़िल वँडिथ वॉन्न स्व गंगायि बँठिस प्यठ। अति लँज तस पताह ज़ि राम जी, लँक्षमन जी तु सीता माता छि निशाद राज़ुनि नावि मंज़ तार दिथ द्रामुत्य। बेलायि गव नु कुनि कांह केवट

नज़रि युस तस तार दियिहे। तिम साँरी ऑस्य राम जीयस सुती गौमुत्य। बेलायि फुट दिल। लाचार गँछिथ द्युत तमि दँरियावु बँठिस प्यठ अँकिस कुलिस तल थख।

बेलायि कोर प्रन ज़ि स्व गछि नु अयोध्या तीतिस कालस वापस, यीतिस कालस नु राम जी वापस यियि। कुलिस तलय आसन दँरिथ लोग तमि राम जी सुंद दान करुन।

वुनि ओस कँह कालय गोमुत तस अथ अवस्थायि मंज़ ज़ि डोल तु नगारु वायिनुचि आवाज़ि सुत्य फुट तसुंद दान। तमि दिन्न ओरु योर नज़र। दँरियावु बँठिस प्यठ ऑस्य साँरी केवट जमह गौमुत्य। तिम ऑस्य ख्वश गँछिथ डोल तु नगारु वायान, तु राम जीयिन्य जय जय कार करान। बेलायि तोर नु कँह फिकिरीह ज़ि तिम ऑस्या राम जीनिस बनवास गछुनस ख्वश किनु नाराज़। अकि तरफु ऑस्य तिम तसुंज जय जय कार करान तु बेयि तरफु नकारु वायान। तिमन पृच्छिथ यि कँह बेलायि नन्यव, ति ओस नु तसुंदि खॉतरु यकीन करुन लायक। राम जी, सीता जी तु लँक्षमन जी ऑस्य च्वदाह वँरी बनवास कँडिथ पुशपक विमानस क्यथ अयोध्यायि वापस आमत्य। बेला ऑस हयबुंगु। केवट ति वनन नु अपुज़ कँह मगर च्वदाह वँरी कपोर्य गँयि ? तस ओस यि सोरुय ज़न तु सोपुन बासान। वुनि ऑस स्व साँचानुय ज़ि तस बास्यव राम जी पानस ब्रोंठु कनि। राम जीयन कँर तस अथस थफ। युथुय बेलायि राम जीयुन अथु लोग, सासु बँद्य सिर्यि प्रज़लेयि तस ब्रोंठु कनि।



सिर्यि प्रकाश वुच्छिथ फुट ज़ान देदि नँदर। तमि मुच़रावि अँछ। न ऑस कुनि बेला, न गंगा तु न ओस राम जी तस ब्रोंठु कनि। तमि दिन्न वारु अँछन मूरन तु न्यबर कुन त्रॉवन नज़र। अति ओस बदलय आलम। मंदर ओस नु यिवान लबुनय। तथ बुथि ऑस्य नँव्य मकानु खँत्यमुत्य। मकानु ऑस्य ऑलीशान तु रंगाबु रँग्य। दँरियाव ओस गॉब तु तथ जायि ऑस अख ल्वकट नालि हेना पकान। मंदरस पतु कनि युस वीरि वार ओस, सु ओस खत्म सपद्योमुत। तथ जायि ओस अख बोड माँदान यथ मंज़ कँह नफर बंदूक चलावनुच मश्क ऑस्य करान। जायि जायि आसु लूकन हुंज़ु डीफरि। लूख ति ऑस्य नु तिम कँह यिम अति ब्रोंठु रोज़ान ऑस्य। काँसि काँसि ओस फेकिस प्यठ बंदूक अवेज़ान। अँकिस बुडु बोनि कुलिस निशि ऑस्य कँह गुर्य तु शिकार्य हून्य गँडिथ।

ज़ान देदि गव पूर पाँठ्य सरु ज़ि स्व ऑस बेलायि हुंदिस रुपस मंज़ पँज्यपाँठ्य च्वदाहन वँरियन शौगिथ। राम जी आव च्वदाह वँरी बनवास कँडिथ अयोध्यायि वापस, मगर तसुंद राम, लँक्षमन तु सीतायि आयि नु पनुनि अयोध्यायि वापस कँह! तिम कति छि ?

अचानक गव शोर तु डीफर्यन गँयि खलबँल्य। अकि बडि मकानु मंज़ु द्रायि नफर तारु तु गँयि माँदानस कुन। अति खँत्य तिम तथ थँदिस कनि द्रंगस प्यठ युस शायद लूकव यारुबल फुटरॉविथ तमिचव कन्यव सुत्य बनोवमुत ओस। यिमन त्रेश्वुन्य नफरन ऑस्य दालुव्य कोठ लॉगिथ। अँकिस नफरस ओस त्वरु दार दसतार कलस तु तस पतु पतु ऑस्य ज़ु जवान बंदूक ह्यथ। सु ओस बासान लीडर। अमि पतु गँयि अथ द्रंगस ब्रोंठु कनि साँरी लूख हॉज़िर तु बीठ्य पथर। कँह जवान रूद्य द्रंगस अँद्य पँख्य इस्ताद।

लीडर ओस क्याहताम वनान तु लूख ऑस्य नरि तुल्य तुल्य तस तौयीद करान। ज्ञान देदि वुछ वारु। कॅह लूख ऑस्य नु नरि तुलान। लीडर क्याह ओस वनान, ति बोज़नु खॉतरु द्युत ज्ञान देदि कन। मगर कूशिश कॅरिथ ति ह्योक नु तमि किहिन्य बूज़िथ। अचानक वोथ मजमु मंज़ु अख बुज़र्ग तु वोनून लीडरस कुन क्याहतान्य। बुज़र्गस निशि यिम नफर ऑस्य, तिमव बेहनोव सु ज़बरदँस्ती पथर। लीडरन वोन तस बुज़र्गस क्याहतान्य तु ह्योतुन बेयि तकरीर करुन। येलि लीडरन छ्वपु कॅर, लूकव कोर चरि पोप।

बुज़र्ग वोथ बेयि थोद तु लीडरस कुन वुछिथ वोनून बेयि क्याहतान्य। लीडर सुंद बुथ वुछिथ ओस बासान जि तस गॅयि बुज़र्गु संज़ कथ स्यठाह नागवार। तॅम्य होव अँकिस बंदूक वॉलिस इशारु। बंदूक वोल आव बुज़र्गस ब्रॉठ कुन तु नरि थफ कॅरिथ पकनोवुन बोनि कुलिस निश। मजमु मंज़ु द्रायि ज़ु नफर बेयि तु तिमव थोव बुज़र्ग कुलिस सुत्य गँडिथ। बंदूक वॉल्य दिन्न लीडरस कुन नज़र। बुज़र्ग ओस नरि तुल्य तुल्य क्रक दिवान। लीडरन होव बंदूक वॉलिस इशारु। तॅम्य थोव बंदूक बुज़र्गस ड्यकस प्यठ तु ऑगजि कॅरुन ज़ीर। बुज़र्गस गव कलु अलूंद।

लूकन ऑस छ्वपु। ज्ञान देदि ओस नु किहिन्य समुज यिवान जि तिम ऑस्या अथ कथि तौयीद करान किनु तरदीद। मजमु मंज़ु वोथ अख नवजवान तु गव कुलिस निश। बुज़र्गस मुन्नरोवुन गंड तु तुजिन तसंज लाश नखस प्यठ। बंदूक वोल ओस नवजवानस लाश तुलनु निशि मनाह करान, मगर नवजवान ओस नु ति माननु खॉतरु तयार। बंदूक वॉल्य द्युत नवजवानस दकु तु सु प्यव लाश ह्यथ पथर। व्वन्य ऑस लूकन मंज़ बेचैनी। तिमव मंज़ु आव नवजवानु सुंद अख सॉथी तु तुलुन नवजवान थोद। लीडरन वुछ द्रंगु प्यठ वारु। तस बास्यव जि मजमु मंज़ु छि बेयि ति कॅह नफर तस बुथि लगनस आमामु। तॅम्य द्युत बंदुक वॉलिस होकुम। होकुम रँटिथुय कोर बंदूक वॉल्य नफरन सु नवजवान तु तसुंद सॉथी शँहीद। व्वन्य आसु अकि बदलु त्रे लाशि पथर।

लूख रूद्य कटु चेश्मव यि सोरुय वुछान। काँसि गॅयि नु ह्यमथ कॅह वनुनस। लीडरन वोन बडि बडि बेयि क्याहतान्य तु द्राव। तस सुत्य द्रायि तसुंद सॉथी ति तु बंदूक वॉल्य ति। अमि पतु वॅथ्य लूख थोद तु वारु वारु गव माँदान खॉली। लाशि रोज़ु तिथय पॉठ्य पथर। तिमन अँद्य पॅख्य ओस खूनय खून जमाह गोमुत। माँदानस पतु कनि ऑस्य शाल दवु दव करान। शायद ऑस्य तिम मोकस प्रारान।

ज्ञान देदि थवि अँछ मुन्नरॉविथुय। कॅह काल गँछिथुय द्रायि ऑठ जवान अलग अलग मकानव मंज़ु तु वॉत्य बोनि कुलिस निश। अति लॉज तिमव गुर्यन ज़ीन करुन्य। गुर्यन निशी ऑस्य अँकिथ कुन बंदूक तु कॅह जोलनु। ज़ीनु चॉरिथ तुल जवानव यि सोरुय सामानु तु द्रायि गुर्यन प्यठ।

ज्ञान देदि दिन्न पनुनि पँहरि वारु नज़र। स्व ऑस तिछुय यिछ तसुंदि नैदर प्यनु वख्तु ऑस। वुडर ब्वनु कनि ऑस्य कॅह लूख खाहन मंज़ कॉम करान, मगर तिमन मंज़ ओस नु तसुंदि पहचानुक कांह। ज्ञान द्यद रूज़ सॉचान, 'ऑखर बु कर लबख पनुन्य औलाद बेयि?'

दूरि, दून मकानन दरमियान ख्रेपि मँज्य त्रॉव ज्ञान देदि नज़र। मंदरुक कुबु ओस बोज़नु यिवान। मंदरस बुथि ओस थोद गासु खोतमुत। गासु मँज्य वुछ तमि वारु। शिव लिंग ओस पथर प्योमुत तु गागर ऑस नु कुनी।

शामस बॉग्य आयि तिम जवान वापस यिम गुर्यन प्यठ द्रामुत्य ऑस्य। ज्ञान देदि कॅर ग्रंद। ऑठव बदलु आयि ओरु पांचय वापस। गुर्यन प्यठ ओस वारियाह कुमती सामानु, युस तिमव शायद लूट ओनमुत ओस। जवान येलि नॅजदीख वॉत्य, ज्ञान देदि वुछ, तिमन सारिनय ओस पानस तु पलवन खून लोर। ज्ञान देदि ओस यकीन, यि ओस छराह इनसानु सुंद खून।



लसु काकन दिच नेचपॅत्रि नज़र। अज़ गॅयि तस बराबर च्वदाह वॅरी व्यथुबलु प्यठु योर आमुतिस। तस आव सु वख्त अँछन तल येलि व्यथुबलुक्य बसकीनदर जुव बचावान कस्बु मंज़ु चॅल्य। चलान चलान कुस कुस मॅसीबथ प्यव तिमन तुलुन तु तिम कॅचन दहन रुद्य पकान, तम्युक रुद नु कांसि हिसाब। अथ सफुरस मंज़ ति गॅयि तिमन निशि कौत्याह छ्यनु। वारियाहव ल्वकट्यव बड्यव द्युत अमानथ। लसु काकन्य आशेन्य कमलावॅती रुज़ त्रेश छांडान। तसंजि कोरि येलि दूरि छाँडिथ तस किच त्रेश अँन्य, स्व ऑस स्वर्गवास गौमुच। जानकी नाथुनिस दॅह वॅहरिस लॅडकस मूती लालस खौत तफ तु गॅयस लारनि। हॅकीम सॉब ओस नु कॅह। सु ओस बिचारु बूटि सौबुरावान सौबुरावान सॅहलाबु बुज्य गोमुत। मूती लालस द्रायि मसाह जु गंट। तसंज माँज गॅयि देवानु। जानकी नाथस पेयि शुर्य सुंज लाश अँती त्रॉविथ ग्वडु ज़नानु संबालुन्य।

फातु देदि ओस नेचुव थफ कॅरिथ पकनावान। तोति गॅयि स्व वुतरायि वसान वसान डुलु। सफर कडुन गव त्यूत मुश्किल ज़ि वारियाहव त्रोव सु कुमती सामानु ति वती, युस तिमव चलनु वख्तु सुत्य ओस तुलमुत।

नवि जायि ओस नाव भरतपोर। ओत वॉतिथ आयि नॅव्य मुश्किलाथ, मगर लूकव कॅर ह्यमथ। वारु वारु कोर सारिवुय पनुनि लसनुक बसनुक इन्तिज़ाम। कॅह काल गॅछिथुय बूज तिमव ज़ि व्यथुबलस छु कमव ताम कज़ाक्यव कब्ज़ु कोरमुत। लूकन हुंदि ठाक करनु बावजूद कॅर अकि लटि कौलास नाथन तु बॅद्री नाथन ह्यमथ तु द्रायि पनुन्य ज़मीन वुछनि। पंदाहि दोह्य पतु आव बॅद्री नाथ जुव बचावान वापस। कौलास नाथ ओसुख तोर वॉतिथुय मॉरिथ छुनमुत। अमि पतु गॅयि नु बेयि कौसि तोर गछनुच ह्यमथ। सूचुख, या तु गोछ हेरिम मदद आसुन, नतु गव सोरुय गलथ।

भरतपोर ऑस बॅड सरय। अति ऑस्य वारियाहन ज़ॉचन हुंद्य लूख रोज़ान। व्यथुबलुक्यन लूकन सुत्य हॉव तिमव सारिवुय हमदर्दी। नव वॉरिद ऑस्य दाना ति, तु सौचन वॉल्य ति। अमि किन्य गव नु तिमन अतिक्थन बसकीन दरन सुत्य अँज्य मँज्य गछुनस कांह तकलीफ।

वुछान वुछान बदल्यव आलम। प्रॉन्य पीर हेचुन म्वकलुन्य, नॅव हेचुन बारसस यिन्य। यिम ज्ञानन वॉल्य बुज़र्ग ऑस्य, तिम हेतिन अकि अकि गुज़रुन्य। अँथ्य सुत्य वँथ्य कॅह सवाल, यिमन हुंद जवाब द्युन लूकन हुंदि खॉतरु कूठ गव।

प्रथ गरस मंज़ रुद्य सवाल ज़्यवान। मसलन 'हेरच दोयिमिस दहस क्याज़ि छि सलाम वनान' या 'स्वंदर करनस क्याज़ि छि बुरज़ु म्यॅट कडान' या 'वासु काकस किथु पॉठ्य वन्योव हॅकीम सॉबन ट्योक वुछिथुय ज़ि तस छु मरुन'। यिथी यिथी ऑस्य प्रथ ज़ेवि प्यठ बे शुमार सवाल, यिमन हुंद

जवाब कुनि ओस मेलान तु कुनि ओस नु मेलान। अम्युक मतलब ओस नु यि जि व्यथुबल रुजिथ ऑस्य नु यिथ्य सवाल व्वथानुय। मगर तति ओस नु जवाब कडुन मुश्किल। ज्ञान द्यद ऑस ना! मगर लूकव वॅर बॅड बारु गलती। ज्ञान देदि हुंज जवाब ऑस्य नु तिमव ब्रॉठकुन पकनुऑव्यमत्य।

नवि पुयि ओस नु व्यथुबल वुछमुत, ल्यहाजा ओस नु तिमन तोर वापस गछनुक कांह खास अमार। मगर युस चीज़ अँछव दूर आसि, तथ मुतलिक नवि नवि कथु मोलूम करनि छि इनसानु संज फितरथ। अमि सब ओस ल्वकट्यन सारिनुय शोख जि तथ जॅमीनस मुतलिक बोज़हन तिम कांह कांह कथ, ख्वसु तिहिंद्यव माल्यव माज्यव खून हारान त्रॉवमुन्न ऑस।

नवि पुयि मंज येलि ज्ञान देदि हुंज कथ लॅज, तिमन गनेयि तसंज सख कल। ब्रिज नाथन येलि मॉलिस सवाल कोर जि ज्ञान द्यद कोत गॅयि तु स्व द्रायि ना तिमन सुत्य, तॅम्य ह्योक नु कांह जवाब दिथ। ल्वकट्यन गॅयि यि कथ नागवार जि लूकव त्रॉव ज्ञान द्यद तॅती तु चलनु वख्तु ह्यँन्न नु काँसि तस खबर। यि ज्ञाननु खॉतरु ति ऑस्य ल्वकट्य बेकरार जि वसमथ किछ ऑस तु तमि मंजु किथु पॉठ्य ऑस ज्ञान द्यद जवाब कडान ?

समु काकस गॅयि नैदुर गॉब। तस ओस नु पनुन शुराह कोटाह कांह। मगर बरादॅरी हुंदिस प्रथ शुरिस ओस सु पनुन शुर मानान। प्रथ दूह शामस ऑस्य तिम तस निश यिवान तु प्रानि कथु बोज़ान। तिमव येलि ज्ञान देदि मुतलिक तस सवाल हेत्य करुन्य, तस फोर्यव नु कांह जवाब। तस वॅर पनुन्य जॅमीरन मलामथ। योहय हाल ओस लगबग सरवानंदुन ति। दूशवय गॅयि अथ कथि प्यठ रॉज्य जि तिम गछन अकि लटि जुवस गिंदिथ व्यथुबल तु ज्ञान देदि मुतलिक करन पताह।

समु काक ओस वाँसि मंज सरवानंदुनि खोतु वारियाह बोड। मगर तोति वॅर तॅम्य स्यटाह ह्यमथ। कूठ मँज़िलाह कॅडिथ वॉत्य तिम व्यथुबलस नॅजदीख। अति वुछुख नोवुय आलम। दिलस रुदुख फ्रट फ्रट। खबर काँसि आस्या ज्ञान देदि मुतलिक कॅह पताह ? या अगर पताह आस्यख तु पज़र वनुना ? या जि यिनु मॉरिथुय छुनन! समु काकस पेयि ह्योर कुन नज़र। वुडुर प्यठ कनि ऑस अज़ ति ज्ञान देदि हुंज पॅहॅर मूजूद। यि वुछनु खॉतरु जि ज्ञान देदि हुंज वसमथ छा मूजूद किनु न, दूशवय गॅयि वुडुर पॅत्य किन्य तु खॅत्य ह्योर। युथुय तिम पॅहरि अंदर च़ाय, दूनुवय गॅयि ज़न रोट। ज्ञान द्यद ऑस तिथय पॉठ्य डबि डालानस प्यठ बिहिथ, यिथु पॉठ्य तेलि ऑस ब्यहान। तस ओस कलु ब्वन कुन तु अँछ आसस वॅटिथ। अथु ओसुस अज़ ति वसमॅन्न हुँजि हाँकलि थफ वॅरिथ। समु काकस आव नु समुज कॅह। ज्ञान द्यद मा छि म्वकलेमुन्न ? तॅम्य थोव तस वारु वारु अथस प्यठ अथु। अचानक गॅयि ज्ञान द्यद बेदार। हाँकल रॅटन चीरु तु कलु तुलुन थोद। समु काकस तु सरवानंदस च़ॅज वदन बाख नीरिथ तु पेयि तस परन। ज्ञान देदि परज़नुऑव्य तिम दूनुवय। पानस सुत्य रॅटिन नालमति तु दोपुनख, 'कूत काल गोम प्रारान। अज़ पेयिवु पनुन्य ज्ञान याद ?'

ज्ञान द्यद गॅयि नु कुनी जॅन्य नेरनस तैयार। दोपुनख अगर बु यिमु, बु यिमु पनुन्य वसमथ ह्यथ। मसलु ओस बडु कूठ। वसमथ पकनुऑव्य ओस बडु मुश्किल मगर ज्ञान देदि लोग रडु। तस ब्रॉठ कनि चल्यव नु तिमन कॅह। समु काकन वॅर ज्ञान देदि अथस थफ मगर तमि कोर पनुन अथु यलु। स्व ऑस पानय पकनु खॉतरु तैयार। सरवानंदन वॅर वसमॅन्न रज़। दूयव नफरव वॅर अथ दूयव तर्फव थफ तु ह्योतुहॅस वारु वारु लमुन। दूश्वॅन्य हुंदि थफ करनु पतु बासेयि नु स्व ज़्यादु गोब। दूह वादन

पँकिथ कोर तिमव न्यसुब मँज़िलाह तय। बालु मरगि अंदस वॉतिथ द्युत तिमव थख। बुधि ऑस वुतरॉय मगर वसुन ति ओस स्यटाह मुश्किल। समु काकस ऑस नु व्वन्य कांह ह्यमथ रूज़मुच्च। सु ओस यछान रातस ठहरिथ सुबहस ब्रॉटकुन पकुन। रातस त्रोव तिमव कश्यप नागस प्यठ पडाव। यि नाग ओस अँद्य पँख्य क्यव सारिवय नागव खोतु बोड तु अमिच त्रेश ऑस मोदुर।

कश्यप नाग प्यठ ओस ब्वन कन्युक वँसीह मॉदान तु बालु वुतरॉय साफ यिवान बोज़नु। दूरि मॉदानु अपारि ओस ग्रज़ आरु, यथ तँरिथ भरतपोर वथ ऑस। लर त्रावानुय पेयि ग्वडु समु काकस तु पतु सरवानंदस नैदुर। ज्ञान द्यद रूज़ हुशारुय।

सुबहस येलि सरवानंद हुशार गव, समु काक ओस अमानथ दिथ गोमुत। मगर येमि लटि ऑस ज्ञान देदि सुत्य सुत्य तँम्य ति थँवमुच्च वसमँच्च चीरु थफ वँरिथ।

सरवानंद गव व्वन्य परेशान। कुनुय ज़ोन क्याह हेकि वँरिथ। ब्याख नफर आसि सुत्य तु बोर ति छु कम गछान तु ह्यमथ ति बडान। ज्ञान देदि द्युतुस मशवरु। दोपुनस परवाय छुनु कँह। वुनि छु वख। अगर भरतपोरु प्यठ कांह गछि तैयार योर यिनु खॉतरु, मसलु गछि हल। सरवानंदस बास्यव मशवरु ठीख। ज्ञान द्यद ऑसुय वसमँच्च रॉछ करनु बापथ स्यटाह। सरयि प्यठु ब्याख नफर सुत्य अनुनुक वादु दिथ द्राव सु ज्ञान देदि र्वखसथ ह्यथ।

भरतपोर वॉतिथुय वँन्य सरवानंदन ग्वडु ज्ञान देदि हुंज शोछ तु पतु समु काकनि गुजरनुच कथ लूकन। ज्ञान देदि हुंद बूज़िथ सपुद्य सॉरी ख्वश मगर समु काकन्य किन्य प्यव सॉरिसुय सरयि मातम। अमि दूह सपदेयि नु बेयि कांह कथ।

बेयि दूह बुलॉव सरवानंदन ज़िठचन हुंज बैठक तु कोरुनख मदद करनुक दरखास। कँह नवजवान ति ऑस्य शोकु शोछ बोज़नि आमत्य। सरवानंदस सुत्य कुस कुस हेकि गँछिथ, अथ प्यठ सपुद मशवरु। दून नवजवानन ओस ज़िठचन सुत्य गछनुक बडु शोख, मगर तिहिँद्य मॉल्य माजि दिच्च नु तिमन वथ तु करनुविख छवपु। योदुवय गछनु खॉतरु ओस नु कॉशी नाथस वरॉय कांह ति हुकू पॉठ्य तयार, मगर कलु सुत्य ऑस्य बासान सॉरी आंकारस। कॉशी नाथस ओस वुनि ति जोश मगर तसुंज वॉस वुछिथ कोर लूकव तस मनाह। नाव चारनु खॉतरु आयि चीरि त्रावनु तु यिथु पॉठ्य आव च्वन नफरन हुंद इन्तिखाब कँरिथ अख फिरिस्त बनावनु।

फिरिस्तस मंज़ ओस ग्वडन्युक नाव अकू लालुन। सु ओस दुवंज़ाह वुहुर दुकानदार। गरि ऑसुस ज़नानु, ज़ु नेचिव्य तु न्वशि। दूनवय नेचिव्य ऑसिस नोकरी करान। गुज़ारु ओसुख जान। अकू लाल ओस नु दुकानदॉरी कुनि कमायि खॉतरु करान। तसुंद वनुन ओस ज़ि गरस मंज़ बिहिथ द्रॉज द्रॉज करनु खोतु छु कुनि कामि सुत्य आवुर रोज़ुन जान। अमि सुत्य छु जुव ति ठीख रोज़ान तु गरु ति। दुकानस मंज़ ति ओस नु तस हावुन तु बावुन लायख सोदा कँह।

दोयुम नाव ओस मोहन लालुन। सु ओस पांचुतॉजी वुहुर। खांदर ओसुन नु कोरमुत कँह। गरस मंज़ ऑसिस बुडु मोल मॉज। ज़मीन ज़िरात ओसुस जान। मोहन लाल ओस नु खास पोरमुत ल्यूखमुत। सुती ओस सु बद अतवार तु मिज़ाज़ तेज़। दपान व्यथुबलु ऑस तस अँकिस दून जायन खांदरु कथु आमच्च। मगर येलि अँम्य कोरि वाल्यन पनुन रुफ होव, तिमव कोर तस कूर दिनस

इनकार। तमि वख्तु ओस मोहन लाल अठोवुह वुहर। अमि पतु आव नु कांह तान ब्रोंठ कुन तु मोहन लालन ति त्रोव खांदरस मुतलिक केह सोंचनुय।

ब्याख नाव ओस जमाल दीनुन। वाँसि ओस सु अक लालस ल्वकुट तु मोहन लालस ज्युठ। सु ओस बेयिस सरयि मंज़ अँकिस बापॉरिस निश मुनुश। बापॉर्य ओस तस सख यज़थ करान। जमाल दीनस ऑस यि नोकरी पसंद। येलि ख्वश करिहेस, तेलि गछिहे। पाबँदी ऑसुस नु कुनि कुस्मच। जमाल दीनस ऑस ज़नानु महबूब तु अख कूर यासमीन, यस खांदर ओसुन कोरमुत।

चूरिम नाव ओस गूपी नाथुन। वाँसि च्वयित्रुह पांचुत्रुह। सु ओस बापॉर्य। मॉलिस माजि निशि ओस अलग द्रामुत तिव्याज़ि तसंज ज़नानु ऑस मिज़ाज़ु किन्य तेज़। शुर ओसुस नु कांह। गूपी नाथस ति ऑस नु मालिस सुत्य बराबँदी। तस ओस नु हमेशु खॉतर मॉलिस ताबेह रोजुन पसंद। अथ मामुलस मंज़ ऑस्य सॉरी ज़िठय कुंस्य तस नँसीहथ करुनस मंज़ नाकाम सपदेमुत्य। गूपी नाथ ओस हँठी। सु ओस नु काँसि हुंज़ कथ बोज़नस तैयार।

सरवानंद ओस काँफी थोकमुत मगर तोति ओस सु यछान जल्दुय वापस नेरुन। तँम्य कोर बाकुयन च्वन नफरन सुत्य मशवरु। तिम ऑस्य यछान ग्वडु पनुनि केह ज़रूरी कामि म्वकलावुनि। फॉसलु सपुद जि च्वनुवय नफर वातन ज़ून पछु दँहम दूह गाश फवलवुनुय सरवानंदुन गर तु अति प्यटु नेरन सॉरी यिकुवटु। ज़ून पछ दँहम ऑस्य वुनि पाँछ दूह।

सरवानंदस गव अख अख दूह कडुन मुश्किल। मगर चारु ओस नु केह, अमी प्योस सबर करुन। ऑखुरस वोट मुकरर कोरमुत दूह। गाश फवलनु ब्रोंटुय रूद सरवानंद तैयार। सु ओस यछान सुलि खोतु सुलि नेरुन। तस ऑस ज़ान देदि हुंज़ सख फिकिर तिव्याज़ि कँह्यतान्य कँह्यतान्य ऑस तँम्य स्व नवि सरु लँबमुच।

गाश फोल मगर कांह आव नु। वुन्य नतु वुन्य यिन, यि सूंचिथ रूद सरवानंद प्रारान। येलि नु सिर्यि खसनु पतु वारियाहस कालस ति कांह आव, सरवानंदस चायि फिकिर। खबर रुचुरय छुखु? तँम्य कोर फॉसलु सारिनुय हुंद गर गँछिथ तिमन नज़र दिनस।

सरवानंद वोट ग्वडु अक लालुन गर। सु ओस दुकानस प्यठ नेरनुच सखर करान। सरवानंदस वुछिथुय गँयि तस अक्लु ब्यकल मगर बुथ कोरुन दोर। दोपुनस, 'हे सर्व काक! बु ओसुस सोंचानुय च्नु आसुहँख प्रारान। वुन्यक्यस ओसुस बु च्नेय निशि यिनुच तैयॉरी करान। काँल्यक्यथ छुना सालेग्रामस लँडकस गंडुन। अदु साँ तु च्ने छय पताह, यिम मा छि मे वरॉय काँसि निशि सोदा तुलान। राथ सुबहॉय प्यव पानय वॉतिथ तु बोड बारु फिरिस्त कोरनम हवालु। रातु प्यटु छुसय बु तसुंदुय सामानु गंडान। वुनि लगनम ज़ु दूह। अगर च्नु म्योन बोज़ख, च्नु नेर तु वारु कारु। येति सपदिथुय वातय बु तूर्य।' सरवानंदुनि केह वननु ब्रोंटुय लोग अक लालन ऑंगजन प्यठ हिसाब करुन तु वोनुनस, 'बराबर वातय बु पुनिम दूह सुबहस। आ, अगर कुनि वजह किन्य बु ह्योकुस नु यिथ, तेलि सोज़न बु पनुनि बदलु ब्याख कांह। यि गव म्योन वादु।' सरवानंदन पृछुस, 'यि सालेग्राम कुस गव?' तँम्य द्युतुस जवाब, 'हा यि गव ना मखन लालस साँजू। छुस असली पितुर साँजू, मगर यिम मा छि ति मानान।' मखन लाल ओस अक लालुनिस बँडिस नेचिविस हँहँर।

सरवानंदन ह्योत अक लालस इजाज़थ। फुट्यमुत्यव क्वठ्यव द्राव सु मोहन लालुन गर कुन।

मोहन लालुन गरु वॉतिथ कोर सरवानंदन तस ब्वनु प्यठय आलव। कुठ्य दारि किन्य दिन्न मोहन लालन नज़र। सरवानंदस कुन नज़र प्यथुय फ्यूर सु पथ। अँदरु गॅयि क्याहताम कथु कथ। रछ खंड गॅछिथ वोथ तसुंद बुडु मोल ब्वन। सरवानंदस वुछिथ कोरुन तस नमसकार तु वोनुनस, 'वुछ साँ च्ने लोगुय नाहकृ पाहकृ तकलीफ। मे वन्योव मोहन जीयस राथुय जि च्ने वनी पूर शेछ।' सरवानंदस तोर नु कॅह फिकिरी। मोहन लालुन्य मॉल्य वोनुनस वारु, 'चु कर साँ असि ग्वडु मुबारक। मोहन जीयस छि अँकिस जायि गंडु गंड। अज़ शामस छि तोरु कॅह नफर यिनु वॉल्य। अगर माजि रॉगिन्यायि मंज़ूर ओस, तु बेयि आथवारि करव कसम द्रिय। अँस्य छी साँरी अँथ्य कुसस सुत्य आवुर्य। व्वन्य मा ह्यकोन वुन्यक्यस मोहन जी ओरु योर त्रॉविथ।' सरवानंद द्राव दिल मोलूल गॅछिथ।

फाकय तु फुकुरय वोत सरवानंद जमाल दीनुन गरु। तति ओस नु कुहन्य। दारि दरवाज़ु ऑस्य बंद। ओरु योर वुछिथ पेयि सरवानंदस मोहनविस प्यठ नज़र। सु ओस बागस सग दिवान। सरवानंदन पृछुस, 'यि कति छु जमाल साँब?' मोहनव्य वोनुनस, 'सु माहरा आवुय नु कामि प्यठ वापस। तस छि मॉलिकन तमाम छुटियि बंद करिमचु।' 'तु महबूब कति छि?' सरवानंदन पृछुस। 'स्व माहरा गॉमुन्न कोरि नज़र दिनि।' सरवानंद द्राव वापस मगर तस ओस पूर बिहिथ जि जमाल दीन तु महबूब छि मकानस अँदरुय, तु मोहनविस अथि छख नेबुर्य हाँकल करनॉवमुन्न।

यीतिस कालस सरवानंद गूपी नाथुन गरु वोत, न्यसुब दूह ओस म्वकल्योमुत। युथुय तस सरवानंदस कुन नज़र पेयि, तस आयि बुथिस रोनाक, ज़न तु सु ओस तँस्य प्रारान। वँम्यतान्य ऑस तस ब्रॉठुय खबर वँरमुन्न। 'बु माहरा ओसुस त्वही निश पकान। मे बूज़ तोह्य छिवु नु वुनि द्रामुत्य कॅह। अमी दोपुम ग्वडु दिमु त्वही यि ख्वश खबर।' सरवानंद गव हॉरान। 'क्वसु साँ ख्वश खबर?' गूपी नाथन वोनुस, 'मे माहरा गव टॉठिस सुत्य सलाह। राथ ओस म्योन ज़्युठ माम आमुत तु तँमी द्युत असि सलाह वँरिथ। अज़ माहरा छु असि तूर्य गछुन तु रोठ करुन। मे ओस बडु अरमान त्वहि सुत्य यिनस। मे दिज्यवु मॉफी। वारु कारु यियिव तोह्य वापस, बु वातुनावोव तुहुंद रोठ पानय।'

सरवानंद द्राव कुनुय ज़ोन। येलि सु ज़ान देदि निशि वोत, स्व ऑस बेताब गॅछिथ तँस्य प्रारान। सरवानंद ओस छेनिथ प्योमुत। तँम्य द्युत पनुन पान यि दँप्यजि ति पथर दॉरिथ। ज़ान देदि दिन्न ओरु योर नज़र। सरवानंदस वरॉय आस नु बेयि कांह बोज़नु। सरवानंदन वँनिनस सॉरुय दँलील।

पुनिम आयि तु गॅयि, मगर अकृ लाल आव नु कॅह। सरवानंदस द्राव नर्यन ज़ंगन जुव। सूंचुन, अकृ लालन ति मा द्युत दोखय? मगर ज़ान देदि ओस दिल बोड। तमि द्युतुनस दिलासु। दोपुनस, 'अकृ लाल वनि नु अपुज़। वादु छुनय कोरमुत, यियि ज़रूर। अदु अज़ आव नु, बेयि पुनिम यियि।' सरवानंदस बडेयि ह्यमथ। वॉलिज खँचुस बोठ। पनुनिस पानस वँरुन मलामथ जि वुछ बु क्याह क्याह छुस सॉचान। 'खबर सु बिचारु मा आसि वुनि ति सालेग्रामुन सामानय गंडान!'

ब्याख पुनिम ति वॉन्न मगर अकृ लाल आव नु कॅह। सरवानंदस ति ऑस नु सरयि वापस गॅछिथ नवि सरु हालातन साम ह्यनुच ह्यमथ। वंदु आव। शीनु रज़ु वाजन। तुरि गटुकार वोथ, मगर न आव अकृ लाल पानु तु न सूज़ तँम्य बेयि कांह। अमि पतु आव सॉथ। सरवानंदन सूंच जि शायद मा ह्योक नु अकृ लाल वुनिस ताम शीनु मूजुब यिथ। सॉंतुचि ग्वडुनिचि पुनिम रूद सु सुबहु प्यठय ग्रज़ु आरस

कुन नज़र थँविथ अकृ लालस प्रारान। शामस ताम ति येलि नु सरवानंदन कलु फ्युर, ज्ञान देदि दिच्चनस ज़ीर। सरवानंदस आसु अँछ दरस तु पान ओसुस शिठ्योमुत।

वख रूद पकान। कौत्याह ज़ायि तु कौत्याह मूद्य, मगर ज्ञान देदि रॉव नु ह्यमथ। तमि थँव व्वमेद बरकरार, तिक्याज़ि वरदानु मुतौबिक येलि तस यि स्यकृ सपदि ज़ि लूकन छनु तसुंज ज़रूरथ, तमी दूह सपदि तसुंद अंत। मगर ज्ञान देदि ओस नु वुनि अंत मंज़ूर।

दपान ज्ञान द्यद छि अज़ ति कश्यप नागस प्यठ बिहिथ प्रारान, यि व्वमेद थँविथ ज़ि अकि नतु अकि पुनिम वाति अकृ लाल या तसुंद साँथी ग्रज़ आरस तँरिथ तस अथु दिनि।

